

Namo tassa bhagavato arahato sammāsambuddhassa

# Khuddakanikāye

## Theragāthāpāḷi

### Nidānagāthā

Sīhānaṃva nadantānaṃ, dāṭhīnaṃ girigabbhāre;  
Suṇātha bhāvitattānaṃ, gāthā atthūpanāyikā [attūpanāyikā (sī. ka.)].

Yathānāmā yathāgottā, yathādhammavihārino;  
Yathādhimuttā sappaññā, vihariṃsu atanditā.

Tattha tattha vipassitvā, phusitvā accutaṃ padaṃ;  
Katantaṃ paccavekkhantā, imamatthamabhāsisuṃ.

## 1. Ekakanipāto

### 1. Paṭhamavaggo

#### 1. Subhūtittheragāthā

1. “Channā me kuṭikā sukhā nivātā, vassa deva yathāsukhaṃ;  
Cittaṃ me susamāhitaṃ vimuttaṃ, ātāpī viharāmi vassa devā”’ti.

Itthaṃ sudaṃ [itthaṃ sumaṃ (ka. aṭṭha.)] āyasmā subhūtitthero gāthaṃ abhāsithāti.

#### 2. Mahākoṭṭhikattheragāthā

2. “Upasanto uparato, mantabhāṇī anuddhato;  
Dhunāti pāpake dhamme, dumapattaṃva māluto”’ti.

Itthaṃ sudaṃ āyasmā mahākoṭṭhiko [mahākoṭṭhito (sī. syā.)] thero gāthaṃ abhāsithāti.

#### 3. Kaṅkhārevatatheragāthā

3. “Paññaṃ imaṃ passa tathāgatānaṃ, aggi yathā pajjalito nisīthe;  
Ālokadā cakkhudadā bhavanti, ye āgatānaṃ vinayanti kaṅkha”’nti.

Itthaṃ sudaṃ āyasmā kaṅkhārevato thero gāthaṃ abhāsithāti.

#### 4. Puṇṇattheragāthā

4. “Sambhireva samāsetha, paṇḍitehatthadassibhi;  
Atthaṃ mahantaṃ gambhīraṃ, duddasaṃ nipuṇaṃ aṇuṃ;  
Dhīrā samadhigacchanti, appamattā vicakkhaṇā”’ti.

Itthaṃ sudaṃ āyasmā puṇṇo mantāniputto [[mantāniputto \(syā. ka.\)](#)] thero gāthaṃ abhāsithāti.

### 5. Dabbattheragāthā

5. “Yo duddamiyo damena danto, dabbo santusito vitinṇakaṅkho;  
Vijitāvī apetaḥeravo hi, dabbo so parinibbuto ṭhitatto”ti.

Itthaṃ sudaṃ āyasmā dabbo thero gāthaṃ abhāsithāti.

### 6. Sītavanīyattheragāthā

6. “Yo sītavanaṃ upagā bhikkhu, eko santusito samāhitatto;  
Vijitāvī apetalomaḥso, rakkhaṃ kāyagatāsatiṃ dhitimā”ti.

Itthaṃ sudaṃ āyasmā sītavaniyo thero gāthaṃ abhāsithāti.

### 7. Bhalliyattheragāthā

7. “Yopānudi maccurājassa senaṃ, naḷasetuṃva sudubbalaṃ mahogho;  
Vijitāvī apetaḥeravo hi, danto so parinibbuto ṭhitatto”ti.

Itthaṃ sudaṃ āyasmā bhaliyo thero gāthaṃ abhāsithāti.

### 8. Vīrattheragāthā

8. “Yo duddamiyo damena danto, vīro santusito vitinṇakaṅkho;  
Vijitāvī apetalomaḥso, vīro so parinibbuto ṭhitatto”ti.

Itthaṃ sudaṃ āyasmā vīro thero gāthaṃ abhāsithāti.

### 9. Pilindavacchattheragāthā

9. “Svāgataṃ na durāgataṃ [[nāpagataṃ \(sī. syā.\)](#)], nayidaṃ dumantitaṃ mama;  
Saṃvibhatesu dhammesu, yaṃ seṭṭhaṃ tadupāgami”nti.

Itthaṃ sudaṃ āyasmā pilindavaccho [[pilindivaccho \(sī.\)](#)] thero gāthaṃ abhāsithāti.

### 10. Puṇṇamāsatttheragāthā

10. “Vihari apekkhaṃ idha vā huraṃ vā, yo vedaū samito yatatto;  
Sabbesu dhammesu anūpalitto, lokassa jaññā udayabbayañcā”ti.

Itthaṃ sudaṃ āyasmā puṇṇamāso thero gāthaṃ abhāsithāti.

Vaggo paṭhamo niṭṭhito.

Tassuddānaṃ –

Subhūti koṭṭhiko thero, kaṅkhārevatasammato;  
Mantāniputto dabbo ca, sītavaniyo ca bhaliyo;

Vīro pilindavaccho ca, puṇṇamāso tamonudoti.

## 2. Dutiyavaggo

### 1. Cūlavacchattheragāthā

11. “Pāmojjabahulo bhikkhu, dhamme buddhappavedite;  
Adhigacche padaṃ santaṃ, saṅkhārūpasamaṃ sukha’’nti.

... Cūlavaccho [cūlagavaccho (sī.)] thero....

### 2. Mahāvacchattheragāthā

12. “Paññābalī sīlavatūpapanno, samāhito jhānarato satīmā;  
Yadatthiyaṃ bhojanaṃ bhuñjamāno, kaṅketha kālaṃ idha vītarāgo’’ti.

... Mahāvaccho [mahāgavaccho (sī.)] thero....

### 3. Vanavacchattheragāthā

13. “Nīlabbhavaṇṇā rucirā, sītavārī sucindharā;  
Indagopakasañchannā, te selā ramayanti ma’’nti.

... Vanavaccho thero....

### 4. Sivakasāmaṇeragāthā

14. “Upajjhāyo maṃ avaca, ito gacchāma sīvaka;  
Gāme me vasati kāyo, araññaṃ me gato mano;  
Semānakopi gacchāmi, natthi saṅgo vijānata’’nti.

... Sivako sāmaṇero....

### 5. Kuṇḍadhānattheragāthā

15. “Pañca chinde pañca jahe, pañca cuttari bhāvaye;  
Pañcasāṅgātigo bhikkhu, oghatiṇṇoti vuccatī’’ti.

... Kuṇḍadhāno thero....

### 6. Belaṭṭhasīsattheragāthā

16. “Yathāpi bhaddo ājañño, naṅgalāvattanī sikhī;  
Gacchati appakasirena, evaṃ rattindivā mama;  
Gacchanti appakasirena, sukhe laddhe nirāmise’’ti.

... Belaṭṭhasīso thero....

### 7. Dāsakattheragāthā

17. “Middhī yadā hoti mahagghaso ca, niddāyitā samparivattasāyī;  
Mahāvarāhova nivāpapuṭṭho, punappunaṃ gabbhamupeti mando”’ti.

... Dāsako thero....

### 8. Singālapitutttheragāthā

18. “Ahu buddhassa dāyādo, bhikkhu bhesakaḷāvane;  
Kevalaṃ aṭṭhisaññāya, aphaṛī pathaviṃ [paṭhavim (sī. syā.)] imaṃ;  
Maññehaṃ kāmarāgaṃ so, khippameva pahissatī”’ti [pahīyabhi (sabbattha pāḷiyam)].

... Singālapitā [sīgālapitā (sī.)] thero....

### 9. Kulattheragāthā

19. [dha. pa. 80, 145 dhammapadepi] “Udakaṃ hi nayanti nettikā, usukārā namayanti [damayanti (ka.)] tejanaṃ;  
Dāruṃ namayanti tacchakā, attānaṃ damayanti subbatā”’ti.

... Kulo [kuṇḍalo (sī.), kuḷo (syā. ka.)] thero....

### 10. Ajitattheragāthā

20. “Maraṇe me bhayaṃ natthi, nikanti natthi jīvite;  
Sandehaṃ nikkhipissāmi, sampajāno paṭissato”’ti [patissatoti (sī. syā.)].

... Ajito thero ....

Vaggo dutiyo niṭṭhito.

Tassuddānaṃ –

Cūḷavaccho mahāvachcho, vanavaccho ca sīvako;  
Kuṇḍadhāno ca belaṭṭhi, dāsako ca tatopari;  
Singālapitiko thero, kulo ca ajito dasāti.

### 3. Tatiyavaggo

#### 1. Nigrodhattheragāthā

21. “Nāhaṃ bhayassa bhāyāmi, sathā no amatassa kovido;  
Yattha bhayaṃ nāvatiṭṭhati, tena maggena vajanti bhikkhavo”’ti.

... Nigrodho thero....

#### 2. Cittakattheragāthā

22. “Nīlā sugīvā sikhino, morā kārambhiyaṃ [kāramviyaṃ (sī.), kāraviyaṃ (syā.)] abhinadanti;  
Te sītavātakīḷitā [sītavātakadditakalītā (sī.), sītavātakalītā (syā.)], suttam jhāyaṃ [jhānaṃ (syā.), jhāyim (?)] nibodhentī”’ti.

... Cittako thero....

### 3. Gosālattheragāthā

23. “Ahaṃ kho veḷugumbasmiṃ, bhutvāna madhupāyasam;  
Padakkhiṇaṃ sammasanto, **khandhānaṃ udayabbayaṃ;**  
Sānuṃ paṭigamissāmi, vivekamanubrūhaya’nti.

... Gosālo thero....

### 4. Sugandhattheragāthā

24. “Anuvassiko pabbajito, **passa dhammasudhammatam;**  
Tisso vijjā anuppattā, kataṃ buddhassa sāsana’nti.

... Sugandho thero....

### 5. Nandiyattheragāthā

25. “Obhāsajātaṃ phalagaṃ, cittaṃ yassa abhiṇhaso;  
Tādisaṃ bhikkhumāsajja, kaṇha dukkhaṃ nigacchasi’ti.

... Nandiyo thero....

### 6. Abhayattheragāthā

26. “Sutvā subhāsitaṃ vācaṃ, buddhassādiccabandhuno;  
Paccabyadhiṃ hi nipuṇaṃ, vālaggaṃ usunā yathā’ti.

... Abhayo thero....

### 7. Lomasakaṅgiyattheragāthā

27. “Dabbaṃ kusaṃ poṭakilaṃ, usīraṃ muṅḅapabbajaṃ;  
Urasā panudissāmi, vivekamanubrūhaya’nti.

... Lomasakaṅgiyo thero....

### 8. Jambugāmikaputtattheragāthā

28. “Kacci no vatthapasuto, kacci no bhūsanārato;  
Kacci sīlamayaṃ gandhaṃ, kiṃ tvaṃ vāyasi [**kacci sīlamayaṃ gandhaṃ, tvaṃ vāsi (syā.)**]  
netarā pajā’ti.

... Jambugāmikaputto thero....

### 9. Hāritattheragāthā

29. “Samunnamayamattānaṃ, usukārova tejanaṃ;  
Cittaṃ ujum karitvāna, avijjaṃ bhinda hāritā’ti.

... Hārito thero....

## 10. Uttiyattheragāthā

30. “Ābādhe me samuppanne, sati me udapajjatha;  
Ābādho me samuppanno, kālo me nappamajjitu’’nti.

... Uttiyo thero....

Vaggo tatiyo niṭṭhito.

Tassuddānaṃ –

Nigrodho cittako thero, gosālathero sugandho;  
Nandiyo abhayo thero, thero lomasakaṅgiyo;  
Jambugāmikaputto ca, hārito uttiyo isīti.

## 4. Catutthavaggo

### 1. Gahvaratīriyattheragāthā

31. “Phuṭṭho ḍaṃsehi makasehi, araṅṅasmim brahāvane;  
Nāgo saṃgāmasīseva, **sato tatrādhivāsaya’’ti.**

... Gahvaratīriyo thero....

### 2. Suppiyattheragāthā

32. “Ajaraṃ jīramānena, tappamānena nibbutim;  
Nimiyam [nimmissam (sī.), nirāmisam (syā.), nimineyyam (?)] paramam santim,  
yogakkhemam anuttara’’nti.

... Suppiyo thero....

### 3. Sopākattheragāthā

33. “Yathāpi ekaputtasmim, piyasmim kusalī siyā;  
Evaṃ sabbesu pāṇesu, sabbattha kusalo siyā’’ti.

... Sopāko thero....

### 4. Posiyattheragāthā

34. “Anāsannavarā etā, niccomeva vijānatā;  
Gāmā araṅṅamāgamma, tato geham upāvisi [upāvisim (sī.)];  
Tato uṭṭhāya pakkāmi, anāmantetvā [anāmantiya (sī.)] posiyo’’ti.

... Posiyo thero....

## 5. Sāmaññakānittheragāthā

35. “Sukhaṃ sukhattho labhate tadācaram, kittiñca pappoti yasassa vaḍḍhati;  
Yo ariyamaṭṭhaṅgikamañjasam ujum, bhāveti maggam amatassa pattiyā”ti.

... Sāmaññakānitthero....

### 6. Kumāputtattheragāthā

36. “Sādhu sutam sādhu caritakam, sādhu sadā aniketavihāro;  
Atthapucchanam padakkhiṇakammaṃ, etaṃ sāmāññamakiñcanassā”ti.

... Kumāputto thero....

### 7. Kumāputtasahāyakattheragāthā

37. “Nānājanapadam yanti, vicarantā asaññatā;  
Samādhiñca virādhenti, kiṃsu raṭṭhacariyā karissati;  
Tasmā vineyya sārambham, jhāyeyya apurakkhato”ti.

... Kumāputtattherassa sahāyako thero....

### 8. Gavampatittheragāthā

38. “Yo iddhiyā sarabhum aṭṭhapesi, so gavampati asito anejo;  
Taṃ sabbasaṅgātigataṃ mahāmunim, devā namassanti bhavassa pārāgu”nti.

... Gavampatitthero....

### 9. Tissattheragāthā

39. [sam. ni. 1.21, 97]“Sattiyā viya omaṭṭho, ḍayhamānova [ḍayhamāneva (sabbattha)] matthake;  
Kāmarāgappahānāya, sato bhikkhu paribbaje”ti.

... Tisso thero....

### 10. Vaḍḍhamānattheragāthā

40. “Sattiyā viya omaṭṭho, ḍayhamānova matthake;  
Bhavarāgappahānāya, sato bhikkhu paribbaje”ti.

... Vaḍḍhamāno thero....

Vaggo catuttho niṭṭhito.

Tassuddānam –

Gahvaratīriyo suppiyo, sopāko ceva posiyo;  
Sāmaññakāni kumāputto, kumāputtasahāyako;  
Gavampati tissatthero, vaḍḍhamāno mahāyasoti.

### 5. Pañcamavaggo

### 1. Sirivaḍḍhattheragāthā

41. “Vivaramanupatanti vijjutā, vebhārassa ca paṇḍavassa ca;  
Nagavivaragato ca jhāyati, putto appaṭimassa tādino”ti.

... Sirivaḍḍho thero....

### 2. Khadiravaniyattheragāthā

42. “Cāle upacāle sīsūpacāle ( ) [(cālā upacālā, sīsūpacālā) (ka.)] patissatā [paṭissatikā (syā. ka.)]  
nu kho viharatha;  
Āgato vo vālaṃ viya vedhī”ti.

... Khadiravaniyo thero....

### 3. Sumaṅgalattheragāthā

43. “Sumuttiko sumuttiko sāhu, sumuttikomhi tīhi khujjakehi;  
Asitāsu mayā naṅgalāsu, mayā khuddakuddālāsu mayā.

Yadipi idhameva idhameva, atha vāpi alameva alameva;  
Jhāya sumaṅgala jhāya sumaṅgala, appamatto vihara sumaṅgalā”ti.

... Sumaṅgalo thero....

### 4. Sānuttheragāthā

44. [saṃ. ni. 1.239] “Mataṃ vā amma rodanti, yo vā jīvaṃ na dissati;  
Jīvantaṃ maṃ amma passantī, kasmā maṃ amma rodasī”ti.

... Sānutthero....

### 5. Ramaṇīyavihārittheragāthā

45. “Yathāpi bhaddo ājañño, khalitvā patitiṭṭhati;  
Evaṃ dassanasampannaṃ, sammāsambuddhasāvaka”nti.

... Ramaṇīyavihāritthero....

### 6. Samiddhittheragāthā

46. “Saddhāyāhaṃ pabbajito, agārasmānagāriyaṃ;  
**Sati paññā** ca me vuḍḍhā, cittaṅca susamāhitam;  
Kāmaṃ karassu rūpāni, neva maṃ byādhayissasī”ti [bādhayissasī (sī.), byāthayissasī (?)].

... Samiddhitthero....

### 7. Ujjayattheragāthā

47. “Namo te buddha vīratthu, vipamuttosī sabbadhi;  
Tuyhāpadāne viharaṃ, viharāmi anāsavo”ti.



... Ujjayo thero....

### 8. Sañjayattheragāthā

48. “Yato ahaṃ pabbajito, agārasmānagāriyaṃ;  
Nābhijānāmi saṅkappaṃ, anariyaṃ dosasaṃhita’’nti.

... Sañjajo thero....

### 9. Rāmaṇeyyakattheragāthā

49. “Cīhacīhābhīnadite [vihavīhābhīnadite (sī. syā.)], sippikābhirutehi ca;  
Na me taṃ phandati cittaṃ, ekattanirataṃ hi me’’ti.

... Rāmaṇeyyako thero....

### 10. Vimalattheragāthā

50. “Dharaṇī ca siṅcati vāti, māluto vijjutā carati nabhe;  
Upasamanti vitakkā, cittaṃ susamāhitaṃ mamā’’ti.

... Vimalo thero....

Vaggo pañcamaṃ niṭṭhito.

Tassuddānaṃ –

Sirīvaḍḍho revato thero, sumaṅgalo sānusavhayo;  
Ramaṇīyavihārī ca, samiddhiujjayasañjayā;  
Rāmaṇeyyo ca so thero, vimalo ca raṇaṅjahoti.

### 6. Chaṭṭhavaggo

#### 1. Godhikattheragāthā

51. “Vassati devo yathā sugītaṃ, channā me kuṭikā sukhā nivātā;  
Cittaṃ susamāhitaṅca mayhaṃ, atha ce patthayasi pavassa devā’’ti.

... Godhiko thero....

#### 2. Subāhuttheragāthā

52. “Vassati devo yathā sugītaṃ, channā me kuṭikā sukhā nivātā;  
Cittaṃ susamāhitaṅca kāye, atha ce patthayasi pavassa devā’’ti.

... Subāhutthero....

#### 3. Valliyattheragāthā

53. “Vassati devo yathā sugītaṃ, channā me kuṭikā sukhā nivātā;

Tassaṃ viharāmi appamatto, atha ce patthayasi pavassa devā’’ti.

... Valliyo thero....

#### 4. Uttiyattheragāthā

54. “Vassati devo yathā sugītaṃ, channā me kuṭikā sukhā nivātā;  
Tassaṃ viharāmi adutiyo, atha ce patthayasi pavassa devā’’ti.

... Uttiyo thero....

#### 5. Añjanavaniyattheragāthā

55. “Āsandim kuṭikaṃ katvā, ogayha añjanaṃ vanam;  
Tisso vijjā anuppattā, kataṃ buddhassa sāsana’’nti.

... Añjanavaniyo thero....

#### 6. Kuṭivihārittheragāthā

56. “Ko kuṭikāyaṃ bhikkhu kuṭikāyaṃ, vītarāgo susamāhitacitto;  
Evaṃ jānāhi āvuso, amoghā te kuṭikā katā’’ti.

... Kuṭivihāritthero....

#### 7. Dutiyakuṭivihārittheragāthā

57. “Ayamāhu purāṇiyā kuṭi, aññaṃ patthayase navaṃ kuṭim;  
Āsaṃ kuṭiyā virājaya, dukkhā bhikkhu puna navā kuṭi’’ti.

... Dutiyakuṭivihāritthero....

#### 8. Ramaṇīyakuṭikattheragāthā

58. “Ramaṇīyā me kuṭikā, saddhādeyyā manoramā;  
Na me attho kumārīhi, yesaṃ attho tahiṃ gacchatha nāriyo’’ti.

... Ramaṇīyakuṭiko thero....

#### 9. Kosalavihārittheragāthā

59. “Saddhāyāhaṃ pabbajito, araṇṇe me kuṭikā katā;  
Appamatto ca ātāpī, sampajāno patissato’’ti [paṭissatoti (ka.)].

... Kosalavihāritthero....

#### 10. Sīvalittheragāthā

60. “Te me ijjhimsu saṅkappā, yadattho pāvisim kuṭim;  
Vijjāvimuttiṃ pacesaṃ, mānānusayamujjaha’’nti.

... Sīvalitthero....

Vaggo chaṭṭho niṭṭhito.

Tassuddānaṃ –

Godhiko ca subāhu ca, valliyo uttiyo isi;  
Añjanavaniyo thero, duve kuṭivihārino;  
Ramañīyakuṭiko ca, kosalavhayasīvalīti.

## 7. Sattamavaggo

### 1. Vappattheragāthā

61. “Passati passo passantam, apassantañca passati;  
Apassanto apassantam, passantañca na passatī”ti.

... Vappo thero....

### 2. Vajjiputtattheragāthā

62. “Ekakā mayam araññe viharāma, apaviddhamva vanasmim dārukaṃ;  
Tassa me bahukā pihayanti, nerayikā viya saggagāmina”nti.

... Vajjiputto thero....

### 3. Pakkhattheragāthā

63. “Cutā patanti patitā, giddhā ca punarāgatā;  
Kataṃ kiccaṃ rataṃ rammaṃ, sukhenanvāgataṃ sukha”nti.

... Pakkho thero....

### 4. Vimalakoṇḍaññattheragāthā

64. “Dumavhayāya uppanno, jāto paṇḍaraketunā;  
Ketuhā ketunāyeva, mahāketuṃ padhamsayī”ti.

... Vimalakoṇḍañño thero....

### 5. Ukkhepakatavacchattheragāthā

65. “Ukkhepakatavacchassa, saṅkalitaṃ bahūhi vassehi;  
Taṃ bhāsati gahaṭṭhānaṃ, sunisinno uḷārapāmojjo”ti.

... Ukkhepakatavaccho thero....

### 6. Meghiyattheragāthā

66. “Anusāsi mahāvīro, sabbadhammāna pāragū;

Tassāhaṃ dhammaṃ sutvāna, vihāsiṃ santike sato;  
Tisso vijjā anuppattā, kataṃ buddhassa sāsana’’nti.

... Meghiyo thero....

### 7. Ekadhammasavanīyattheragāthā

67. ‘‘Kilesā jhāpitā mayhaṃ, bhavā sabbe samūhatā;  
Vikkhīṇo jātisamsāro, natthi dāni punabbhavo’’ti.

... Ekadhammasavanīyo thero....

### 8. Ekudāniyattheragāthā

68. [udā. 37; pāci. 153] ‘‘Adhicitaso appamajjato, munino monapathesu sikkhato;  
Sokā na bhavanti tādino, upasantassa sadā satīmato’’ti.

... Ekudāniyo thero....

### 9. Channattheragāthā

69. ‘‘Sutvāna dhammaṃ mahato mahārasaṃ, sabbaññutaññānavarena desitaṃ;  
Maggā papajjimaṃ [papajjamaṃ (ka.)] amatassa pattiyā, so yogakkhemassa pathassa kovido’’ti.

... Channo thero....

### 10. Puṇṇattheragāthā

70. ‘‘Sīlameva idha aggamaṃ, paññavā pana uttamo;  
Manussesu ca devesu, sīlapaññāṇato jaya’’nti.

... Puṇṇo thero....

Vaggo sattamo niṭṭhito.

Tassuddānaṃ –

Vappo ca vajjiputto ca, pakkho vimalakoṇḍañño;  
Ukkhepakatavaccho ca, meghiyo ekadhammiko;  
Ekudāniyachannā ca, puṇṇatthero mahabbaloti.

### 8. Aṭṭhamavaggo

#### 1. Vacchapālattheragāthā

71. ‘‘Susukhumanipuṇatthadassinā, matikusalena nivātavuttinā;  
Saṃsevitavuddhasīlinā [saṃsevitabuddhasīlinā (ka.)], nibbānaṃ na hi tena dullabha’’nti.

... Vacchapālo thero....

## 2. Ātumattheragāthā

72. “Yathā kaḷīro susu vaḍḍhitaggo, dunnikkhamo hoti pasākhajāto;  
Evaṃ ahaṃ bhariyāyānitāya, anumaññaṃ maṃ pabbajitomi dānī”ti.

... Ātumo thero....

## 3. Māṇavattheragāthā

73. “Jiṇṇaṅga disvā dukhitaṅga byādhitam, mataṅga disvā gatamāyusaṅkhayaṃ;  
Tato ahaṃ nikkhamitūna pabbajim, pahāya kāmāni manoramāni”ti.

... Māṇavo thero....

## 4. Suyāmanattheragāthā

74. “Kāmacchando ca byāpādo, thinamiddhaṅga [thīnamiddhaṅga (sī. syā.)] bhikkhuno;  
Uddhaccaṃ vicikicchā ca, sabbasova na vijjati”ti.

... Suyāmano thero....

## 5. Susāradattheragāthā

75. “Sādhu suvihitāna dassanaṃ, kaṅkhā chijjati buddhi vaḍḍhati;  
Bālampi karonti paṇḍitaṃ, tasmā sādhu sataṃ samāgamo”ti.

... Susārado thero....

## 6. Piyañjahattheragāthā

76. “Uppatantesu nipate, nipatantesu uppate;  
Vase avasamānesu, ramamānesu no rame”ti.

... Piyañjaho thero....

## 7. Hatthārohaputtattheragāthā

77. “Idaṃ pure cittamacāri cārikaṃ, yenicchakaṃ yatthakāmaṃ yathāsukhaṃ;  
Tadajjahaṃ niggahessāmi yoniso, hatthippabhinnaṃ viya aṅkusaggaho”ti.

... Hatthārohaputto thero....

## 8. Meṇḍasirattheragāthā

78. “Anekajātisaṃsāraṃ, sandhāvissaṃ anibbisaṃ;  
Tassa me dukkhajātassa, dukkhakkhandho aparaddho”ti.

... Meṇḍasiro thero....

## 9. Rakkhitattheragāthā

79. “Sabbo rāgo pahīno me, sabbo doso samūhato;  
Sabbo me vigato moho, sītibhūtosmi nibbuto”’ti.

... Rakkhito thero....

### 10. Uggattheragāthā

80. “Yaṃ mayā pakataṃ kammaṃ, appaṃ vā yadi vā bahuṃ;  
Sabbametaṃ parikkhīṇaṃ, natthi dāni punabbhavo”’ti.

... Uggo thero....

Vaggo aṭṭhamo niṭṭhito.

Tassuddānaṃ –

Vacchapālo ca yo thero, ātumo māṇavo isi;  
Suyāmano susārado, thero yo ca piyañjaho;  
Ārohaputto meṇḍasiro, rakkhito uggasavhayoti.

### 9. Navamavaggo

#### 1. Samitiguttattheragāthā

81. “Yaṃ mayā pakataṃ pāpaṃ, pubbe aññāsu jātisu;  
Idheva taṃ vedanīyaṃ, vatthu aññaṃ na vijjatī”’ti.

... Samitigutto thero....

#### 2. Kassapattheragāthā

82. “Yena yena subhikkhāni, sivāni abhayāni ca;  
Tena puttaka gacchassu, mā sokāpahato bhavā”’ti.

... Kassapo thero....

#### 3. Sīhattheragāthā

83. “Sīhappamatto vihara, rattindivamatandito;  
Bhāvehi kusalaṃ dhammaṃ, jaha sīghaṃ samussaya”’nti.

... Sīho thero....

#### 4. Nītattheragāthā

84. “Sabbarattiṃ supitvāna, divā saṅgaṇike rato;  
Kudāssu nāma dummedho, dukkhassantaṃ karissatī”’ti.

... Nīto thero....

### 5. Sunāgattheragāthā

85. “Cittanimittassa kovido, pavivekarasaṃ vijāniya;  
Jhāyaṃ nipako patissato, adhigaccheyya sukhaṃ nirāmisā”nti.

... Sunāgo thero....

### 6. Nāgitattheragāthā

86. “Ito bahiddhā puthu aññavādināṃ, maggo na nibbānagamo yathā ayaṃ;  
Itissu saṅghaṃ bhagavānusāsati, sathā sayāṃ paṇitaleva dassaya”nti.

... Nāgito thero....

### 7. Paviṭṭhattheragāthā

87. “Khandhā diṭṭhā yathābhūtaṃ, bhavā sabbe padālītā;  
Vikkhīṇo jātisamsāro, natthi dāni punabbhavo”ti.

... Paviṭṭho thero....

### 8. Ajjunattheragāthā

88. “Asakkhiṃ vata attānaṃ, uddhātuṃ udakā thalaṃ;  
Vuyhamāno mahogheva, saccāni paṭivijjhaha”nti.

... Ajjuno thero....

### 9. (Paṭhama)-devasabhattheragāthā

89. “Uttiṇṇā paṅkapalipā, pātālā parivajjitā;  
Mutto oghā ca ganthā ca, sabbe mānā visaṃhatā”ti.

... Devasabho thero....

### 10. Sāmidattattheragāthā

90. “Pañcakkhandhā pariññātā, tiṭṭhanti chinnaṃlakā;  
Vikkhīṇo jātisamsāro, natthi dāni punabbhavo”ti.

... Sāmidatto thero....

Vaggo navamo niṭṭhito.

Tassuddānaṃ –

Thero samitigutto ca, kassapo sīhasavhayo;  
Nīto sunāgo nāgito, paviṭṭho ajjuno isi;  
Devasabho ca yo thero, sāmidatto mahabbaloti.

## 10. Dasamavaggo

### 1. Paripuṇṇakattheragāthā

91. “Na tathā matam satarasam, sudhannaṃ yaṃ mayajja paribhuttaṃ;  
Aparimitadassinā gotamena, buddhena desito dhammo”’ti.

... Paripuṇṇako thero....

### 2. Vijayattheragāthā

92. “Yassāsavā parikkhīṇā, āhāre ca anissito;  
Suññatā animitto ca, vimokkho yassa gocaro;  
Ākāseva sakuntānaṃ, padaṃ tassa durannaya”’nti.

... Vijayo thero....

### 3. Erakattheragāthā

93. “Dukkhā kāmā eraka, na sukhā kāmā eraka;  
Yo kāme kāmayaṭi, dukkhaṃ so kāmayaṭi eraka;  
Yo kāme na kāmayaṭi, dukkhaṃ so na kāmayaṭi erakā”’ti.

... Erako thero....

### 4. Mettajittheragāthā

94. “Namo hi tassa bhagavato, sakyaputtassa sirīmato;  
Tenāyaṃ aggappattena, aggadhammo [aggo dhammo (sī.)] sudesito”’ti.

... Mettaji thero....

### 5. Cakkhupālattheragāthā

95. “Andhohaṃ hatanettosmi, kantāraddhānapakkhando [pakkhanno (sī.), pakkanto (syā. sī. aṭṭha.)];  
Sayamānopi gacchissaṃ, na sahāyena pāpenā”’ti.

... Cakkhupālo thero....

### 6. Khaṇḍasumanattheragāthā

96. “Ekapupphaṃ cajitvāna, asīti [asītiṃ (sī.)] vassakoṭiyo;  
Saggesu paricāretvā, sesakenamhi nibbuto”’ti.

... Khaṇḍasumano thero....

### 7. Tissattheragāthā

97. “Hitvā satapalaṃ kaṃsaṃ, sovaṇṇaṃ satarājikaṃ;  
Aggahiṃ mattikāpattaṃ, idaṃ dutiyābhisecana”’nti.



... Tisso thero....

### 8. Abhayattheragāthā

98. “Rūpaṃ disvā sati muṭṭhā, piyaṃ nimittaṃ manasikaroto;  
Sārattacitto vedeti, tañca ajjhosa tiṭṭhati;  
Tassa vaḍḍhanti āsavā, bhavamūlopagāmino’’ti [[bhavamūlā bhavagāminoti \(sī. ka.\)](#)].

... Abhayo thero....

### 9. Uttiyattheragāthā

99. “Saddaṃ sutvā sati muṭṭhā, piyaṃ nimittaṃ manasikaroto;  
Sārattacitto vedeti, tañca ajjhosa tiṭṭhati;  
Tassa vaḍḍhanti āsavā, saṃsāraṃ upagāmino’’ti.

... Uttiyo thero....

### 10. (Dutiya)-devasabhattheragāthā

100. “Sammappadhānasampanno, satipaṭṭhānagocaro;  
Vimuttikusumasañchanno, parinibbissatyanāsavo’’ti.

... Devasabho thero....

Vaggo dasamo niṭṭhito.

Tassuddānaṃ –

Paripuṇṇako ca vijayo, erako mettajī muni;  
Cakkhupālo khaṇḍasumano, tisso ca abhayo tathā;  
Uttiyo ca mahāpañño, thero devasabhopi cāti.

### 11. Ekādasamavaggo

#### 1. Belaṭṭhānikattheragāthā

101. “Hitvā gihittaṃ anavositatto, mukhanaṅgalī odariko kusīto;  
Mahāvarāhova nivāpapuṭṭho, punappunaṃ gabbhamupeti mando’’ti.

... Belaṭṭhāniko thero....

#### 2. Setucchattheragāthā

102. “Mānena vañcitāse, saṅkhāresu saṅkilissamānāse;  
Lābhālābhena mathitā, samādhiṃ nādhigacchantī’’ti.

... Setuccho thero....

#### 3. Bandhurattheragāthā

103. “Nāhaṃ etena atthiko, sukhito dhammarasena tappito;  
Pitvā [pītvāna (sī. syā.)] rasaggamuttamaṃ, na ca kāhāmi visena santhava”nti.

... Bandhuro [bandhano (ka.)] thero....

#### 4. Khitakattheragāthā

104. “Lahuko vata me kāyo, phuṭṭho ca pītisukhena vipulena;  
Tūlamiva eritaṃ mālutena, pilavatīva me kāyo”ti.

... Khitako thero....

#### 5. Malitavambhattheragāthā

105. “Ukkaṅṭhitopi na vase, ramamānopi pakkame;  
Na tvevānatthasaṃhitam, vase vāsaṃ vicakkhaṇo”ti.

... Malitavambho thero....

#### 6. Suhemantattheragāthā

106. “Sataliṅgassa atthassa, satalakkhaṇadhārino;  
Ekaṅgadassī dummedho, satadassī ca paṇḍito”ti.

... Suhemanto thero....

#### 7. Dhammasavattheragāthā

107. “Pabbajim tulayitvāna, agārasmānagāriyaṃ;  
Tisso vijjā anuppattā, kataṃ buddhassa sāsana”nti.

... Dhammasavo thero....

#### 8. Dhammasavapituttheragāthā

108. “Sa vīsavassasatiko, pabbajim anagāriyaṃ;  
Tisso vijjā anuppattā, kataṃ buddhassa sāsana”nti.

... Dhammasavapitu thero....

#### 9. Saṅgharakkhitattheragāthā

109. “Na nūnāyaṃ paramahitānukampino, rahogato anuvigaṇeti sāsanaṃ;  
Tathāhayaṃ viharati pākatindriyo, migī yathā taruṇajātikā vane”ti.

... Saṅgharakkhito thero....

#### 10. Usabhattheragāthā

110. “Nagā nagaggesu susaṃvirūḷhā, udaggameghena navena sittā;  
Vivekakāmassa araṇṇasaṇṇino, janeti bhiyyo usabhassa kalyata”nti.

... Usabho thero....

Vaggo ekādasamo niṭṭhito.

Tassuddānaṃ –

Belatṭhāniko setuccho, bandhuro khitako isi;  
Malitavambho suhemanto, dhammasavo dhammasavapitā;  
Saṅgharakkhitatthero ca, usabho ca mahāmunīti.

## 12. Dvādasamavaggo

### 1. Jentattheragāthā

111. “Duppabbajjaṃ ve duradhivāsā gehā, dhammo gambhīro duradhigamā bhogā;  
Kicchā vutti no itarītareneva, yuttaṃ cintetuṃ satatamaniccata”nti.

... Jento thero....

### 2. Vacchagottattheragāthā

112. “Tevijjohaṃ mahājhāyī, cetosamathakovido;  
Sadattho me anuppatto, kataṃ buddhassa sāsana”nti.

... Vacchagotto thero....

### 3. Vanavacchattheragāthā

113. “Acchodikā puthusilā, gonaṅgulamigāyutā;  
Ambusevālasañchannā, te selā ramayanti ma”nti.

... Vanavaccho thero....

### 4. Adhimuttattheragāthā

114. “Kāyaduṭṭhullagaruno, hiyyamānamhi [hīyamānamhi (sī.)] jīvite;  
Sarīrasukhagiddhassa, kuto samaṇasādhutā”ti.

... Adhimutto thero....

### 5. Mahānāmattheragāthā

115. “Esāvahiyyase pabbatena, bahukuṭajāsallakikena [sallakitena (sī.), sallarikena (syā.)];  
Nesādakena girinā, yasassinā paricchadenā”ti.

... Mahānāmo thero....

### 6. Pārāpariyattheragāthā

116. “Chaphassāyatane hitvā, guttadvāro susaṃvuto;  
Aghamūlaṃ vamtivāna, patto me āsavakkhaya”ti.

... Pārāpariyo [pārāsariyo (sī.), pārāmpariyo (ka.)] thero ....

### 7. Yasattheragāthā

117. “Suvilitto suvasano,sabbābharañabhūsito;  
Tisso vijjā ajjhagamim, kataṃ buddhassa sāsana’’nti.

... Yaso thero....

### 8. Kimilattheragāthā

118. “Abhisattova nipatati, vayo rūpaṃ aññamiva tatheva santam;  
Tasseva sato avippavasato, aññasseva sarāmi attāna’’nti.

... Kimilo [kimbilo (sī. syā.)] thero....

### 9. Vajjiputtattheragāthā

119. “Rukkhamūlagahanaṃ pasakkiya, nibbānaṃ hadayasmiṃ opiya;  
Jhāya gotama mā ca pamādo, kiṃ te biḷibīlikā karissatī’’ti.

... Vajjiputto thero....

### 10. Isidattattheragāthā

120. “Pañcakkhandhā pariññātā, tiṭṭhanti chinnamūlakā;  
Dukkakkhayo anuppatto,patto me āsavakkhayo’’ti.

... Isidatto thero....

Vaggo dvādasamo niṭṭhito.

Tassuddānaṃ –

Jento ca vacchagotto ca, vaccho ca vanasavhayo;  
Adhimutto mahānāmo, pārāpariyo yasopi ca;  
Kimilo vajjiputto ca, isidatto mahāyasoti.

Ekakanipāto niṭṭhito.

Tatruddānaṃ –

Vīsuttarasataṃ therā, katakiccā anāsavā;  
Ekakeva nipātamhi, susaṅgītā mahesibhīti.

## 2. Dukanipāto

### 1. Paṭhamavaggo

#### 1. Uttarattheragāthā

121. “Natthi koci bhavo nicco, saṅkhārā vāpi sassatā;

Uppajjanti ca te khandhā, cavanti aparāparam.

122. “Etamādīnaṃ ñatvā, bhavenamhi anattiko;  
Nissaṭṭo sabbakāmehi, patto me āsavakkhayo”’ti.

Itthaṃ sudaṃ āyasmā uttaro thero gāthāyo abhāsittāti.

## 2. Piṇḍolabhāradvājattheragāthā

123. “Nayidaṃ anayena jīvitaṃ, nāhāro hadayassa santiko;  
Āhāraṭṭhitiko samussayo, iti disvāna carāmi esanaṃ.
124. “Paṅkoti hi naṃ pavedayaṃ, yāyaṃ vandanapūjanā kulesu;  
Sukhumaṃ sallaṃ durubbahaṃ, sakkāro kāpurisena dujjaho”’ti.

Itthaṃ sudaṃ āyasmā piṇḍolabhāradvājo thero gāthāyo abhāsittāti.

## 3. Valliyattheragāthā

125. “Makkaṭṭo pañcadvārāyaṃ, kuṭikāyaṃ pasakkiya;  
Dvārena anupariyeti, ghaṭṭayanto muhuṃ muhuṃ.
126. “Tiṭṭha makkaṭṭa mā dhāvi, na hi te taṃ yathā pure;  
Niggahītosī paññāya, neva dūraṃ gamissatī”’ti.

... Valliyo thero....

## 4. Gaṅgātīriyattheragāthā

127. “Tiṇṇaṃ me tālapattānaṃ, gaṅgātīre kuṭī katā;  
Chavasītova me patto, paṃsukūlañca cīvaraṃ.
128. “Dvinnaṃ antaravassānaṃ, ekā vācā me bhāsītā;  
Tatiye antaravassamhi, tamokkhandho [tamokkhandho (sī. syā.)] padālito”’ti.

... Gaṅgātīriyo thero....

## 5. Ajinattheragāthā

129. “Api ce hoti tevijjo, maccuhāyī anāsavo;  
Appaññātoti naṃ bālā, avajānanti ajānatā.
130. “Yo ca kho annapānassa, lābhī hotīdha puggalo;  
Pāpadhammopi ce hoti, so nesam hoti sakkato”’ti.

... Ajino thero....

## 6. Meḷajinattheragāthā

131. “Yadāhaṃ dhammamassosiṃ, bhāsamānassa satthuno;  
Na kaṅkhamabhiḷānāmi, sabbaññūaparājite.

132. “Sathavāhe mahāvīre, sārathīnaṃ varuttame;  
Magge paṭipadāyaṃ vā, kaṅkhā mayhaṃ na vijjatī”ti.

... Meḷajino thero....

### 7. Rādhatheragāthā

133. [dha. pa. 13 dhammapade] “Yathā agāraṃ ducchannaṃ, vuṭṭhī samativijjhati;  
Evaṃ abhāvitaṃ cittaṃ, rāgo samativijjhati.

134. [dha. pa. 14 dhammapade] “Yathā agāraṃ succhannaṃ, vuḍḍhī na samativijjhati;  
Evaṃ subhāvitaṃ cittaṃ, rāgo na samativijjhati”ti.

... Rādho thero....

### 8. Surādhatheragāthā

135. “Khīṇā hi mayhaṃ jāti, vusitaṃ jīnasāsaṇaṃ;  
Pahīno jālasaṅkhāto, bhavanetti samūhatā.

136. “Yassatthāya pabbajito, agārasmānagāriyaṃ;  
So me attho anupatto, sabbasaṃyojanakkhayo”ti.

... Surādho thero....

### 9. Gotamattheragāthā

137. “Sukhaṃ supanti munayo, ye itthīsu na bajjhare;  
Sadā ve rakkhitabbāsu, yāsu saccaṃ sudullabhaṃ.

138. “Vadhaṃ carimha te kāma, anaṇā dāni te mayaṃ;  
Gacchāma dāni nibbānaṃ, yattha gantvā na socatī”ti.

... Gotamo thero....

### 10. Vasabhattheragāthā

139. “Pubbe hanati attānaṃ, pacchā hanati so pare;  
Suhataṃ hanti attānaṃ, vītaṃseneva pakkhimā.

140. “Na brāhmaṇo bahivaṇṇo, anto vaṇṇo hi brāhmaṇo;  
Yasmiṃ pāpāni kammāni, sa ve kaṇho sujampatī”ti.

... Vasabho thero....

Vaggo paṭhamo niṭṭhito.

Tassuddānaṃ –

Uttaro ceva piṇḍolo, valliyo tūriyo isi;  
Ajino ca meḷajino, rādho surādho gotamo;

Vasabhena ime honti, dasa therā mahiddhikāti.

## 2. Dutiyavaggo

### 1. Mahācundattheragāthā

141. “Sussūsā sutavaddhanī, sutam paññāya vaddhanaṃ;  
Paññāya atthaṃ jānāti, ñāto attho sukhāvaho.
142. “Sevetha pantāni senāsanāni, careyya saṃyojanavippamokkhaṃ;  
Sace ratiṃ nādhigaccheyya tattha, saṅghe vase rakkhitatto satimā”’ti.

... Mahācundo thero....

### 2. Jotidāsattheragāthā

143. “Ye kho te veṭhamissena [veghamissena (sī. syā.), ve gamissena, vekhamissena (ka.)],  
nānattena ca kammunā;  
Manusse uparundhanti, pharusūpakkamā janā;  
Tepi tattheva kīranti, na hi kammaṃ panassati.
144. “Yaṃ karoti naro kammaṃ, kalyāṇaṃ yadi pāpakaṃ;  
Tassa tasseva dāyādo, yaṃ yaṃ kammaṃ pakubbati”’ti.

... Jotidāso thero....

### 3. Heraññakānittheragāthā

145. “Accayanti ahorattā, jīvitam uparujjhati;  
Āyu khīyati maccānaṃ, kunnadīnaṃva odakaṃ.
146. “Atha pāpāni kammāni, karaṃ bālo na bujjhati;  
Pacchāssa kaṭukaṃ hoti, vipāko hissa pāpako”’ti.

... Heraññakānitthero....

### 4. Somamittattheragāthā

147. “Parittaṃ dārumāruyha, yathā sīde mahaṇṇave;  
Evaṃ kusītamāgamma, sādhuḥjīvīpi sīdati;  
Tasmā taṃ parivajjeyya, kusītaṃ hīnavīriyaṃ.
148. “Pavivittehi ariyehi, pahitattehi jhāyibhi;  
Niccaṃ āradhaviṛiyehi, paṇḍitehi sahāvase”’ti.

... Somamitto thero....

### 5. Sabbamittattheragāthā

149. “Jano janamhi sambaddho [sambaddho (syā. ka.)], janamevassito jano;  
Jano janena heṭhīyati, heṭheti ca [bodhiyati, bādheti ca (ka.)] jano janaṃ.

150. “Ko hi tassa janenattho, janena janitena vā;  
Janam ohāya gacchaṃ taṃ, heṭṭhayitvā [bādhayitvā (ka.)] bahum jana”nti.

... Sabbamitto thero....

### 6. Mahākālattheragāthā

151. “Kālī itthī brahatī dhaṅkarūpā, satthiṅca bhetvā aparāṅca satthiṃ;  
Bāhaṅca bhetvā aparāṅca bāhaṃ, sīsaṅca bhetvā dadhithālakamva;  
Esā nisinnā abhisandahitvā.
152. “Yo ve avidvā upadhiṃ karoti, punappunaṃ dukkhamupeti mando;  
Tasmā pajānaṃ upadhiṃ na kayirā, māhaṃ puna bhinnasiro sayissa”nti [passissanti (ka.).]

... Mahākālo thero....

### 7. Tissattheragāthā

153. “Bahū sapatte labhati, muṇḍo saṅghāṭipāruto;  
Lābhī annassa pānassa, vatthassa sayanassa ca.
154. “Etamādīnavaṃ ñatvā, sakkāresu mahabbhayaṃ;  
Appalābho anavassuto, sato bhikkhu paribbaje”ti.

... Tisso thero....

### 8. Kimilattheragāthā

155. “Pācīnavaṃsadāyamhi, sakyaputtā sahāyakā;  
Pahāyānappake bhoge, uñchāpattāgate ratā.
156. “Āraddhavīriyā pahitattā, niccaṃ daḷhaparakkamā;  
Ramanti dhammaratiyā, hitvāna lokiyaṃ rati”nti.

... Kimilo [kimbilo (sī. syā. pī.)] thero....

### 9. Nandattheragāthā

157. “Ayoniso manasikārā, maṇḍanaṃ anuyuñjisaṃ;  
Uddhato capalo cāsiṃ, kāmarāgena aṭṭito.
158. “Upāyakusalenāhaṃ, buddhenādiccabandhunā;  
Yoniso paṭipajjitvā, bhava cittaṃ udabbahi”nti.

... Nando thero....

### 10. Sirimattheragāthā

159. “Pare ca naṃ pasamsanti, attā ce asamāhito;  
Moghaṃ pare pasamsanti, attā hi asamāhito.



160. “Pare ca naṃ garahanti, attā ce susamāhito;  
Moghaṃ pare garahanti, attā hi susamāhito”ti.

... Sirimā thero....

Vaggo dutiyo niṭṭhito.

Tassuddānaṃ –

Cundo ca jotidāso ca, thero heraññakāni ca;  
Somamitto sabbamitto, kālo tisso ca kimilo [kimbilo (sī. syā. pī.), chandalakkhaṇānulomaṃ];  
Nando ca sirimā ceva, dasa therā mahiddhikāti.

### 3. Tatiyavaggo

#### 1. Uttarattheragāthā

161. “Khandhā mayā pariññātā, taṇhā me susamūhatā;  
Bhāvitā mama bojjhaṅgā, patto me āsavakkhayo.
162. “Sohaṃ khandhe pariññāya, abbahitvāna [abbuhitvāna (ka.)] jāliniṃ;  
Bhāvayitvāna bojjhaṅge, nibbāyissaṃ anāsavo”ti.

... Uttaro thero....

#### 2. Bhaddajittheragāthā

163. “Panādo nāma so rājā, yassa yūpo suvaṇṇayo;  
Tiriyaṃ soḷasubbedho [soḷasapabbedho (sī. aṭṭha.), soḷasabbāṇo (?)], ubbhamāhu [uddhamāhu (sī.), uccamāhu (syā.)] saḥassadhā.
164. “Sahassakaṇḍo satageṇḍu, dhajālu haritāmoyo;  
Anaccuṃ tattha gandhabbā, chasahassāni sattadhā”ti.

... Bhaddajitthero....

#### 3. Sobhitattheragāthā

165. “Satimā pañṇavā bhikkhu, āradhabalavīriyo;  
Pañca kappasatānāhaṃ, ekarattiṃ anussariṃ.
166. “Cattāro satipaṭṭhāne, satta aṭṭha ca bhāvayaṃ;  
Pañca kappasatānāhaṃ, ekarattiṃ anussari”nti.

... Sobhito thero....

#### 4. Valliyattheragāthā

167. “Yaṃ kiccaṃ dalhavīriyena, yaṃ kiccaṃ boddhumicchatā;  
Karissaṃ nāvarajjhissaṃ [nāvarujjhissaṃ (ka. sī. ka.)], passa vīriyaṃ parakkama.

168. “Tvañca me maggamakkhāhi, añjasaṃ amatogadhaṃ;  
Ahaṃ monena monissaṃ, gaṅgāsotova sāgara”’nti.

... Valliyo thero....

### 5. Vītasokattheragāthā

169. “Kese me olikhissanti, kappako upasaṅkama;  
Tato ādāsamādāya, sarīraṃ paccavekkhisāṃ.
170. “Tuccho kāyo adissittha, andhakāro tamo byagā;  
Sabbe colā samucchinnā, natthi dāni punabbhavo”’ti.

... Vītasoko thero....

### 6. Puṇṇamāsattheragāthā

171. “Pañca nīvaraṇe hitvā, yogakkhemassa pattiyā;  
Dhammādāsaṃ gahetvāna, ñāṇadassanamattano.
172. “Paccavekkhiṃ imaṃ kāyaṃ, sabbaṃ santarabāhiraṃ;  
Ajjhattañca bahiddhā ca, tuccho kāyo adissathā”’ti.

... Puṇṇamāso thero....

### 7. Nandakattheragāthā

173. “Yathāpi bhaddo ājañño, khalitvā patitiṭṭhati;  
Bhiyyo laddāna saṃvegaṃ, adīno vahate dhuraṃ.
174. “Evaṃ dassanasampannaṃ, sammāsambuddhasāvakaṃ;  
Ājānīyaṃ maṃ dhāretha, puttaṃ buddhassa orasa”’nti.

... Nandako thero....

### 8. Bharatattheragāthā

175. “Ehi nandaka gacchāma, upajjhāyassa santikaṃ;  
Sīhanādaṃ nadissāma, buddhaseṭṭhassa sammukhā.
176. “Yāya no anukampāya, amhe pabbājayī muni;  
So no attho anuppatto, sabbasaṃyojanakkhayo”’ti.

... Bharato thero....

### 9. Bhāradvājattheragāthā

177. “Nadanti evaṃ sappaññā, sīhāva girigabbhara;  
Vīrā vijitasaṅgāmā, jetvā māraṃ savāhaniṃ [[savāhanaṃ \(bahūsu\)](#)].
178. “Satthā ca pariciṅṅo me, dhammo saṅgho ca pūjito;

Ahañca vitto sumano, puttam disvā anāsava’’nti.

... Bhāradvājo thero....

### 10. Kaṇhadinnattheragāthā

179. ‘‘Upāsītā sappurisā, sutā dhammā abhiṅhaso;  
Sutvāna paṭipajjissam, añjasam amatogadham.
180. ‘‘Bhavarāgahatassa me sato, bhavarāgo puna me na vijjati;  
Na cāhu na ca me bhavissati, na ca me etarahi vijjati’’ti.

... Kaṇhadinno thero....

Vaggo tatiyo niṭṭhito.

Tassuddānam –

Uttaro bhaddajitthero, sobhito valliyo isi;  
Vītasoko ca yo thero, puṇṇamāso ca nandako;  
Bharato bhāradvājo ca, kaṇhadinno mahāmuniṭi.

### 4. Catutthavaggo

#### 1. Migasirattheragāthā

181. ‘‘Yato aham pabbajito, sammāsambuddhasāsane;  
Vimuccamāno uggacchim, kāmadhātuṃ upaccagam.
182. ‘‘Brahmuno pekkhamānassa, tato cittaṃ vimucci me;  
Akuppā me vimuttīti, sabbasamyojanakkhayā’’ti.

... Migasiro thero....

#### 2. Sivakattheragāthā

183. ‘‘Aniccāni gahakāni, tattha tattha punappunam;  
Gahakāram [gahakāram (sī. pī.)] gavesanto, dukkhā jāti punappunam.
184. ‘‘Gahakāraka diṭṭhosi, puna geham na kāhasi;  
Sabbā te phāsukā bhaggā, thūṇikā [thūṇirā (pī. ka.), dhuṇirā (syā.)] ca vidālītā [padālītā (sī. syā.)];  
Vimariyādikataṃ cittaṃ, idheva vidhamissatī’’ti.

... Sivako [sīvako (sī.)] thero....

#### 3. Upavāṇattheragāthā

185. ‘‘Araham sugato loke, vātehābādhitō [... bādhitō (ka.)] muni;  
Sace uṇhodakam atthi, munino dehi brāhmaṇa.

186. “Pūjito pūjaneyyānaṃ [pūjanīyānaṃ (sī.)], sakkareyyāna sakkato;  
Apacitopaceyyānaṃ [apacanīyānaṃ (sī.), apacineyyānaṃ (syā.)], tassa icchāmi hātave’’ti.

... Upavāṇo thero....

#### 4. Isidinnattheragāthā

187. “Diṭṭhā mayā dhammadharā upāsakā, kāmā aniccā iti bhāsamānā;  
Sārattarattā maṇikuṇḍalesu, puttesu dāresu ca te apekkhā.
188. “Addhā na jānanti yatodha dhammaṃ, kāmā aniccā iti cāpi āhu;  
Rāgañca tesam na balatthi chettuṃ, tasmā sitā puttadāraṃ dhanañcā’’ti.

... Isidinno thero....

#### 5. Sambulakaccānattheragāthā

189. “Devo ca vassati devo ca gaḷagaḷāyati,  
Ekako cāhaṃ bherave bile viharāmi;  
Tassa mayhaṃ ekakassa bherave bile viharato,  
Natthi bhayaṃ vā chambhitattaṃ vā lomahaṃso vā.
190. “Dhammatā mamasā yassa me, ekakassa bherave bile;  
Viharato natthi bhayaṃ vā, chambhitattaṃ vā lomahaṃso vā’’ti.

... Sambulakaccāno [sambahulakaccāno (ka.)] thero....

#### 6. Nitakattheragāthā

191. [udā. 34 udānepi] “Kassa selūpamaṃ cittaṃ, ṭhitaṃ nānupakampati;  
Virattaṃ rajanīyesu, kuppanīye na kuppati;  
Yassevaṃ bhāvitaṃ cittaṃ, kuto taṃ dukkhamessati.
192. “Mama selūpamaṃ cittaṃ, ṭhitaṃ nānupakampati;  
Virattaṃ rajanīyesu, kuppanīye na kuppati;  
Mamevaṃ bhāvitaṃ cittaṃ, kuto maṃ dukkhamessatī’’ti.

... Nitako [khitako (sī. syā.)] thero....

#### 7. Soṇapoṭṭiriyattheragāthā

193. “Na tāva supituṃ hoti, ratti nakkhattamālinī;  
Paṭijaggitumevesā, ratti hoti vijānatā.
194. “Hatthikkhandhāvapatitaṃ, kuñjaro ce anukkame;  
Saṅgāme me mataṃ seyyo, yañce jīve parājito’’ti.

... Soṇo poṭṭiriyō [selissariyo (sī.), poṭṭiriyaputto (syā.)] thero ....

#### 8. Nisabhattheragāthā

195. “Pañca kāmagaṇe hitvā, piyarūpe manorame;  
Saddhāya gharā nikkhamma, dukkhassantakaro bhava.

196. “Nābhinandāmi maraṇaṃ, nābhinandāmi jīvitamaṃ;  
Kālañca paṭikaṅkhāmi, sampajāno patissato”’ti.

... Nisabho thero....

### 9. Usabhattheragāthā

197. “Ambapallavasāṅkāsaṃ, aṃse katvāna cīvaraṃ;  
Nisanno hatthigīvāyaṃ, gāmaṃ piṇḍāya pāvisiṃ.

198. “Hatthikkhandhato oruyha, saṃvegaṃ alabhiṃ tadā;  
Sohaṃ ditto tadā santo, patto me āsavakkhayo”’ti.

... Usabho thero....

### 10. Kappaṭakurattheragāthā

199. “Ayamiti kappaṭo kappaṭakuro, acchāya atibharitāya [atibhariyāya (sī. ka.), accamaṃ bharāya (syā.)];  
Amataghaṭikāyaṃ dhammakaṭamatto [dhammakaṭapatto (syā. ka. aṭṭha.), dhammakaṭamaggo (sī. aṭṭha.)], katapadaṃ jhānāni ocetumaṃ.

200. “Mā kho tvaṃ kappaṭa pacālesi, mā tvaṃ upakaṇṇamhi tāḷessaṃ;  
Na hi [na vā (ka.)] tvaṃ kappaṭa mattamaññāsi, saṅghamajjhamhi pacalāyamānoti.

... Kappaṭakuro thero....

Vaggo catuttho niṭṭhito.

Tassuddānaṃ –

Migasiro sivako ca, upavāno ca paṇḍito;  
Isidinno ca kaccāno, nitako ca mahāvasī;  
Poṭṭiriyaputto nisabho, usabho kappaṭakuroti.

### 5. Pañcamavaggo

#### 1. Kumārakassapattheragāthā

201. “Aho buddhā aho dhammā, aho no satthu sampadā;  
Yattha etādisaṃ dhammaṃ, sāvako sacchikāhi”’ti.

202. “Asaṅkheyyesu kappesu, sakkāyādhigatā ahū;  
Tesamayaṃ pacchimako, carimoyaṃ samussayo;  
Jātimaraṇasaṃsāro, natthi dāni punabbhavo”’ti.

... Kumārakassapo thero....

## 2. Dhammapālattheragāthā

203. “Yo have daharo bhikkhu, yuñjati buddhasāsane;  
Jāgaro sa hi suttesu [patisuttesu (sī. ka.)], amoghaṃ tassa jīvitam.
204. “Tasmā saddhañca sīlañca, pasādaṃ dhammadassanaṃ;  
Anuyuñjetha medhāvī, saraṃ buddhāna sāsana’’nti.

... Dhammapālo thero....

## 3. Brahmālittheragāthā

205. “Kassindriyāni samathaṅgatāni, assā yathā sārathinā sudantā;  
Pahīnamānassa anāsavassa, devāpi kassa [tassa (bahūsu)] pihayanti tādino’’ti.
206. [dha. pa. 94 dhammapadepi] “Mayhindriyāni samathaṅgatāni, assā yathā sārathinā sudantā;  
Pahīnamānassa anāsavassa, devāpi mayhaṃ pihayanti tādino’’ti.

... Brahmāli thero....

## 4. Mogharājattheragāthā

207. “Chavipāpaka cittabhaddaka, mogharāja satataṃ samāhito;  
Hemantikasītakālarattiyo [hemantikakālarattiyo (ka.)], bhikkhu tvamsi kathaṃ karissasi’’.
208. “Sampannasassā magadhā, kevalā iti me sutam;  
Palālacchannako seyyam, yathaññe sukhajīvino’’ti.

... Mogharājā thero....

## 5. Visākhapañcālaputtattheragāthā

209. “Na ukkhipe no ca parikkhipe pare, okkhipe pāragataṃ na eraye;  
Na cattavaṇṇaṃ parisāsu byāhare, anuddhato sammitabhāni subbato.
210. “Susukhumanipuṇatthadassinā, matikusalena nivātavuttinā;  
Saṃsevitavuddhasīlinā, nibbānaṃ na hi tena dullabha’’nti.

... Visākho pañcālaputto thero ....

## 6. Cūlakattheragāthā

211. “Nadanti morā susikhā supekhuṇā, sunīlagīvā sumukhā sugajjino;  
Susaddalā cāpi mahāmahī ayaṃ, subyāpitambu suvalāhakaṃ nabhaṃ.
212. “Sukallarūpo sumanassa jhāyataṃ [jhāyitaṃ (syā. ka.)], sunikkamo sādhu subuddhasāsane;  
Susukkasukkaṃ nipuṇaṃ sududdasaṃ, plusāhi taṃ uttamamaccutaṃ pada’’nti.

... Cūlako [cūlako (sī. aṭṭha.)] thero....

## 7. Anūpamattheragāthā

213. “Nandamānāgataṃ cittaṃ, sūlamāropamānakaṃ;  
Tena teneva vajasi, yena sūlaṃ kaliṅgaraṃ.
214. “Tāhaṃ cittaḷaliṃ brūmi, taṃ brūmi cittadubbhakaṃ;  
Sattā te dullabho laddho, mānatthe maṃ niyojayī’”ti.

... Anūpamo thero....

### 8. Vajjitattheragāthā

215. “Saṃsaraṃ dīghamaddhānaṃ, gatīsu parivattisaṃ;  
Apassaṃ ariyasaccāni, andhabhūto [andhībhūto (ka.)] puthujjano.
216. “Tassa me appamattassa, saṃsārā vinaḷīkatā;  
Sabbā gatī samucchinnā, natthi dāni punabbhavo’”ti.

... Vajjito thero....

### 9. Sandhitattheragāthā

217. “Assatthe haritobhāse, saṃvirūḷhamhi pādape;  
Ekaṃ buddhagataṃ saññaṃ, alabhitthaṃ [alabhiṃ haṃ (ka.)] patissato.
218. “Ekatiṃse ito kappe, yaṃ saññaṃalabhiṃ tadā;  
Tassā saññaṃya vāhasā, patto me āsavakkhayo’”ti.

... Sandhito thero....

Vaggo pañcamaṃ niṭṭhito.

Tassuddānaṃ –

Kumārakassapo thero, dhammapālo ca brahmāli;  
Mogharājā visākho ca, cūḷako ca anūpamo;  
Vajjito sandhito thero, kilesarajavāhanoti.

Dukanipāto niṭṭhito.

Tatruddānaṃ –

Gāthādukanipātamhi, navuti ceva aṭṭha ca;  
Therā ekūnapaññaṃsaṃ, bhāsītā nayakovidāti.

## 3. Tikanipāto

### 1. Aṅgaṇikabhāradvājattheragāthā

219. “Ayoni suddhimanvesaṃ, aggaṃ paricariṃ vane;  
Suddhimaggaṃ ajānanto, akāsiṃ amaraṃ tapam [akāsiṃ aparaṃ tapam (syā.), akāsiṃ amataṃ tapam (ka.)].

220. “Taṃ sukkena sukhaṃ laddhaṃ, passa dhammasudhammataṃ;  
Tisso vijjā anuppattā, kataṃ buddhassa sāsaṇaṃ.
221. “Brahmabandhu pure āsiṃ, idāni khomhi brāhmaṇo;  
Tevijjo nhātaḥ [nahātaḥ (sī. aṭṭha.)] camhi, sottiyo camhi vedagū”ti.

... Aṅgaṇikabhāradvājo thero....

## 2. Paccayattheragāthā

222. “Pañcāhāhaṃ pabbajito, sekho appattamānaṃ,  
Vihāraṃ me pavitṭhassa, cetaso paṇidhī ahu.
223. “Nāsissaṃ na pivissāmi, vihārato na nikkhame;  
Napi passaṃ nipātessaṃ, taṇhāsalle anūhate.
224. “Tassa mevaṃ viharato, passa vīriyaparakkamaṃ;  
Tisso vijjā anuppattā, kataṃ buddhassa sāsaṇa”nti.

... Paccayo thero....

## 3. Bākulattheragāthā

225. “Yo pubbe karaṇīyāni, pacchā so kātumicchati;  
Sukhā so dhamṣate ṭhānā, pacchā ca manutappati.
226. “Yañhi kayirā tañhi vade, yaṃ na kayirā na taṃ vade;  
Akarontaṃ bhāsamānaṃ, pariṇanti paṇḍitā.
227. “Susukhaṃ vata nibbānaṃ, sammāsambuddhadesitaṃ;  
Asokaṃ virajaṃ khemaṃ, yattha dukkhaṃ nirujjhatī”ti.

... Bākulo [bākkulo (sī.)] thero....

## 4. Dhaniyattheragāthā

228. “Sukhaṃ ce jīvitum icche, sāmāññasmiṃ apekkhavā;  
Saṅghikaṃ nātimaññeyya, cīvaraṃ pānabhojanaṃ.
229. “Sukhaṃ ce jīvitum icche, sāmāññasmiṃ apekkhavā;  
Ahi mūsikasobbhaṃva, sevetha sayanāsaṇaṃ.
230. “Sukhaṃ ce jīvitum icche, sāmāññasmiṃ apekkhavā;  
Itarītarena tusseyya, ekadhammañca bhāvaye”ti.

... Dhaniyo thero....

## 5. Mātāṅgaputtattheragāthā

231. “Atisītaṃ atiuṇhaṃ, atisāyamidam ahu;  
Iti vissaṭṭhakammante, khaṇā accenti māṇave.



232. “Yo ca sītañca uṇhañca, tiṇā bhiyyo na maññati;  
Karaṃ purisakiccāni, so sukhā na vihāyati.
233. “Dabbaṃ kusaṃ poṭakilaṃ, usīraṃ muñjapabbajaṃ;  
Urasā panudissāmi, vivekamanubrūhaya”nti.

... Mātāṅgaputto thero....

### 6. Khujjasobhitattheragāthā

234. “Ye cittakathī bahussutā, samaṇā pāṭaliputtavāsino;  
Tesaññataroyamāyuvā, dvāre tiṭṭhati khujjasobhito.
235. “Ye cittakathī bahussutā, samaṇā pāṭaliputtavāsino;  
Tesaññataroyamāyuvā, dvāre tiṭṭhati māluterito.
236. “Suyuddhena suyitṭhena, saṅgāmajijayena ca;  
Brahmacariyānuciṇṇena, evāyaṃ sukhamedhatī”ti.

... Khujjasobhito thero....

### 7. Vāraṇattheragāthā

237. “Yodha koci manussesu, parapāṇāni hiṃsati;  
Asmā lokā paramhā ca, ubhayā dhamṣate naro.
238. “Yo ca mettena cittena, sabbapāṇānukampati;  
Bahuñhi so pasavati, puññaṃ tādisako naro.
239. “Subhāsitassa sikkhetha, samaṇūpāsanassa ca;  
Ekāsanassa ca raho, cittavūpasamassa cā”ti.

... Vāraṇo thero....

### 8. Vassikattheragāthā

240. “Ekopi saddho medhāvī, assaddhānīdha ñātināṃ;  
Dhammaṭṭho silasampanno, hoti atthāya bandhunaṃ.
241. “Niggayha anukampāya, coditā ñātayo mayā;  
Ñātibandhavapemena, kāraṃ katvāna bhikkhusu.
242. “Te abbatitā kālaṅkatā, pattā te tidivaṃ sukhaṃ;  
Bhātaro mayhaṃ mātā ca, modanti kāmakāmino”ti.

... Vassiko [passiko (sī. syā. pī.)] thero....

### 9. Yasojattheragāthā

243. “Kālapabbaṅgasāṅkāso, kiso dhamanisanthato;  
Mattaññū annapānamhi, adīnāmanaso naro”.

244. “Phuṭṭho ḍaṃsehi makasehi, araññasmiṃ brahāvane;  
Nāgo saṅgāmasīseva, sato tatrādhiṃvāsaye.

245. “Yathā brahmā tathā eko, yathā devo tathā duve;  
Yathā gāmo tathā tayo, kolāhalaṃ tatuttari”’nti.

... Yasojo thero....

### 10. Sāṭimattiyattheragāthā

246. “Ahu tuyhaṃ pure saddhā, sā te ajja na vijjati;  
Yaṃ tuyhaṃ tuyhamevetam, natthi duccharitam mama.

247. “Aniccā hi calā saddā, evaṃ diṭṭhā hi sā mayā;  
Rajjantipi virajjanti, tattha kiṃ jiyate muni.

248. “Paccati munino bhattam, thokaṃ thokaṃ kule kule;  
Piṇḍikāya carissāmi, atthi jaṅghabalaṃ [jaṅghābalaṃ (sī.)] mamā”’ti.

... Sāṭimattiyō thero....

### 11. Upālittheragāthā

249. “Saddhāya abhinikkhamma, navapabbajito navo;  
Mitte bhajeyya kalyāṇe, suddhājīve atandite.

250. “Saddhāya abhinikkhamma, navapabbajito navo;  
Saṅghasmiṃ viharaṃ bhikkhu, sikkhetha vinayaṃ budho.

251. “Saddhāya abhinikkhamma, navapabbajito navo;  
Kappākappesu kusalo, careyya apurakkhato”’ti.

... Upālitthero....

### 12. Uttarpālatheragāthā

252. “Paṇḍitaṃ vata maṃ santaṃ, alamattavicintakaṃ;  
Pañca kāmagaṇā loke, sammohā pātayiṃsu maṃ.

253. “Pakkhando māraṃvisaye, daḷhasallasamappito;  
Asakkhiṃ maccurājassa, ahaṃ pāsā pamuccitum.

254. “Sabbe kāmā pahīnā me, bhavā sabbe padālītā [vidālītā (sī. pī. aṭṭha.)];  
Vikkhīṇo jātiṃsaṃsāro, natthi dāni punabbhavo”’ti.

... Uttarpālo thero....

### 13. Abhibhūtatheragāthā

255. “Suṇātha nātayo sabbe, yāvantettha samāgatā;  
Dhammaṃ vo desayissāmi, dukkhā jāti punappaṇaṃ.

256. [sam. ni. 1.185] “Ārambhatha [ārabhatha (sī. syā.), ārabbhatha (ka.)] nikkamatha, yuñjatha buddhasāsane;  
Dhunātha maccuno senaṃ, naḷāgāraṃva kuñjaro.
257. “Yo imasmiṃ dhammavinaye, **appamatto** vihassati [vihessati (syā. pī.)];  
Pahāya jātisamsāraṃ, dukkhassantaṃ karissatī”ti.

... Abhibhūto thero....

#### 14. Gotamatheragāthā

258. “Samsaram hi nirayaṃ agacchissaṃ, petalokamagamaṃ punappunaṃ;  
Dukkhamamhipi tiracchānayaniyaṃ, nekadhā hi vusitaṃ ciraṃ mayā.
259. “Mānuso pi ca bhavobhirādhitō, saggakāyamaṃ sakim sakim;  
Rūpadhātusu arūpadhātusu, nevasaññisu asaññisuṭṭhitaṃ.
260. “Sambhavā suviditā asārakā, saṅkhatā pacalitā saderitā;  
Taṃ viditvā mahamattasambhavaṃ, santimeva satimā samajjhaga”nti.

... Gotamo thero....

#### 15. Hāritattheragāthā

261. “Yo pubbe karaṇīyāni, pacchā so kātumicchati;  
Sukhā so dhamṣate ṭhānā, pacchā ca manutappati.
262. “Yañhi kayirā tañhi vade, yaṃ na kayirā na taṃ vade;  
Akarontaṃ bhāsamānaṃ, pariḷānanti paṇḍitā.
263. “Susukhaṃ vata nibbānaṃ, sammāsambuddhadesitaṃ;  
Asokaṃ virajaṃ khemaṃ, yattha dukkhaṃ nirujjhatī”ti.

... Hārito thero....

#### 16. Vimalattheragāthā

264. “Pāpamitte vivajjetvā, bhajeyyuttamapuggalaṃ;  
Ovāde cassa tiṭṭheyya, patthento acalaṃ sukhaṃ.
265. “Parittaṃ dārumāruyha, yathā sīde mahaṇṇave;  
Evaṃ kusītamāgamma, sādhuḷvīpi sīdati;  
Tasmā taṃ parivajjeyya, kusītaṃ hīnavīriyaṃ.
266. “Pavivittehi ariyehi, pahitattehi jhāyibhi;  
Niccaṃ āraddhavīriyehi, paṇḍitehi sahāvase”ti.

... Vimalo thero....

Tikanipāto niṭṭhito.

Tatruddānaṃ –

Āṅgaṇiko bhāradvājo, paccayo bākulo isi;  
Dhaniyo mātaṅgaputto, sobhito vāraṇo isi.

Vassiko ca yasojo ca, sāṭimattiyupāli ca;  
Uttarapālo abhibhūto, gotamo hāritopi ca.

Thero tikanipātamhi, nibbāne vimalo kato;  
Aṭṭhatālīsa gāthāyo, therā soḷasa kittitāti.

## 4. Catukanipāto

### 1. Nāgasamālattheragāthā

267. “Alaṅkatā suvasanā, mālinī candanussadā;  
Majjhe mahāpathe nārī, turiye naccati naṭṭakī.
268. “Piṇḍikāya pavitṭhohaṃ, gacchanto naṃ udikkhisam;  
Alaṅkataṃ suvasanaṃ, maccupāsaṃva oḍḍitaṃ.
269. “Tato me manasīkāro, yoniso udapajjatha;  
Ādīnavo pāturahu, nibbidā samatiṭṭhatha [[sampatiṭṭhatha \(ka.\)](#)].
270. “Tato cittaṃ vimucci me, passa dhammasudhammataṃ;  
Tisso vijjā anuppattā, kataṃ buddhassa sāsana’nti.

... Nāgasamālo thero....

### 2. Bhaguttheragāthā

271. “Ahaṃ middhena pakato, vihārā upanikkhamiṃ;  
Caṅkamaṃ abhiruhanto, tattheva papatiṃ chamā.
272. “Gattāni parimajjivā, punapāruyha caṅkamaṃ;  
Caṅkame caṅkamaṃ sohaṃ, ajjhattaṃ susamāhito.
273. “Tato me manasīkāro, yoniso udapajjatha;  
Ādīnavo pāturahu, nibbidā samatiṭṭhatha.
274. “Tato cittaṃ vimucci me, passa dhammasudhammataṃ;  
Tisso vijjā anuppattā, kataṃ buddhassa sāsana’nti.

... Bhagutthero....

### 3. Sabhiyattheragāthā

275. [[dha. pa. 6 dhammapadepi](#)] “Pare ca na vijānanti, mayamettha yamāmase;  
Ye ca tattha vijānanti, tato sammanti medhagā.

276. “Yadā ca avijānantā, iriyantamarā viya;  
Vijānanti ca ye dhammaṃ, āturesu anāturā.
277. “Yaṃ kiñci sithilaṃ kammaṃ, saṃkiliṭṭhañca yaṃ vataṃ;  
Saṅkassaraṃ brahmacariyaṃ, na taṃ hoti mahapphalaṃ.
278. “Yassa sabrahmacārīsu, gāravo nūpalabbhati;  
Ārakā hoti saddhammā, nabhaṃ puthaviyā yathā”’ti.

... Sabhiyo thero....

#### 4. Nandakattheragāthā

279. “Dhiratthu pūre duggandhe, mārapakkhe avassute;  
Navasotāni te kāye, yāni sandanti sabbadā.
280. “Mā purāṇaṃ amaññittho, māsādesi tathāgate;  
Saggepi te na rajjanti, kimaṅgaṃ pana [kimaṅga pana (sī.)] mānuse.
281. “Ye ca kho bālā dummedhā, dummantī mohapārutā;  
Tādisā tattha rajjanti, mārakhittamhi bandhane.
282. “Yesaṃ rāgo ca doso ca, avijjā ca virājitā;  
Tādī tattha na rajjanti, chinnaṃ sutā abandhanā”’ti.

... Nandako thero....

#### 5. Jambukattheragāthā

283. “Pañcapaññāsavassāni, rajojallamadhārayiṃ;  
Bhuñjanto māsikaṃ bhattaṃ, kesamassuṃ alocayiṃ.
284. “Ekapādena aṭṭhāsīṃ, āsanaṃ parivajjayiṃ;  
Sukkhagūthāni ca khādiṃ, uddesañca na sādiyīṃ.
285. “Etādisaṃ karitvāna, bahuṃ duggatigāmināṃ;  
Vuyhamāno mahoghena, buddhaṃ saraṇamāgamaṃ.
286. “Saraṇagamanāṃ passa, passa dhammasudhammataṃ;  
Tisso vijjā anuppattā, kataṃ buddhassa sāsana”’nti.

... Jambuko thero....

#### 6. Senakattheragāthā

287. “Svāgataṃ vata me āsi, gayāyaṃ gayaphagguyā;  
Yaṃ addasāsiṃ sambuddhaṃ, desentaṃ dhammamuttamaṃ.
288. “Mahappabhaṃ gaṇācariyaṃ, aggapattaṃ vināyakaṃ;  
Sadevakassa lokassa, jinaṃ atuladassanaṃ.

289. “Mahānāgaṃ mahāvīraṃ, mahājutimanāsavaṃ;  
Sabbāsava-parikkhīṇaṃ, satthāramakutobhayaṃ.
290. “Cira-saṃkiliṭṭhaṃ vata maṃ, diṭṭhisandānabandhitaṃ [[sandhitaṃ \(sī. syā.\)](#)], [sanditaṃ \(pī. sī. aṭṭha.\)](#)];  
Vimocayi so bhagavā, sabbaganthehi senaka’’nti.

... Senako thero....

### 7. Sambhūtattheragāthā

291. “Yo dandhakāle tarati, taraṇīye ca dandhaye;  
Ayonī [[ayoniso \(syā.\)](#)] saṃvidhānena, bālo dukkhaṃ nigacchati.
292. “Tassatthā parihāyanti, kāḷapakkheva candimā;  
Āyasakyaṇca [[āyasasyaṇca \(sī.\)](#)] pappoti, mittehi ca virujjhati.
293. “Yo dandhakāle dandheti, taraṇīye ca tāraye;  
Yoniso saṃvidhānena, sukhaṃ pappoti paṇḍito.
294. “Tassatthā paripūrenti, sukkapakkheva candimā;  
Yaso kittiṇca pappoti, mittehi na virujjhatī’’ti.

... Sambhūto thero....

### 8. Rāhulattheragāthā

295. “Ubhayeneva sampanno, rāhulabhaddoti maṃ vidū;  
Yaṇcamhi putto buddhassa, yaṇca dhammesu cakkhumā.
296. “Yaṇca me āsavā khīṇā, yaṇca natthi punabbhavo;  
Arahā dakkhiṇeyyomhi, tevijjo amataddaso.
297. “Kāmandhā jālapacchannā, taṇhāchādanachādītā;  
Pamattabandhunā baddhā, macchāva kumināmukhe.
298. “Taṃ kāmaṃ ahamujjhitvā, chetvā mārassa bandhanaṃ;  
Samūlaṃ taṇhamabbuyha, sītībhūtosmi nibbuto’’ti.

... Rāhulo thero....

### 9. Candanattheragāthā

299. “Jātarūpena sañchannā [[pacchannā \(sī.\)](#)], dāsīgaṇapurakkhatā;  
Añkena puttamādāya, bhariyā maṃ upāgami.
300. “Taṇca disvāna āyantīṃ, sakaputtassa mātaraṃ;  
Alaṅkataṃ suvasanaṃ, maccupāsaṃva oḍḍitaṃ.
301. “Tato me manasīkāro, yoniso udapajjatha;  
Ādīnavo pāturahu, nibbidā samatiṭṭhatha.

302. “Tato cittaṃ vimucci me, **passa dhammasudhammatam;**  
Tisso vijjā anuppattā, kataṃ buddhassa sāsana’nti.

... Candano thero....

### 10. Dhammattheragāthā

303. [jā. 1.10.102 jātakepi] “Dhammo have rakkhati dhammacāriṃ, dhammo suciṇṇo  
sukhamāvahati;  
Esānisamso dhamme suciṇṇe, na duggatiṃ gacchati dhammacārī.
304. [jā. 1.15.385] “Nahi dhammo adhammo ca, ubho samavipākino;  
Adhammo nirayaṃ neti, dhammo pāpeti suggatiṃ.
305. “Tasmā hi dhammesu kareyya chandaṃ, iti modamāno sugatena tādina;  
Dhamme thitā sugatavarassa sāvaka, nīyanti dhīrā saraṇavaraggagāmino.
306. “Vipphoṭito gaṇḍamūlo, taṇhājālo samūhato;  
So khīṇasaṃsāro na catthi kiñcanaṃ,  
Cando yathā dosinā puṇṇamāsiya’nti.

... Dhammiko thero....

### 11. Sappakattheragāthā

307. “Yadā balākā sucipaṇḍaracchadā, kāḷassa meghassa bhayena tajjitā;  
Palehiti ālayamālayesinī, tadā nadī ajakaraṇī rameti maṃ.
308. “Yadā balākā suvisuddhapaṇḍarā, kāḷassa meghassa bhayena tajjitā;  
Pariyesati leṇamaleṇadassinī, tadā nadī ajakaraṇī rameti maṃ.
309. “Kaṃ nu tattha na ramenti, jambuyo ubhato tahim;  
Sobhenti āpagākūlaṃ, mama leṇassa [mahāleṇassa (syā. ka.)] pacchato.
310. “Tā matamadasaṅghasuppahīnā,  
Bhekā mandavatī panādayanti;  
‘Nājja girinadīhi vippavāsasamayo,  
Khemā ajakaraṇī sivā surammā’nti.

... Sappako thero....

### 12. Muditattheragāthā

311. “Pabbajim jīvikatthohaṃ, laddhāna upasampadam;  
Tato saddhaṃ paṭilabhim, dalhavīriyo parakkamim.
312. “Kāmaṃ bhijjatuyam kāyo, maṃsapesī visīyarum [visiyantu (ka.)];  
Ubho jaṇṇukasandhīhi, jaṅghāyo papatantu me.
313. “Nāsissam na pivissāmi, vihārā ca na nikkhame;  
Napi passam nipātesam, taṇhāsalle anūhate.

314. ‘‘Tassa mevaṃ viharato, passa vīriyaparakkamaṃ;  
Tisso vijjā anuppattā, kataṃ buddhassa sāsana’’nti.

... Mudīto thero....

Catukkanipāto niṭṭhito.

Tatruddānaṃ –

Nāgasamālo bhagu ca, sabhiyo nandakopi ca;  
Jambuko senako thero, sambhūto rāhulopi ca.

Bhavati candano thero, dasete [idāni naveva therā dissanti] buddhasāvaka;  
Dhammiko sappako thero, mudito cāpi te tayo;  
Gāthāyo dve ca paññāsa, therā sabbepi terasāti [idāni dvādaseva therā dissanti].

## 5. Pañcakanipāto

### 1. Rājadattatheragāthā

315. ‘‘Bhikkhu sivathikaṃ [sīvathikaṃ (sī. syā. pī.)] gantvā, addasa itthimujjhitam;  
Apariddham susānasmim, khajjantim kimihī phuṭam.
316. ‘‘Yañhi eke jigucchanti, mataṃ disvāna pāpakam;  
Kāmarāgo pāturahu, andhova savatī [vasatī (sī.)] ahum.
317. ‘‘Oraṃ odanapākamhā, tamhā ṭhānā apakkamim;  
Satimā sampajānoham, ekamantaṃ upāvisim.
318. ‘‘Tato me manasīkāro, yoniso udapajjatha;  
Ādīnavo pāturahu, nibbidā samatiṭṭhatha.
319. ‘‘Tato cittaṃ vimucci me, passa dhammasudhammataṃ;  
Tisso vijjā anuppattā, kataṃ buddhassa sāsana’’nti.

... Rājadatto thero....

### 2. Subhūtattheragāthā

320. ‘‘Ayoge yuñjamattānaṃ, puriso kiccamicchako [kiccamicchato (sī.), kiccamicchayam  
(katthaci)];  
Caram ce nādhigaccheyya, ‘taṃ me dubbhagalakkhaṇam’.
321. ‘‘Abbūlham aghagataṃ vijitaṃ, ekañce ossajeyya kalīva siyā;  
Sabbānīpi ce ossajeyya andhova siyā, samavisamassa adassanato.
322. ‘‘Yañhi kayirā tañhi vade, yaṃ na kayirā na taṃ vade;  
Akarontaṃ bhāsamānaṃ, parijānanti paṇḍitā.
323. [dha. pa. 51 dhammapadepi] ‘‘Yathāpi ruciraṃ pupphaṃ, vaṇṇavantaṃ agandhakaṃ;  
Evaṃ subhāsītā vācā, aphaḷā hoti akubbato.



324. [dha. pa. 52] “Yathāpi ruciraṃ pupphaṃ, vaṇṇavantaṃ sugandhakaṃ [sagandhakaṃ (sī. syā. pī.)];  
Evaṃ subhāsītā vācā, saphalā hoti kubbato”’ti [sakubbato (sī. pī.), sukubbato (syā.)].

... Subhūto thero....

### 3. Girimānandattheragāthā

325. “Vassati devo yathā sugītaṃ, channā me kuṭikā sukhā nivātā;  
Tassaṃ viharāmi vūpasanto, atha ce patthayasī pavassa deva.
326. “Vassati devo yathā sugītaṃ, channā me kuṭikā sukhā nivātā;  
Tassaṃ viharāmi santacitto, atha ce patthayasī pavassa deva.
327. “Vassati devo...pe... tassaṃ viharāmi vītarāgo...pe....  
328. “Vassati devo...pe... tassaṃ viharāmi vītadoso...pe....  
329. “Vassati devo...pe... tassaṃ viharāmi vītamoho;  
Atha ce patthayasī pavassa devā”’ti.

... Girimānando thero....

### 4. Sumanattheragāthā

330. “Yaṃ patthayāno dhammesu, upajjhāyo anuggahi;  
Amataṃ abhikaṅkhantaṃ, kataṃ kattabbaṃ mayā.
331. “Anuppatto sacchikato, sayāṃ dhammo anītiho;  
Visuddhiñāṇo nikkāṅkho, byākaromi tavantike.
332. “Pubbenivāsaṃ jānāmi, dibbacakkhu visodhitaṃ;  
Sadattho me anuppatto, kataṃ buddhassa sāsanaṃ.
333. “Appamattassa me sikkhā, sussutā tava sāsane;  
Sabbe me āsavā khīṇā, natthi dāni punabbhavo.
334. “Anusāsī maṃ ariyavatā, anukampi anuggahi;  
Amogho tuyhamovādo, antevāsimhi sikkhito”’ti.

... Sumano thero....

### 5. Vaḍḍhattheragāthā

335. “Sādhū hi kira me mātā, patodaṃ upadaṃsayi;  
Yassāhaṃ vacanaṃ sutvā, anusīṭṭho janettiyā;  
Āraddhavīriyo pahitatto, patto sambodhimuttamaṃ.
336. “Arahā dakkhiṇeyyomhi, tevijjo amataddaso;  
Jetvā namucino senaṃ, viharāmi anāsavo.
337. “Ajjhattañca bahiddhā ca, ye me vijjimsu āsavā;  
Sabbe asesā ucchinnā, na ca uppajjare puna.

338. “Visāradā kho bhaginī, etamatthaṃ abhāsaya;  
‘Apihā nūna mayipi, vanatho te na vijjati’.
339. “Pariyantakataṃ dukkhaṃ, antimoyaṃ samussayo;  
Jātimaraṇasaṃsāro, natthi dāni punabbhavo”ti.

... Vaḍḍho therō....

### 6. Nadīkassapattheragāthā

340. “Atthāya vata me buddho, nadiṃ nerañjaraṃ agā;  
Yassāhaṃ dhammaṃ sutvāna, micchādiṭṭhiṃ vivajjayiṃ.
341. “Yajiṃ uccāvace yaññe, aggihuttaṃ juhiṃ ahaṃ;  
‘Esā suddhī’ti maññanto, andhabhūto [andhībhūto (ka.)] puthujjano.
342. “Diṭṭhigahanapakkhando [pakkhanto (sī.), pakkhanno (syā. pī.)], parāmāsena mohito;  
Asuddhiṃ maññisaṃ suddhiṃ, andhabhūto aviddasu.
343. “Micchādiṭṭhi pahīnā me, bhavā sabbe padālita [vidālita (ka.)];  
Juhāmi dakkhiṇeyyaggiṃ, namassāmi tathāgataṃ.
344. “Mohā sabbe pahīnā me, bhavataṇhā padālita;  
Vikkhīṇo jātiṣaṃsāro, natthi dāni punabbhavo”ti.

... Nadīkassapo therō....

### 7. Gayākassapattheragāthā

345. “Pāto majjhanhikaṃ sāyaṃ, tikkhattuṃ divasassahaṃ;  
Otarīṃ udakaṃ sohaṃ, gayāya gayaphagguyā.
346. “‘Yaṃ mayā pakataṃ pāpaṃ, pubbe aññāsu jātisu;  
Taṃ dānīdha pavāhemi’, evaṃdiṭṭhi pure ahuṃ.
347. “Sutvā subhāsitaṃ vācaṃ, dhammatthasahitaṃ padaṃ;  
Tathaṃ yāthāvakaṃ atthaṃ, yoniso paccavekkhisāṃ;
348. “Ninhātasabbapāpomhi, nimmalo payato suci;  
Suddho suddhassa dāyādo, putto buddhassa oraso.
349. “Ogayhaṭṭhaṅgikaṃ sotaṃ, sabbapāpaṃ pavāhayiṃ;  
Tisso vijjā ajjhagamiṃ, kataṃ buddhassa sāsana’nti.

... Gayākassapo therō....

### 8. Vakkalitheragāthā

350. “Vātarogābhiniṭo tvaṃ, viharaṃ kānane vane;  
Paviṭṭhagocare lūkhe, kathaṃ bhikkhu karissasi.

351. “Pītisukhena vipulena, pharamāno samussayaṃ;  
Lūkhampi abhisambhonto, viharissāmi kānane.
352. “Bhāvento satipaṭṭhāne, indriyāni balāni ca;  
Bojjhaṅgāni ca bhāvento, viharissāmi kānane.
353. “Āraddhavīriye pahitatte, niccaṃ daḷhaparakkame [āraddhavīriyo pahitatto, niccaṃ  
daḷhaparakkamo (sī.)];  
Samagge sahite disvā, viharissāmi kānane.
354. “Anussaranto sambuddhaṃ, aggaṃ dantaṃ samāhitaṃ;  
Atandito rattindivaṃ, viharissāmi kānane”’ti.

... Vakkalittothero....

### 9. Vijitasenattheragāthā

355. “Olaggessāmi te citta, āṇidvāreva hatthinam;  
Na taṃ pāpe niyojessaṃ, kāmajāla [kāmajālaṃ (syā.)] sarīraja [sarīrajaṃ (syā. ka.)].
356. “Tvaṃ olaggo na gacchasi [na gañchisi (pī)], dvāravivaraṃ gajova alabhanto;  
Na ca cittakali punappunaṃ, pasakka [pasahaṃ (sī. syā. pī.)] pāparato carissasi.
357. “Yathā kuñjaraṃ adantaṃ, navaggahamaṅkusaggaho;  
Balavā āvatteti akāmaṃ, evaṃ āvattayissaṃ taṃ.
358. “Yathā varahayadamakusalo, sārathi pavaro dameti ājaññaṃ;  
Evaṃ damayissaṃ taṃ, patiṭṭhito pañcasu balesu.
359. “Satiyā taṃ nibandhissaṃ, payutto te damessāmi [payatatto vodapessāmi (sī.)];  
Vīriyadhuraniggahito, na yīto dūraṃ gamissase citta”’ti.

... Vijitaseno thero....

### 10. Yasadattattheragāthā

360. “Upārambhacitto dummedho, suṇāti jinasāsaṃ;  
Ārakā hoti saddhammā, nabhaso pathavī yathā.
361. “Upārambhacitto dummedho, suṇāti jinasāsaṃ;  
Parihāyati saddhammā, kāḷapakkeva candimā.
362. “Upārambhacitto dummedho, suṇāti jinasāsaṃ;  
Parisussati saddhamme, maccho appodake yathā.
363. “Upārambhacitto dummedho, suṇāti jinasāsaṃ;  
Na virūhati saddhamme, khette bījaṃva pūṭikaṃ.
364. “Yo ca tuṭṭhena cittena, suṇāti jinasāsaṃ;  
Khepetvā āsave sabbe, sacchikatvā akupataṃ;  
Pappuyya paramaṃ santiṃ, parinibbātināsavo”’ti.

... Yasadatto thero....

### 11. Soṇakuṭikaṇṇattheragāthā

365. “Upasampadā ca me laddhā, vimutto camhi anāsavo;  
So ca me bhagavā diṭṭho, vihāre ca sahāvasiṃ.
366. “Bahudeva rattiṃ bhagavā, abbhokāsetināmayi;  
Vihārakusalo sathā, vihāraṃ pāvisī tadā.
367. “Santharivāna saṅghāṭiṃ, seyyaṃ kappesi gotamo;  
Sīho selaguhāyaṃva, pahīnabhayabheravo.
368. “Tato kalyāṇavākkaraṇo, sammāsambuddhasāvako;  
Soṇo abhāsī saddhammaṃ, buddhaseṭṭhassa sammukhā.
369. “Pañcakkhandhe pariññāya, bhāvayitvāna añjasam;  
Pappuyya paramaṃ santiṃ, parinibbissatyanāsavo”’ti.

... Soṇo kuṭikaṇṇathero....

### 12. Kosiyattheragāthā

370. “Yo ve garūnaṃ vacanaññu dhīro, vase ca tamhi janayetha pemaṃ;  
So bhattimā nāma ca hoti paṇḍito, ñatvā ca dhammesu visesi assa.
371. “Yaṃ āpadā uppatitā uḷārā, nakkhambhayante paṭisaṅkhayantaṃ;  
So thānavā nāma ca hoti paṇḍito, ñatvā ca dhammesu visesi assa.
372. “Yo ve samuddova ṭhito anejo, gambhīrapañño nipuṇatthadassī;  
Asaṃhāriyo nāma ca hoti paṇḍito, ñatvā ca dhammesu visesi assa.
373. “Bahussuto dhammadharo ca hoti, dhammassa hoti anudhammacārī;  
So tādiso nāma ca hoti paṇḍito, ñatvā ca dhammesu visesi assa.
374. “Atthañca yo jānāti bhāsītassa, atthañca ñatvāna tathā karoti;  
Atthantaro nāma sa hoti paṇḍito, ñatvā ca dhammesu visesi assā”’ti.

... Kosiyothero....

Pañcakanipāto niṭṭhito.

Tatruddānaṃ –

Rājadatto subhūto ca, girimānandasumanā;  
Vaḍḍho ca kassapo thero, gayākassapavakkalī.

Vijito yasadatto ca, soṇo kosiyasavhayo;  
Saṭṭhi ca pañca gāthāyo, therā ca ettha dvādasāti.

## 6. Chakkanipāto

### 1. Uruveḷakassapattheragāthā

375. “Disvāna pāṭihīrāni, gotamassa yasassino;  
Na tāvāhaṃ paṇipatiṃ, issāmānena vañcīto.
376. “Mama saṅkappamaññāya, codesī naraśārathi;  
Tato me āsi saṃvego, abbhuto lomahaṃsano.
377. “Pubbe jaṭilabhūtassa, yā me siddhi parittikā;  
Tāhaṃ tadā nirākatvā [[niraṃkatvā \(syā. ka.\)](#)], pabbajīṃ jinasāsane.
378. “Pubbe yaññena santuṭṭho, kāmadhātupurakkhato;  
Pacchā rāgañca dosañca, mohañcāpi samūhaniṃ.
379. “Pubbenivāsaṃ jānāmi, dibbacakkhu visodhitam;  
Iddhimā paracittaññū, dibbasotañca pāpuṇiṃ.
380. “Yassa catthāya pabbajito, agārasmānagāriyaṃ;  
So me attho anuppatto, sabbasaṃyojanakkhayo”’ti.

... Uruveḷakassapo thero....

### 2. Tekicchakārittheragāthā

381. “Atihitā vīhi, khalagatā sālī;  
Na ca labhe piṇḍaṃ, kathamaṃ kassaṃ.
382. “Buddhamappameyyaṃ anussara pasanno;  
Pītiyā phuṭasarīro hohisi satatamudaggo.
383. “Dhammappameyyaṃ anussara pasanno;  
Pītiyā phuṭasarīro hohisi satatamudaggo.
384. “Saṅghamappameyyaṃ anussara pasanno;  
Pītiyā phuṭasarīro hohisi satatamudaggo.
385. “Abbhokāse viharasi, sītā hemantikā imā ratyo;  
Mā sītena pareto vihaññittho, pavisa tvaṃ vihāraṃ phusitaggaḷaṃ.
386. “Phusissaṃ catasso appamaññāyo, tāhi ca sukhito viharissaṃ;  
Nāhaṃ sītena vihaññissaṃ, aniñjito viharanto”’ti.

... Tekicchakārī [[tekicchakāni \(sī. syā. pī.\)](#)] thero....

### 3. Mahānāgattheragāthā

387. “Yassa sabrahmacārīsu, gāravo nūpalabbhati;  
Parihāyati saddhammā, maccho appodake yathā.

388. “Yassa sabrahmacārīsu, gāravo nūpalabbhati;  
Na virūhati saddhamme, khette bījaṃva pūtikam.
389. “Yassa sabrahmacārīsu, gāravo nūpalabbhati;  
Ārakā hoti nibbānā [nibbānā (sī.)], dhammarājassa sāsane.
390. “Yassa sabrahmacārīsu, gāravo upalabbhati;  
Na vihāyati saddhammā, maccho bavhodake [bahvodake (sī.), bahodake (syā.)] yathā.
391. “Yassa sabrahmacārīsu, gāravo upalabbhati;  
So virūhati saddhamme, khette bījaṃva bhaddakam.
392. “Yassa sabrahmacārīsu, gāravo upalabbhati;  
Santike hoti nibbānam [nibbānam (sī.)], dhammarājassa sāsane”’ti.

... Mahānāgo thero....

#### 4. Kullattheragāthā

393. “Kullo sivathikam gantvā, addasa itthimujjhitam;  
Apariddham susānasmim, khajjantim kimihī phuṭam.
394. “Āturam asucim pūtim, passa kulla samussayam;  
Uggharantam paggharantam, bālānam abhinanditam.
395. “Dhammādāsam gahetvāna, nāṇadassanapattiyā;  
Paccavekkhim imam kāyam, tuccham santarabāhiram.
396. “Yathā idam tathā etam, yathā etam tathā idam;  
Yathā adho tathā uddham, yathā uddham tathā adho.
397. “Yathā divā tathā rattim, yathā rattim tathā divā;  
Yathā pure tathā pacchā, yathā pacchā tathā pure.
398. “Pañcaṅgikena turiyena, na ratī hoti tādisī;  
Yathā ekaggacittassa, sammā dhammam vipassato”’ti.

... Kullo thero....

#### 5. Mālukyaputtattheragāthā

399. “Manujassa pamattacārino, taṇhā vaḍḍhati māluvā viya;  
So plavatī [plavati (sī. pī. ka.), pariplavati (syā.)] hurā huram, phalamicchamva vanasmi  
vānaro.
400. “Yam esā sahate [sahati (pī. ka.)] jammī, taṇhā loke visattikā;  
Sokā tassa pavaḍḍhanti, abhivaṭṭhamva [abhivaṭṭhamva (syā.), abhivaḍḍhamva (ka.)] bīraṇam.
401. “Yo cetam sahate [sahati (pī. ka.)] jammim, taṇham loke duraccayam;  
Sokā tamhā papatanti, udabindūva pokkharā.

402. “Taṃ vo vadāmi bhaddaṃ vo, yāvattettha samāgatā;  
Taṇhāya mūlaṃ khaṇatha, usīratthova bīraṇaṃ;  
Mā vo naḷaṃva sotova, māro bhañji punappunaṃ.
403. “Karotha buddhavacanaṃ, khaṇo vo mā upaccagā;  
Khaṇātītā hi socanti, nirayamhi samappitā.
404. “Pamādo rajo pamādo [sabbadā (sī. ka.), suttanipātaṭṭhakathāyaṃ uṭṭhānasuttavaṇṇanā oloketabbā], pamādānupatito rajo;  
Appamādena vijjāya, abbahe sallamattano’’ti.

... Mālukyaputto [māluṅkyaputto (sī. syā. pī.)] thero....

### 6. Sappadāsatheragāthā

405. “Paṇṇavīsativassāni, yato pabbajito ahaṃ;  
Accharāsaṅghātamattampi, cetosantimanajjhagaṃ.
406. “Aladdhā cittassekaggamaṃ, kāmarāgena aṭṭito [addito (syā. sī. aṭṭha.), aḍḍito (ka.)];  
Bāhā paggayha kandanto, vihārā upanikkhamiṃ [nūpanikkhamiṃ (sabbattha), dupanikkhamiṃ (?)].
407. “Sattaṃ vā āharissāmi, ko attho jīvitena me;  
Kathaṃ hi sikkhaṃ paccakkaṃ, kālaṃ kubbetha mādiso.
408. “Tadāhaṃ khuramādāya, mañcakamhi upāvisiṃ;  
Parinīto khuro āsi, dhamaniṃ chettumattano.
409. “Tato me manasīkāro, yoniso udapajjatha;  
Ādīnava pāturahu, nibbidā samatiṭṭhatha.
410. “Tato cittaṃ vimucci me, passa dhammasudhammataṃ;  
Tisso vijjā anuppattā, kataṃ buddhassa sāsana’’nti.

... Sappadāso thero....

### 7. Kātiyānattheragāthā

411. “Uṭṭhehi nisīda kātiyāna, mā niddābahulo ahu jāgarassu;  
Mā taṃ alasaṃ pamattabandhu, kūṭeneva jinātu maccurājā.
412. “Seyyathāpi [sayathāpi (sī. pī.)] mahāsamuddavego, evaṃ jātijarātivattate taṃ;  
So karohi sudīpamattano tvaṃ, na hi tāṇaṃ tava vijjateva aññaṃ.
413. “Sathā hi vijesi maggamaṃ, saṅgā jātijarābhayā atītaṃ;  
Pubbāpararattamappamatto, anuyuñjassu daḷhaṃ karohi yogaṃ.
414. “Purimāni pamañca bandhanāni, saṅghāṭikhuramuṇḍabhikkhabhojī;  
Mā khiḍḍaratiñca mā niddaṃ, anuyuñjittha jhāya kātiyāna.
415. “Jhāyāhi jināhi kātiyāna, yogakkhemapathesu kovidosi;

Pappuyya anuttaraṃ visuddhiṃ, parinibbāhisi vārināva joti.

416. “Pajjotakaro parittaraṃso, vātena vinamyate latāva;  
Evampi tuvaṃ anādiyāno, māraṃ indasagotta niddhunāhi;  
So vedayitāsu vītarāgo, kālaṃ kaṅkha idheva sītibhūto”ti.

... Kātiyāno thero....

### 8. Migajālattheragāthā

417. “Sudesito cakkhumatā, buddhenādiccabandhunā;  
Sabbasaṃyojanātīto, sabbavaṭṭavināsano.
418. “Nīyyāniko uttaraṇo, taṇhāmūlavisosano;  
Visamūlaṃ āghātaṃ, chetvā pāpeti nibbutiṃ.
419. “Aññānamūlabhedāya, kammayantavighāṭano;  
Viññāṇaṃ pariggahe, ñāṇavajiraniṭṭāno.
420. “Vedanānaṃ viññāpano, upādānappamocano;  
Bhavaṃ aṅgarakāsuṃva, ñāṇena anupassano [anupassako (sī. pī.)].
421. “Mahāraso sugambhīro, jarāmaccunivāraṇo;  
Ariyo aṭṭhaṅgiko maggo, dukkhūpasamano sivo.
422. “Kammaṃ kammanti ñatvāna, vipākaṅca vipākato;  
Paṭiccuppannadhammānaṃ, yathāvālokaḍḍhano;  
Mahākhemaṅgamo santo, pariyosānabhaddako”ti.

... Migajālo thero....

### 9. Purohitaputtajentattheragāthā

423. “Jātimadena mattohaṃ, bhogaissariyena ca;  
Saṅghānavāṇṇarūpena, madamatto acārihaṃ.
424. “Nāttano samakaṃ kaṅci, atirekaṃ ca maññisaṃ;  
Atimānahato bālo, patthaddho ussītaddhajo.
425. “Mātaraṃ pitaraṅcāpi, aññepi garusammate;  
Na kaṅci abhivādesiṃ, mānatthaddho anādamo.
426. “Disvā vināyakaṃ aggaṃ, sārathīnaṃ varuttamaṃ;  
Tapantamiva ādiccaṃ, bhikkhusaṅghapurakkhataṃ.
427. “Mānaṃ madaṅca chaḍḍetvā, vipassanena cetasaṃ;  
Sirasā abhivādesiṃ, sabbasattānamuttamaṃ.
428. “Atimāno ca omāno, pahīnā susamūhatā;  
Asmimāno samucchinnō, sabbe mānavidhā hatā”ti.



... Jento purohitaputto thero....

### 10. Sumanattheragāthā

429. “Yadā navo pabbajito, jātiyā sattavassiko;  
Iddhiyā abhibhotvāna, pannagindaṃ mahiddhikaṃ.
430. “Upajjhāyassa udakaṃ, anotattā mahāsarā;  
Āharāmi tato disvā, maṃ satthā etadabravi”.
431. “Sāriputta imaṃ passa, āgacchantaṃ kumārakaṃ;  
Udakakumbhamādāya, ajjhattaṃ susamāhitaṃ.
432. “Pāsādikena vattena, kalyāṇairiyāpatho;  
Sāmaṇeronuruddhassa, iddhiyā ca visārado.
433. “Ājānīyena ājañño, sādhunā sādhukārito;  
Vinīto anuruddhena, katakiccena sikkhito.
434. “So patvā paramaṃ santiṃ, sacchikatvā akuppatāṃ;  
Sāmaṇero sa sumano, mā maṃ jaññāti icchatī”ti.

... Sumano thero....

### 11. Nhātakamunittheragāthā

435. “Vātarogābhinīto tvamaṃ, viharaṃ kānane vane;  
Paviddhagocare lūkhe, kathaṃ bhikkhu karissasi”.
436. “Pītisukhena vipulena, pharivāna samussayaṃ;  
Lūkhampi abhisambhonto, viharissāmi kānane.
437. “Bhāvento satta bojjaṅge, indriyāni balāni ca;  
Jhānasokhummasampanno [jhānasukhumasampanno (syā. ka.)], viharissaṃ anāsavo.
438. “Vippamuttaṃ kilesehi, suddhacittaṃ anāvilāṃ;  
Abhiṇhaṃ paccavekkhanto, viharissaṃ anāsavo.
439. “Ajjhatañca bahiddhā ca, ye me vijjimsu āsavā;  
Sabbe asesā ucchinnā, na ca uppajjare puna.
440. “Pañcakkhandhā pariññātā, tiṭṭhanti chinnaṃulakā;  
Dukkakkhaya anuppatto, natthi dāni punabbhavo”ti.

... Nhātakamunitthero....

### 12. Brahmattattheragāthā

441. “Akkodhassa kuto kodho, dantassa samajīvino;  
Sammadaññā vimuttassa, upasantassa tādino.

442. “Tasseva tena pāpiyo, yo kuddhaṃ paṭikujjhati;  
Kuddhaṃ appaṭikujjhanto, saṅgāmaṃ jeti dujjayaṃ.
443. [sam. ni. 1.188, 250] “Ubhinnaṃ matthaṃ carati, attano ca parassa ca;  
Paraṃ saṅkupitaṃ ñatvā, yo sato upasammati.
444. [sam. ni. 1.188, 250] “Ubhinnaṃ tikicchantaṃ taṃ, attano ca parassa ca;  
Janā maññanti bāloti, ye dhammassa akovidā.
445. “Uppajje te sace kodho, āvajja kakacūpamaṃ;  
Uppajje ce rase taṇhā, puttamaṃsūpamaṃ sara.
446. “Sace dhāvati cittaṃ te, kāmesu ca bhavesu ca;  
Khippaṃ niggahaṃ satiyā, kiṭṭhādaṃ viya duppasu”nti;

... Brahmaddatto thero....

### 13. Sirimaṇḍattheragāthā

447. [udā. 45; cūlava. 385; pari. 339] “Channamativassati, vivaṭaṃ nātivassati;  
Tasmā channaṃ vivaretha, evaṃ taṃ nātivassati.
448. [sam. ni. 1.66; netti. 18] “Maccunābbhahato loko, jarāya parivārito;  
Taṇhāsallena otiṇṇo, icchādhūpāyito sadā.
449. “Maccunābbhahato loko, parikkhito jarāya ca;  
Haññati niccamaṭṭāṇo, pattadaṇḍova takkaro.
450. “Āgacchantaṃ gikhandhāva, maccu byādhi jarā tayo;  
Paccuggantaṃ balaṃ natthi, javo natthi palāyitaṃ.
451. “Amogaṃ divasaṃ kayirā, appena bahukena vā;  
Yaṃ yaṃ vijahate [virahate (sī. pī.), vivahate (syā.)] rattiṃ, tadūnaṃ tassa jīvitaṃ.
452. “Carato tiṭṭhato vāpi, āsīnasayanassa vā;  
Upeti carimā ratti, na te kālo pamajjitu”nti.

... Sirimaṇḍo [sirimando (sī.)] thero....

### 14. Sabbakāmittheragāthā

453. “Dvipādakoyaṃ asuci, duggandho parihīrati [pariharati (ka.)];  
Nānākuṇapaparipūro, vissavanto tato tato.
454. “Migaṃ nilīnaṃ kūṭena, baḷiseneva ambujaṃ;  
Vānaraṃ viya lepena, bādhayanti puthujjanaṃ.
455. “Rūpā saddā rasā gandhā, phoṭṭhabbā ca manoramā;  
Pañca kāmaguṇā ete, itthirūpasmi dissare.
456. “Ye etā upasevanti, rattacittā puthujjanā;

Vaḍḍhenti kaṭasiṃ ghoram, ācinanti punabbhavam.

457. “Yo cetā parivajjeti, sappasseva padā siro;  
Somaṃ visattikaṃ loke, sato samativattati.
458. “Kāmesvādīnavam disvā, nekkhammaṃ daṭṭhu khemato;  
Nissaṭo sabbakāmehi, patto me āsavakkhayo”’ti.

... Sabbakāmitthero....

Chakkanipāto niṭṭhito.

Tatruddānaṃ –

Uruveḷakassapo ca, thero tekicchakāri ca;  
Mahānāgo ca kullo ca, mālukyo [māluto (sī. ka.), māluṅkyo (syā.)] sappadāsako.

Kātiyāno migajālo, jento sumanasavhayo;  
Nhātamuni brahmadatto, sirimaṇḍo sabbakāmī ca;  
Gāthāyo caturāsīti, therā cetha catuddasāti.

## 7. Sattakanipāto

### 1. Sundarasamuddattheragāthā

459. “Alaṅkatā suvasanā, māladhārī [mālābhārī (sī.), mālābhārī (syā.)] vibhūsitā;  
Alattakakatāpādā, pādukāruyha vesikā.
460. “Pādukā oruhitvāna, purato pañjalīkatā;  
Sā maṃ saṅghena mudunā, mhitapubbaṃ [mihitapubbaṃ (sī.)] abhāsatha”’.
461. “Yuvāsi tvaṃ pabbajito, tiṭṭhāhi mama sāsane;  
Bhuñja mānusake kāme, ahaṃ vittaṃ dadāmi te;  
Saccaṃ te paṭijānāmi, aggim vā te harāmahaṃ.
462. “Yadā jīṇṇā bhavissāma, ubho daṇḍaparāyanā;  
Ubhopi pabbajissāma, ubhayattha kaṭaggaho”’.
463. “Tañca disvāna yācantim, vesikaṃ pañjalīkataṃ;  
Alaṅkataṃ suvasanaṃ, maccupāsaṃva oḍḍitaṃ.
464. “Tato me manasīkāro...pe... nibbidā samatiṭṭhatha.  
465. “Tato cittaṃ vimucci me...pe... kataṃ buddhassa sāsana”’nti.  
... Sundarasamuddo thero....

### 2. Lakuṇḍakabhaddiyattheragāthā

466. Pare ambātakārāme, vanasaṇḍamhi bhaddiyo;  
Samūlaṃ taṅhamabbuyha, tattha bhaddova jhāyati [bhaddo’dhijhāyāyati (sī.), bhaddo  
jhijhāyati (syā. sī. aṭṭha.)].

467. “Ramanteke mudīṅgehi [mutiṅgehi (sī. aṭṭha.)], vīṇāhi paṇavehi ca;  
Ahañca rukkhamūlasmiṃ, rato buddhassa sāsane.
468. “Buddho ce [buddho ca (sabbattha)] me varaṃ dajjā, so ca labbhettha me varo;  
Gaṇhehaṃ sabbalokassa, niccaṃ kāyagataṃ satīṃ.
469. “Ye maṃ rūpena pāmiṃsu, ye ca ghosena anvagū;  
Chandarāgavasūpetā, na maṃ jānanti te janā.
470. “Ajjhattaṅca na jānāti, bahiddhā ca na passati;  
Samantāvaraṇo bālo, sa ve ghosena vuyhati.
471. “Ajjhattaṅca na jānāti, bahiddhā ca vipassati;  
Bahiddhā phaladassāvī, sopi ghosena vuyhati.
472. “Ajjhattaṅca pajānāti, bahiddhā ca vipassati;  
Anāvaraṇadassāvī, na so ghosena vuyhati’”ti.

... Lakuṇḍakabhaddiyo thero....

### 3. Bhaddattheragāthā

473. “Ekaputto ahaṃ āsiṃ, piyo mātu piyo pitu;  
Bahūhi vatacariyāhi, laddho āyācanāhi ca.
474. “Te ca maṃ anukampāya, atthakāmā hitesino;  
Ubho pitā ca mātā ca, buddhassa upanāmayuṃ”.
475. “Kicchā laddho ayaṃ putto, sukhumālo sukhedhito;  
Imaṃ dadāma te nātha, jinassa paricāraṃ”.
476. “Sathā ca maṃ paṭiggayha, ānandaṃ etadabravi;  
‘Pabbājehi imaṃ khippaṃ, hessatyājāniyo ayaṃ.
477. “Pabbājetvāna maṃ sathā, vihāraṃ pāvisī jino;  
Anoggatasmīṃ sūriyasmīṃ, tato cittaṃ vimucci me.
478. “Tato sathā nirākatvā, paṭisallānavuṭṭhito;  
‘Ehi bhaddā’”ti maṃ āha, sā me āsūpasampadā.
479. “Jātiyā sattavassena, laddhā me upasampadā;  
Tisso vijjā anuppattā, aho dhammasudhammatā’”ti.

... Bhaddo thero....

### 4. Sopākattheragāthā

480. “Disvā pāsādachāyāyaṃ, caṅkamantaṃ naruttamaṃ;  
Tattha naṃ upasaṅkamma, vandissaṃ [vandiṣaṃ (sī. pī.)] purisuttamaṃ.
481. “Ekaṃsaṃ cīvaraṃ katvā, saṃharitvāna pāṇayo;

Anucaṅkamissaṃ virajaṃ, sabbasattānamuttamaṃ.

482. “Tato pañhe apucchi maṃ, pañhānaṃ kovido vidū;  
Acchambhī ca abhīto ca, byākāsiṃ satthuno ahaṃ.
483. “Vissajjitesu pañhesu, anumodi tathāgato;  
Bhikkhusaṅghaṃ viloketvā, imamatthaṃ abhāsatha”.
484. “Lābhā aṅgānaṃ magadhānaṃ, yesāyaṃ paribhuñjati;  
Cīvaraṃ piṇḍapātañca, paccayaṃ sayanāsaṇaṃ;  
Paccuṭṭhānañca sāmīciṃ, tesāṃ lābhā”’ti cābravi.
485. “Ajjatagge maṃ sopāka, dassanāyopasaṅkama;  
Esā ceva te sopāka, bhavatu upasampadā”.
486. “Jātiyā sattavassohaṃ, laddhāna upasampadaṃ;  
Dhāremi antimāṃ dehaṃ, aho dhammasudhammatā”’ti.

... Sopāko thero....

### 5. Sarabhaṅgaththeragāthā

487. “Sare hatthehi bhañjitvā, katvāna kuṭimacchisaṃ;  
Tena me sarabhaṅgoti, nāmaṃ sammutiyā ahu.
488. “Na mayhaṃ kappate ajja, sare hatthehi bhañjitum;  
Sikkhāpadā no paññattā, gotamena yasassinā.
489. “Sakalaṃ samattaṃ rogaṃ, sarabhaṅgo nāddasaṃ pubbe;  
Soyaṃ rogo diṭṭho, vacanakarenātidevassa.
490. “Yeneva maggena gato vipassī, yeneva maggena sikhī ca vessabhū;  
Kakusandhakoṇāgamano ca kassapo, tenañjasena agamāsi gotamo.
491. “Vītataṅhā anādānā, satta buddhā khayogadhā;  
Yehāyaṃ desito dhammo, dhammabhūtehi tādiḥhi.
492. “Cattāri ariyasaccāni, anukampāya pāṇinaṃ;  
Dukkhaṃ samudayo maggo, nirodho dukkhasaṅkhayo.
493. “Yasmiṃ nivattate [yasmim na nibbattate (ka.)] dukkhaṃ, saṃsārasmiṃ anantakaṃ;  
Bhedā imassa kāyassa, jīvitassa ca saṅkhayā;  
Añño punabbhavo natthi, suvimuttomhi sabbadhī”’ti.

... Sarabhaṅgo thero....

Sattakanipāto niṭṭhito.

Tatruddānaṃ –

Sundarasamuddo thero, thero lakaṇḍabhadhiyo;

Bhaddo thero ca sopāko, sarabhaṅgo mahāisi;  
Sattake pañcakā therā, gāthāyo pañcatimsatīti.

## 8. Aṭṭhakanipāto

### 1. Mahākaccāyanattheragāthā

494. “Kammaṃ bahukaṃ na kāraye, parivajjeyya janaṃ na uyyame;  
So ussukko rasānugiddho, atthaṃ riñcati yo sukhādhivāho.
495. “Paṅkoti hi naṃ avedayuṃ, yāyaṃ vandanaṃ pūjanā kulesu;  
Sukhumaṃ sallaṃ durubbaṃ, sakkāro kāpurisena dujjaho.
496. “Na parassupanidhāya, kammaṃ maccassa pāpakaṃ;  
Attanā taṃ na seveyya, kammabandhūhi mātiyā.
497. “Na pare vacanā coro, na pare vacanā muni;  
Attā ca naṃ yathāvedī [yathā vetti (sī.)], devāpi naṃ tathā vidū.
498. “Pare ca na vijānanti, mayamettha yamāmase;  
Ye ca tatha vijānanti, tato sammanti medhagā.
499. “Jīvate vāpi sappañño, api vittaparikkhaya;  
Paññāya ca alābhena [abhāvena (sī. aṭṭha.)], vittavāpi na jīvati.
500. “Sabbam suṇāti sotena, sabbam passati cakkhunā;  
Na ca diṭṭhaṃ sutam dhīro, sabbam ujhitumarahati.
501. “Cakkhumāssa yathā andho, sotavā badhiro yathā;  
Paññāvāssa yathā mūgo, balavā dubbaloriva;  
Atha atthe samuppanne, sayetha [passetha (ka.)] matasāyika’’nti.

... Mahākaccāyano thero....

### 2. Sirimittattheragāthā

502. “Akkodhanonupanāhī, amāyo rittapesuṇo;  
Sa ve tādisako bhikkhu, evaṃ pecca na socati.
503. “Akkodhanonupanāhī, amāyo rittapesuṇo;  
Guttadvāro sadā bhikkhu, evaṃ pecca na socati.
504. “Akkodhanonupanāhī, amāyo rittapesuṇo;  
Kalyāṇasīlo so [yo (syā.)] bhikkhu, evaṃ pecca na socati.
505. “Akkodhanonupanāhī, amāyo rittapesuṇo;  
Kalyāṇamitto so bhikkhu, evaṃ pecca na socati.
506. “Akkodhanonupanāhī, amāyo rittapesuṇo;  
Kalyāṇapañño so bhikkhu, evaṃ pecca na socati.

507. “Yassa saddhā tathāgate, acalā suppatiṭṭhitā;  
Sīlañca yassa kalyāṇaṃ, ariyakantaṃ pasamsitaṃ.
508. “Saṅghe pasādo yassatthi, ujubhūtañca dassanaṃ;  
‘Adaliddo’ti taṃ āhu, amoghaṃ tassa jīvitaṃ.
509. “Tasmā saddhañca sīlañca, pasādaṃ dhammadassanaṃ;  
Anuyuñjetha medhāvī, saraṃ buddhāna sāsana’nti.

... Sirimitto thero....

### 3. Mahāpanthakattheragāthā

510. “Yadā paṭhamamaddakkiṃ, satthāramakutobhayaṃ;  
Tato me ahu saṃvego, passivā purisuttamaṃ.
511. “Sirim hatthehi pādehi, yo paṇāmeyya āgataṃ;  
Etādisaṃ so satthāraṃ, ārādheta virādhaye.
512. “Tadāhaṃ puttadārañca, dhanadhaññañca chaḍḍayaṃ;  
Kesamassūni chedeta, pabbajim anagāriyaṃ.
513. “Sikkhāsājīvasampanno, indriyesu susaṃvuto;  
Namassamāno sambuddhaṃ, vihāsim aparājito.
514. “Tato me paṇidhī āsi, cetaso abhipatthito;  
Na nisīde muhuttampi, taṇhāsalle anūhate.
515. “Tassa mevaṃ viharato, passa vīriyaparakkamaṃ;  
Tisso vijjā anuppattā, kataṃ buddhassa sāsanaṃ.
516. “Pubbenivāsaṃ jānāmi, dibbacakkhu visodhitam;  
Arahā dakkhiṇeyyomhi, vippamutto nirūpadhi.
517. “Tato ratyā vivasāne [vivasane (sī. syā.)], sūriyassuggamaṃ pati;  
Sabbam taṇhaṃ visoseta, pallaṅkena upāvisi’nti.

... Mahāpanthako thero....

Aṭṭhakanipāto niṭṭhito.

Tatruddānaṃ –

Mahākaccāyano thero, sirimitto mahāpanthako;

Ete aṭṭhanipātamhi, gāthāyo catuvīsati.

## 9. Navakanipāto

### 1. Bhūtattheragāthā

518. “Yadā dukkhaṃ jarāmaṇanti paṇḍito, aviddasū yattha sitā puthujjanā;  
Dukkhaṃ pariññāya satova jhāyati, tato ratiṃ paramataraṃ na vindati.

519. “Yadā dukkhassāvahaniṃ visattikaṃ, papañcasaṅghātadukhādhivāhiniṃ;  
Taṇhaṃ pahantvāna satova jhāyati, tato ratiṃ paramataraṃ na vindati.
520. “Yadā sivaṃ dvecaturaṅgagāmiṇaṃ, magguttamaṃ sabbakilesasodhanaṃ;  
Paññāya passitva satova jhāyati, tato ratiṃ paramataraṃ na vindati.
521. “Yadā asokaṃ virajaṃ asaṅkhatam, santaṃ padaṃ sabbakilesasodhanaṃ;  
Bhāveti saññojanabandhanacchidaṃ, tato ratiṃ paramataraṃ na vindati.
522. “Yadā nabhe gajjati meghadundubhi, dhārākulā vihagapathe samantato;  
Bhikkhū ca pabbhāragatova jhāyati, tato ratiṃ paramataraṃ na vindati.
523. “Yadā nadīnaṃ kusumākulānaṃ, vicitta-vāneyya-vaṭaṃsakānaṃ;  
Tīre nisinna sumanova jhāyati, tato ratiṃ paramataraṃ na vindati.
524. “Yadā nisīthe rahitamhi kānane, deve gaḷantamhi nadanti dāḥino;  
Bhikkhū ca pabbhāragatova jhāyati, tato ratiṃ paramataraṃ na vindati.
525. “Yadā vitakke uparundhiyattano, nagantare nagavivaraṃ samassito;  
Vītaddaro vītakhilova jhāyati, tato ratiṃ paramataraṃ na vindati.
526. “Yadā sukhī malakhilasokanāsano, niraggaḷo nibbanatho visallo;  
Sabbāsave byantikato va jhāyati, tato ratiṃ paramataraṃ na vindati’”ti.

... Bhūto thero....

Navakanipāto niṭṭhito.

Tatruddānaṃ –

Bhūto tathaddaso thero, eko khaggavisāṇavā;  
Navakamhi nipātamhi, gāthāyopi imā navāti.

## 10. Dasakanipāto

### 1. Kāḷudāyittheragāthā

527. “Aṅgārino dāni dumā bhadante, phalesino chadanaṃ vippahāya;  
Te accimantova pabhāsayanti, samayo mahāvīra bhāgī rasānaṃ.
528. “Dumāni phullāni manoramāni, samantato sabbadisā pavanti;  
Pattaṃ pahāya phalamāsasānā [phalamāsamāno (ka.)], kālo ito pakkamanāya vīra.
529. “Nevātisītaṃ na panātiuṇhaṃ, sukhā utu addhaniyā bhadante;  
Passantu taṃ sākiyā koḷiyā ca, pacchāmukhaṃ rohiniyaṃ tarantaṃ.
530. “Āsāya kasate khettaṃ, bījaṃ āsāya vappati;  
Āsāya vāṇijā yanti, samuddaṃ dhanahārakā;  
Yāya āsāya tiṭṭhāmi, sā me āsā samijjhatu.
531. [saṃ. ni. 1.198] “Punappunaṃ ceva vapanti bījaṃ, punappunaṃ vassati devarājā;



Punappunaṃ khettaṃ kasanti kassakā, punappunaṃ dhaññaṃupeti raṭṭhaṃ.

532. [sam. ni. 1.198] “Punappunaṃ yācanakā caranti, punappunaṃ dānapatī dadanti;  
Punappunaṃ dānapatī daditvā, punappunaṃ saggamupenti ṭhānaṃ.
533. “Vīro have sattayugaṃ puneti, yasmaṃ kule jāyati bhūripaṇṇo;  
Maññaṃahaṃ sakkati devadevo, tayā hi jāto [tayābhijāto (sī.)] muni saccaṇāmo.
534. “Suddhodano nāma pitā mahesino, buddhassa mātā pana māyanāmā;  
Yā bodhisattaṃ parihariya kucchina, kāyassa bhedā tidivamhi modati.
535. “Sā gotamī kālakatā ito cutā, dibbehi kāmehi samaṅgibhūtā;  
Sā modati kāmaguṇehi pañcahi, parivāritā devagaṇehi tehi.
536. “Buddhassa puttomhi asayhasāhino, aṅgīrasassappaṭimassa tādino;  
Pitupitā mayhaṃ tuvaṃsi sakka, dhammena me gotama ayyakosī”’ti.

... Kāḷudāyī thero....

## 2. Ekavīhāriyattheragāthā

537. “Purato pacchato vāpi, aparō ce na vijjati;  
Atīva phāsu bhavati, ekassa vasato vane.
538. “Handa eko gamissāmi, araṇṇaṃ buddhavaṇṇitaṃ;  
Phāsu [phāsum (syā. pī.)] ekavīhārissa, pahitattassa bhikkhuno.
539. “Yogī-pītikaraṃ rammaṃ, mattakuṅjarasevitaṃ;  
Eko attavasī khippaṃ, pavississāmi kānanaṃ.
540. “Supupphite sītavane, sītale girikandare;  
Gattāni parisiñcitvā, caṅkamissāmi ekako.
541. “Ekākiyo adutiyo, ramaṇīye mahāvane;  
Kadāhaṃ viharissāmi, katakicco anāsavo.
542. “Evaṃ me kattukāmassa, adhippāyo samijjhatu;  
Sādhiyissāmaṃyeva, nāṇṇo aññaṃ kārako.
543. “Esa bandhāmi sannāhaṃ, pavississāmi kānanaṃ;  
Na tato nikkhamissāmi, appatto āsavakkhayaṃ.
544. “Mālute upavāyante, sīte surabhiḡandhike [gandhake (syā. pī. ka.)];  
Avijjaṃ dālayissāmi, nisinno nagamuddhani.
545. “Vane kusumasaṅgāne, pabbhāre nūna sītale;  
Vimuttisukhena sukhito, ramissāmi giribbaje.
546. “Sohaṃ paripuṇṇasaṅkappo, cando pannaraso yathā;  
Sabbāsavaparikkhīṇo, natthi dāni punabbhavo”’ti.

... Ekavihāriyo thero....

### 3. Mahākappinattheragāthā

547. “Anāgataṃ yo paṭikacca [paṭigacca (sī.)] passati, hitaṅca atthaṃ ahitaṅca taṃ dvayaṃ;  
Viddesino tassa hitesino vā, randhaṃ na passanti samekkhamānā.
548. [paṭi. ma. 1.160 paṭisambhidāmagge] “Ānāpānasatī yassa, paripuṇṇā subhāvitā;  
Anupubbaṃ paricitā, yathā buddhena desitā;  
Somaṃ lokaṃ pabhāseti, abbhā muttova candimā.
549. “Odātaṃ vata me cittaṃ, appamāṇaṃ subhāvitaṃ;  
Nibbidhaṃ paggaḥitaṅca, sabbā obhāsate disā.
550. “Jīvate vāpi sappaṇṇo, api vittaparikkhaya;  
Paṇṇāya ca alābhena, vittavāpi na jīvati.
551. “Paṇṇā sutavinicchīnī, paṇṇā kittisilokavaddhanī;  
Paṇṇāsahito naro idha, api dukkhesu sukhāni vindati.
552. “Nāyaṃ ajjatano dhammo, nacchero napi abbhuto;  
Yattha jāyetha mīyetha, tattha kiṃ viya abbhutaṃ.
553. “Anantaraṃ hi jātassa, jīvitā maraṇaṃ dhavaṃ;  
Jātā jātā marantīdha, evaṃdhammā hi pāṇino.
554. “Na hetadattāya matassa hoti, yaṃ jīvitatthaṃ paraporisānaṃ;  
Matamhi ruṇṇaṃ na yaso na lokaṃ, na vaṇṇitaṃ samaṇabrāhmaṇehi.
555. “Cakkhuṃ sarīraṃ upahanti tena [upahanti ruṇṇaṃ (sī.), upahanti roṇṇaṃ (syā. pī.)], nihīyati  
vaṇṇabalaṃ matī ca;  
Ānandīno tassa disā bhavanti, hitesino nāssa sukhī bhavanti.
556. “Tasmā hi iccheyya kule vasante, medhāvīno ceva bahussute ca;  
Yesaṃ hi paṇṇāvibhavana kiccaṃ, taranti nāvāya nadiṃva puṇṇa’nti.

... Mahākappino thero....

### 4. Cūḷapanthakatttheragāthā

557. “Dandhā mayhaṃ gatī āsi, paribhūto pure ahaṃ;  
Bhātā ca maṃ paṇāmesi, ‘gaccha dāni tuvaṃ gharaṃ’.
558. “Sohaṃ paṇāmito santo [bhātā (aṭṭha.)], saṅghārāmassa koṭṭhake;  
Dummano tattha aṭṭhāsīṃ, sāsanaṃ apekkaḥavā.
559. “Bhagavā tattha āgacchi [āgañchi (sī. pī.)], sīsaṃ mayhaṃ parāmasi;  
Bāhāya maṃ gahetvāna, saṅghārāmaṃ pavesayi.
560. “Anukampāya me satthā, pādāsi pādapuñchaniṃ;  
‘Etaṃ suddhaṃ adhiṭṭhehi, ekamantaṃ svadhiṭṭhitaṃ’.

561. “Tassāhaṃ vacanaṃ sutvā, vihāsiṃ sāsane rato;  
Samādhim paṭipādesiṃ, uttamatthassa pattiyā.
562. “Pubbenivāsaṃ jānāmi, dibbacakkhu visodhitam;  
Tisso vijjā anuppattā, kataṃ buddhassa sāsanaṃ.
563. “Sahassakkhattumattānaṃ, nimminivāna panthako;  
Nisīdambavane ramme, yāva kālappavedanā.
564. “Tato me satthā pāhesi, dūtaṃ kālappavedakaṃ;  
Paveditamhi kālamhi, vehāsādupasaṅkamiṃ [[vehāsānupasaṅkamiṃ \(syā. ka.\)](#)].
565. “Vanditvā satthuno pāde, ekamantaṃ nisīdahaṃ;  
Nisinnaṃ maṃ viditvāna, atha satthā paṭiggahi.
566. “Āyāgo sabbalokassa, āhutīnaṃ paṭiggaho;  
Puññakkhettaṃ manussānaṃ, paṭigaṇhittha dakkhiṇa’nti.

... Cūḷapanthako thero....

### 5. Kappattheragāthā

567. “Nānākulamalasaṃpuṇṇo, mahāukkārasambhavo;  
Candanikaṃva paripakkaṃ, mahāgaṇḍo mahāvaṇo.
568. “Pubbaruhiraṃsaṃpuṇṇo, gūthakūpena gāḷhito [[gūthakūpe nigāḷhito \(syā. pī. ka.\)](#)];  
Āpopaggharaṇo kāyo, sadā sandati pūtikaṃ.
569. “Saṭṭhikaṇḍarasambandho, maṃsalepanalepito;  
Cammakaṇcukasannaddho, pūtikāyo niratthako.
570. “Aṭṭhisāṅghātaghaṭṭito, nhārusuttanibandhano;  
Nekesaṃ saṃgatībhāvā, kappeti iriyāpathaṃ.
571. “Dhuvappayāto maraṇāya, maccurājassa santike;  
Idheva chaḍḍayitvāna, yena kāmaṅgamo naro.
572. “Avijjāya nivuto kāyo, catuganthena ganthito;  
Oghasaṃsīdano kāyo, anusayajālamotthato.
573. “Pañcanīvaraṇe yutto, vitakkena samappito;  
Taṇhāmūlenānugato, mohacchādanachādito.
574. “Evāyaṃ vattate kāyo, kammayantena yantito;  
Sampatti ca vipatyantā, nānābhāvo vipajjati.
575. “Yemaṃ kāyaṃ mamāyanti, andhabālā puthujjanā;  
Vaḍḍhenti kaṭasiṃ ghoram, ādiyanti punabbhavaṃ.
576. “Yemaṃ kāyaṃ vivajjenti, gūthalittaṃva pannagaṃ;  
Bhavamūlaṃ vāmitvāna, parinibbissantināsavā’nti [[parinibbantunāsavā \(sī.\)](#)].

... Kappo thero....

### 6. Vaṅgantaputtaupasenattheragāthā

577. “Vivittaṃ appanigghosaṃ, vālamiganisevitaṃ;  
Seve senāsaṇaṃ bhikkhu, paṭisallānakāraṇā.
578. “Saṅkārappuñjā āhatvā [āhitvā (ka.)], susānā rathiyāhi ca;  
Tato saṅghāṭikaṃ katvā, lūkhaṃ dhāreyya cīvaraṃ.
579. “Nīcaṃ manañ karitvāna, sapadānaṃ kulā kulañ;  
Piṇḍikāya care bhikkhu, guttadvāro susaṃvuto.
580. “Lūkhenapi vā [lūkhenapi ca (bahūsu)] santusse, nāññaṃ patthe rasaṃ bahuṃ;  
Rasesu anugiddhassa, jhāne na ramatī mano.
581. “Appiccho ceva santuṭṭho, pavivitto vase muni;  
Asaṃsaṭṭho gahaṭṭhehi, anāgārehi cūbhayaṃ.
582. “Yathā jaḷo va mūgo va, attānaṃ dassaye tathā;  
Nātiavelaṃ sambhāseyya, saṅghamañjhamhi paṇḍito.
583. “Na so upavade kañci, upaghātaṃ vivajjaye;  
Saṃvuto pātimokkhasmiṃ, mattaññū cassa bhojane.
584. “Suggahītanimitassa, cittassuppādakovido;  
Samaṃ anuyuñjeyya, kālena ca vipassanaṃ.
585. “Vīriyasātaccasampanno, yuttayogo sadā siyā;  
Na ca appatvā dukkhantaṃ, vissāsaṃ eyya paṇḍito.
586. “Evaṃ viharamānassa, suddhikāmassa bhikkhuno;  
Khīyanti āsavā sabbe, nibbutiñcādhiḡacchaṭī’ ti.

... Upaseno vaṅgantaputto thero....

### 7. (Apara)-gotamattheragāthā

587. “Vijāneyya sakaṃ atthaṃ, avalokeyyātha pāvacaṇaṃ;  
Yañcetha assa patirūpaṃ, sāmāññaṃ ajjhupagatassa.
588. “Mittaṃ idha ca kalyāṇaṃ, sikkhā vipulaṃ samādānaṃ;  
Sussūsā ca garūnaṃ, etaṃ samaṇassa patirūpaṃ.
589. “Buddhesu sagāravatā, dhamme apaciti yathābhūtaṃ;  
Saṅhe ca cittikāro, etaṃ samaṇassa patirūpaṃ.
590. “Ācāragocare yutto, ājīvo sodhito agārayho;  
Cittassa ca saṅghapaṇaṃ, etaṃ samaṇassa patirūpaṃ.
591. “Cārittaṃ atha vārittaṃ, iriyāpathiyaṃ pasādaniyaṃ;

Adhicitte ca āyogo, etaṃ samaṇassa patirūpaṃ.

592. “Āraññakāni senāsanāni, paṇṭāni appasaddāni;  
Bhajitabbāni muninā, etaṃ samaṇassa patirūpaṃ.
593. “Sīlañca bāhusaccañca, dhammānaṃ pavicayo yathābhūtaṃ;  
Saccānaṃ abhisamayo, etaṃ samaṇassa patirūpaṃ.
594. “Bhāveyya ca aniccanti, anattasaññaṃ asubhasaññañca;  
Lokamhi ca anabhiratiṃ, etaṃ samaṇassa patirūpaṃ.
595. “Bhāveyya ca bojjaṅge, iddhipādāni indriyāni balāni;  
Aṭṭhaṅgamaggamariyaṃ, etaṃ samaṇassa patirūpaṃ.
596. “Taṇhaṃ pajaheyya muni, samūlake āsave padāleyya;  
Vihareyya vip̐pamutto, etaṃ samaṇassa patirūpa’nti.

... Gotamo thero....

Dasakanipāto niṭṭhito.

Tatruddānaṃ –

Kāḷudāyī ca so thero, ekavihārī ca kappino;  
Cūḷapanthako kappo ca, upaseno ca gotamo;  
Sattime dasake therā, gāthāyo cettha sattatīti.

## 11. Ekādasanipāto

### 1. Saṃkiccattheragāthā

597. “Kiṃ tavattho vane tāta, ujjuhānova pāvuse;  
Verambhā ramaṇīyā te, paviveko hi jhāyinaṃ.
598. “Yathā abbhāni verambho, vāto nudati pāvuse;  
Saññā me abhikiranti, vivekapaṭisaññūtā.
599. “Apaṇḍaro aṇḍasambhavo, sīvathikāya nicketacāriko;  
Uppādayateva me satim, sandehasmim virāganissitaṃ.
600. “Yañca aññe na rakkhanti, yo ca aññe na rakkhati;  
Sa ve bhikkhu sukhaṃ seti, kāmesu anapekkhavā.
601. “Acchodikā puthusilā, gonaṅgulamigāyutā;  
Ambusevālasañchannā, te selā ramayanti maṃ.
602. “Vasitaṃ me araññesu, kandarāsu guhāsu ca;  
Senāsanesu pantesu, vāḷamiganisevite.
603. “‘Ime haññantu vajjhantu, dukkhaṃ pappontu pāṇino’;  
Saṅkappaṃ nābhijānāmi, anariyaṃ dosasaṃhitāṃ.

604. “Paricijño mayā sathā, kataṃ buddhassa sāsanaṃ;  
Ohito garuko bhāro, bhavanetti samūhatā.
605. “Yassa catthāya [[yassatthāya \(sī.\)](#)] pabbajito, agārasmānagāriyaṃ;  
So me attho anupatto, sabbasaṃyojanakkhayo.
606. “Nābhinandāmi maraṇaṃ, nābhinandāmi jīvitaṃ;  
Kālañca paṭikañkhāmi, nibbisaṃ bhatako yathā.
607. “Nābhinandāmi maraṇaṃ, nābhinandāmi jīvitaṃ;  
Kālañca paṭikañkhāmi, sampajāno patissato”’ti.

... Saṃkicco thero....

Ekādasanipāto niṭṭhito.

Tatruddānaṃ –

Saṃkiccathero ekova, katakicco anāsavo;  
Ekādasanipātamhi, gāthā ekādaseva cāti.

## 12. Dvādasakanipāto

### 1. Sīlavattheragāthā

608. “Sīlamevidha sikkhetha, asmiṃ loke susikkhitaṃ;  
Sīlaṃ hi sabbasampattiṃ, upanāmeti sevitaṃ.
609. “Sīlaṃ rakkheyya medhāvī, patthayāno tayo sukhe;  
Pasaṃsaṃ vittilābhañca, pecca sagge pamodanaṃ [[pecca sagge ca modanaṃ \(sī. pī.\)](#)].
610. “Sīlavā hi bahū mitte, saññamenādhiḡacchati;  
Dussīlo pana mittehi, dhaṃsate pāpamācaram.
611. “Avaṇṇaṇca akittiñca, dussīlo labhate naro;  
Vaṇṇaṃ kittiṃ pasaṃsañca, sadā labhati sīlavā.
612. “Ādi sīlaṃ patiṭṭhā ca, kalyāṇānañca mātukaṃ;  
Pamukhaṃ sabbadhammānaṃ, tasmā sīlaṃ visodhaye.
613. “Velā ca saṃvaram sīlaṃ [[saṃvaro sīlaṃ \(sī.\)](#), [saṃvarasīlaṃ \(sī. aṭṭha.\)](#)], cittassa  
abhihāsaṃ;  
Titthañca sabbabuddhānaṃ, tasmā sīlaṃ visodhaye.
614. “Sīlaṃ balaṃ appaṭimaṃ, sīlaṃ āvudhamuttamaṃ;  
Sīlamābharaṇaṃ seṭṭhaṃ, sīlaṃ kavacamabbhutaṃ.
615. “Sīlaṃ setu mahesakkho, sīlaṃ gandho anuttaro;  
Sīlaṃ vilepanaṃ seṭṭhaṃ, yena vāti disodisaṃ.
616. “Sīlaṃ sambalamevaggam, sīlaṃ pātheyyamuttamaṃ;

Sīlaṃ seṭṭho ativāho, yena yāti disodisaṃ.

617. “Idheva nindaṃ labhati, peccāpāye ca dummano;  
Sabbattha dummano bālo, sīlesu asamāhito.
618. “Idheva kittiṃ labhati, pecca sagge ca summano;  
Sabbattha sumano dhīro, sīlesu susamāhito.
619. “Sīlameva idha aggaṃ, paññavā pana uttamo;  
Manussesu ca devesu, sīlapaññāṇato jaya’’nti.

... Sīlavo thero....

## 2. Sunītattheragāthā

620. “Nīce kulamhi jātohaṃ, daliddo appabhojano;  
Hīnakammaṃ [hīnaṃ kammaṃ (syā.)] mamaṃ āsi, ahosiṃ pupphachaḍḍako.
621. “Jigucchito manussānaṃ, paribhūto ca vambhito;  
Nīcaṃ manaṃ karitvāna, vandissaṃ bahukaṃ janaṃ.
622. “Athaddasāsiṃ sambuddhaṃ, bhikkhusaṅghapurakkhataṃ;  
Pavisantaṃ mahāvīraṃ, magadhānaṃ puruttamaṃ.
623. “Nikkhipitvāna byābhaṅgiṃ, vandituṃ upasaṅkamaṃ;  
Mameva anukampāya, aṭṭhāsi purisuttamo.
624. “Vanditvā satthuno pāde, ekamantaṃ ṭhito tadā;  
Pabbajjaṃ ahamāyāciṃ, sabbasattānamuttamaṃ.
625. “Tato kāruṇiko satthā, sabbalokānukampako;  
‘Ehi bhikkhū’ti maṃ āha, sā me āsūpasampadā.
626. “Sohaṃ eko araṇṇasmiṃ, viharanto atandito;  
Akāsiṃ satthuvacanaṃ, yathā maṃ ovadī jino.
627. “Rattiyā paṭhamaṃ yāmaṃ, pubbajātimanussariṃ;  
Rattiyā majjhimaṃ yāmaṃ, dibbacakkhuṃ visodhayiṃ [dibbacakkhu visodhitaṃ (ka.)];  
Rattiyā pacchime yāme, tamokhandhaṃ padālayiṃ.
628. “Tato ratyā vivasāne, sūriyassuggamanaṃ pati;  
Indo brahmā ca āgantvā, maṃ namassimsu pañjalī.
629. “‘Namo te purisājañña, namo te purisuttama;  
Yassa te āsavā khīṇā, dakkhiṇeyyosi mārīsa’.
630. “Tato disvāna maṃ satthā, devasaṅghapurakkhataṃ;  
Sitāṃ pātukaritvāna, imamatthaṃ abhāsatha.
631. [su. ni. 660 suttanipātepi] “‘Tapena brahmacariyena, saṃyamena damena ca;  
Etena brāhmaṇo hoti, etaṃ brāhmaṇamuttama’’nti.

... Sunīto therō....

Dvādasakanipāto niṭṭhito.

Tatruddānaṃ –

Sīlavā ca sunīto ca, therā dve te mahiddhikā;  
Dvādasamhi nipātamhi, gāthāyo catuvīsati.

## 13. Terasanipāto

### 1. Soṇakoḷivisattheragāthā

632. “Yāhu raṭṭhe samukkaṭṭho, rañño aṅgassa paddhagū [patthagū (syā.), paṭṭhagū (ka.)];  
Svājja dhammesu ukkaṭṭho, soṇo dukkhassa pāragū.
633. “Pañca chinde pañca jahe, pañca cuttari bhāvaye;  
Pañcasāṅgātigo bhikkhu, oghatiṇṇoti vuccati.
634. “Unnaḷassa pamattassa, bāhirāsassa [bāhirāsayassa (ka.)] bhikkhuno;  
Sīlaṃ samādhi paññā ca, pāripūriṃ na gacchati.
635. “Yañhi kiccaṃ apaviddham [tadapaviddham (sī. syā.)], akiccaṃ pana karīyati;  
Unnaḷānaṃ pamattānaṃ, tesam vaḍḍhanti āsavā.
636. “Yesañca susamāraddhā, niccaṃ kāyagatā sati;  
Akiccaṃ te na sevanti, kicce sātaccakārino;  
Satānaṃ sampajānānaṃ, atthaṃ gacchanti āsavā.
637. “Ujumaggamhi akkhāte, gacchatha mā nivattatha;  
Attanā codayattānaṃ, nibbānamabhihāraye.
638. “Accāraddhamhi vīriyamhi, satthā loke anuttaro;  
Vīṇopamaṃ karitvā me, dhammaṃ desesi cakkhumā;  
Tassāhaṃ vacanaṃ sutvā, vihāsiṃ sāsane rato.
639. “Samathaṃ paṭipādesiṃ, uttamatthassa pattiyā;  
Tisso vijjā anuppattā, kataṃ buddhassa sāsanaṃ.
640. “Nekkhamme [nikkhame (ka.), nekkhammaṃ (mahāva. 244; a. ni. 6.55)] adhimuttassa,  
pavivekañca cetaso;  
Abyāpajjhādhimuttassa [abyāpajjhādhimhattassa (ka.)], upādānakkhayassa ca.
641. “Taṇhakkhayādhimuttassa, asammohañca cetaso;  
Disvā āyatanuppādaṃ, sammā cittaṃ vimuccati.
642. “Tassa sammā vimuttassa, santacittassa bhikkhuno;  
Katassa paṭicayo natthi, karaṇīyaṃ na vijjati.
643. “Selo yathā ekaghano [ekaghano (ka.)], vātena na samīrati;  
Evaṃ rūpā rasā saddā, gandhā phassā ca kevalā.



644. “Itthā dhammā aniṭṭhā ca, nappavedhenti tādino;  
Ṭhitam cittaṃ visaññuttam, vayañcassānupassatī”’ti.

... Soṇo koḷiviso thero....

Terasanipāto niṭṭhito.

Tatruddānaṃ –

Soṇo koḷiviso thero, ekoyeva mahiddhiko;  
Terasamhi nipātamhi, gāthāyo cettha terasāti.

## 14. Cuddasakanipāto

### 1. Khadiravaniyarevatattheragāthā

645. “Yadā ahaṃ pabbajito, agārasmānagāriyaṃ;  
Nābhijānāmi saṅkappaṃ, anariyaṃ dosasaṃhitam.
646. “‘Ime haññantu vajjhantu, dukkhaṃ pappontu pāṇino’;  
Saṅkappaṃ nābhijānāmi, imasmiṃ dīghamantare.
647. “Mettañca abhijānāmi, appamāṇaṃ subhāvitaṃ;  
Anupubbaṃ paricitaṃ, yathā buddhena desitaṃ.
648. “Sabbamitto sabbasakho, sabbabhūtānukampako;  
Mettacittañca [mettam cittaṃ (sī. syā.)] bhāvemi, abyāpajjarato [abyāpajjharato (sī. syā.)]  
sadā.
649. “Asaṃhīraṃ asaṃkappaṃ, cittaṃ āmodayāmaṃ;  
Brahmavihāraṃ bhāvemi, akāpurisasevitaṃ.
650. “Avitakkaṃ samāpanno, sammāsambuddhasāvako;  
Ariyena tuṅhībhāvena, upeto hoti tāvade.
651. “Yathāpi pabbato selo, acalo suppatiṭṭhito;  
Evaṃ mohakkhayā bhikkhu, pabbatova na vedhati.
652. “Anaṅgaṇassa posassa, niccaṃ sucigavesino;  
Vālaggamattaṃ pāpassa, abhhamattaṃva khāyati.
653. “Nagaraṃ yathā paccantaṃ, guttaṃ santarabāhiraṃ;  
Evaṃ gopetha attānaṃ, khaṇo vo mā upaccagā.
654. “Nābhinandāmi maraṇaṃ, nābhinandāmi jīvitaṃ;  
Kālañca paṭikāṅkhāmi, nibbisaṃ bhatako yathā.
655. “Nābhinandāmi maraṇaṃ...pe... sampajāno patissato.
656. “Paricīṇṇo mayā satthā, kataṃ buddhassa sāsanaṃ;  
Ohito garuko bhāro, bhavanetti samūhatā.

657. “Yassa catthāya pabbajito, agārasmānagāriyaṃ;  
So me attho anuppatto, sabbasaṃyojanakkhayo.
658. “Sampādethappamādena, esā me anusāsani;  
Handāhaṃ parinibbissaṃ, vippamuttomhi sabbadhī’”ti.

... Khadiravaniyarevato thero....

## 2. Godattattheragāthā

659. “Yathāpi bhaddo ājañño, dhure yutto dhurassaho [dhurāsaho (aṭṭha.)];  
Mathito atibhārena, saṃyugaṃ nātivattati.
660. “Evaṃ paññāya ye tittā, samuddo vārinā yathā;  
Na pare atimaññanti, ariyadhammova pāṇinaṃ.
661. “Kāle kālavasaṃ pattā, bhavābhavavasaṃ gatā;  
Narā dukkhaṃ nigacchanti, tedha socanti māṇavā [mānavā (sī.).]
662. “Unnatā sukhadhammena, dukkhadhammena conatā;  
Dvayena bālā haññanti, yathābhūtaṃ adassino.
663. “Ye ca dukkhe sukhasmiñca, majjhe sibbinimaccagū;  
Ṭhitā te indakhīlova, na te unnataonatā.
664. “Na heva lābhe nālābhe, na yase na ca kittiyā;  
Na nindāyaṃ pasaṃsāya, na te dukkhe sukhamhi.
665. “Sabbattha te na limpanti, udabinduva pokkhare;  
Sabbattha sukhitā dhīrā, sabbattha aparājītā.
666. “Dhammena ca alābho yo, yo ca lābho adhammiko;  
Alābho dhammiko seyyo, yaṃ ce lābho adhammiko.
667. “Yaso ca appabuddhīnaṃ, viññūnaṃ ayaso ca yo;  
Ayasova seyyo viññūnaṃ, na yaso appabuddhinaṃ.
668. “Dummedhehi pasaṃsā ca, viññūhi garahā ca yā;  
Garahāva seyyo viññūhi, yaṃ ce bālappasaṃsanā.
669. “Sukhañca kāmamayikaṃ, dukkhañca pavivekiyaṃ;  
Pavivekadukkhaṃ seyyo, yaṃ ce kāmamayaṃ sukhaṃ.
670. “Jīvitañca adhammena, dhammena maraṇaṃca yaṃ;  
Maraṇaṃ dhammikaṃ seyyo, yaṃ ce jīve adhammikaṃ.
671. “Kāmakopappahīnā ye, santacittā bhavābhave;  
Caranti loke asitā, natthi tesāṃ piyāpiyaṃ.
672. “Bhāvayitvāna bojjhaṅge, indriyāni balāni ca;  
Pappuyya paramaṃ santiṃ, parinibbantīnāsavā””ti.

... Godatto thero....

Cuddasakanipāto niṭṭhito.

Tatruddānaṃ –

Revato ceva godatto, therā dve te mahiddhikā;  
Cuddasamhi nipātamhi, gāthāyo aṭṭhavīsātīti.

## 15. Soḷasakanipāto

### 1. Aññāsikoṇḍaññattheragāthā

673. “Esa bhiyyo pasīdāmi, sutvā dhammaṃ mahārasaṃ;  
Virāgo desito dhammo, anupādāya sabbaso.
674. “Bahūni loke citrāni, asmiṃ pathavimaṇḍale;  
Mathenti maññe saṅkappaṃ, subhaṃ rāgūpasamhitam.
675. “Rajamuhatañca vātena, yathā meghopasammaye;  
Evaṃ sammanti saṅkappā, yadā paññāya passati.
676. [dha. pa. 277 dhammapade] “Sabbe saṅkhārā aniccāti, yadā paññāya passati;  
Atha nibbindati dukkhe, esa maggo visuddhiyā.
677. [dha. pa. 278 dhammapade] “Sabbe saṅkhārā dukkhāti, yadā paññāya passati  
Atha nibbindati dukkhe, esa maggo visuddhiyā.
678. [dha. pa. 279 dhammapade] “Sabbe dhammā anattāti, yadā paññāya passati;  
Atha nibbindati dukkhe, esa maggo visuddhiyā.
679. “Buddhānubuddho yo thero, koṇḍañño tibbanikkamo;  
Pahīnajātimaraṇo, brahmacariyassa kevalī.
680. “Oghapāso daḷhakhilo [daḷho khilo (syā. ka.)], pabbato duppadālayo;  
Chetvā khilañca pāsañca, selaṃ bhetvāna [chetvāna (ka.)] dubbhidaṃ;  
Tiṇṇo pāraṅgato jhāyī, mutto so mārabandhanā.
681. “Uddhato capalo bhikkhu, mitte āgamma pāpake;  
Saṃsīdati mahoghasmiṃ, ūmiyā paṭikujjito.
682. “Anuddhato acapalo, nipako saṃvutindriyo;  
Kalyāṇamitto medhāvī, dukkhassantakaro siyā.
683. “Kālapabbaṅgasaṅkāso, kiso dhamanisanthato;  
Mattaññū annapānasmim, adīnamaso naro.
684. “Phuṭṭho ḍaṃsehi makasehi, araññasmim brahāvane;  
Nāgo saṅgāmasīseva, sato tatrādhivāsaye.
685. “Nābhinandāmi maraṇaṃ...pe... nibbisam bhatako yathā.

686. “Nābhinandāmi maraṇaṃ...pe... sampajānāe patissato.  
 687. “Pariciṅṅo mayā satthā...pe... bhavanetti samūhatā.  
 688. “Yassa catthāya pabbajito, agārasmānagāriyaṃ;  
 So me attho anuppatto, kiṃ me saddhivihārinā”ti.

... Aññāsikoṇḍaṇṇo [aññākoṇḍaṇṇo (sī. syā.)] thero....

## 2. Udāyittheragāthā

689. [a. ni. 6.43] “Manussabhūtaṃ sambuddhaṃ, attadantaṃ samāhitaṃ;  
 Iriyamānaṃ brahmapathe, cittassūpasame rataṃ.
690. “Yaṃ manussā namassanti, sabbadhammāna pāraguṃ;  
 Devāpi taṃ namassanti, iti me arahato suttaṃ.
691. “Sabbasaṃyojanātītaṃ, vanā nibbanamāgataṃ;  
 Kāmehi nekkhammarataṃ [nikkhammarataṃ (ka.)], muttaṃ selāva kañcanaṃ.
692. “Sa ve accaruci nāgo, himavāvaññe siluccaye;  
 Sabbesaṃ nāganāmānaṃ, saccaṇāmo anuttaro.
693. “Nāgaṃ vo kittayissāmi, na hi āguṃ karoti so;  
 Soraccaṃ avihimsā ca, pādā nāgassa te duve.
694. “Sati ca sampajaññaṅca, caraṇā nāgassa tepare;  
 Saddhāhattho mahānāgo, upekkhāsetadantavā.
695. “Sati gīvā siro paññā, vīmaṃsā dhammacintanā;  
 Dhammakucchisamāvāso, viveko tassa vāladhi.
696. “So jhāyī assāsarato, ajjhattaṃ susamāhito;  
 Gacchaṃ samāhito nāgo, ṭhito nāgo samāhito.
697. “Sayāṃ samāhito nāgo, nisinnopi samāhito;  
 Sabbattha saṃvuto nāgo, esā nāgassa sampadā.
698. “Bhuñjati anavajjāni, sāvajjāni na bhuñjati;  
 Ghāsamacchādanaṃ laddhā, sannidhiṃ parivajjayāṃ.
699. “Saṃyojanaṃ aṇuṃ thūlaṃ, sabbaṃ chetvāna bandhanaṃ;  
 Yena yeneva gacchati, anapakkhova gacchati.
700. “Yathāpi uduke jātaṃ, puṇḍarīkaṃ pavaḍḍhati;  
 Nopalippati toyena, sucigandhaṃ manoramaṃ.
701. “Tattheva ca loke jāto, buddho loke viharati;  
 Nopalippati lokena, toyena padumaṃ yathā.
702. “Mahāgini pajjalito, anāhāropasammata;  
 Aṅgāresu ca santesu, nibbutoti pavuccati.
703. “Atthassāyaṃ viññāpanī, upamā viññūhi desitā;

Viññissanti mahānāgā, nāgaṃ nāgena desitaṃ.

704. “Vītarāgo vītadoso, vītamoho anāsavo;  
Sarīraṃ vijahaṃ nāgo, parinibbissatyanāsavo”’ti.

... Udāyī thero....

Soḷasakanipāto niṭṭhito.

Tatruddānaṃ –

Koṇḍañño ca udāyī ca, therā dve te mahiddhikā;  
Soḷasamhi nipātamhi, gāthāyo dve ca tiṃsa cāti.

## 16. Vīsatinipāto

### 1. Adhimuttattheragāthā

705. “Yaññatthaṃ vā dhanatthaṃ vā, ye hanāma mayaṃ pure;  
Avasesaṃ [avase taṃ (sī. aṭṭha. mūlapāṭho), avasesānaṃ (aṭṭha.?)] bhayaṃ hoti, vedhanti  
vilapanti ca.
706. “Tassa te natthi bhītattaṃ, bhiyyo vaṇṇo pasīdati;  
Kasmā na paridevesi, evarūpe mahabbhaye.
707. “Natthi cetasaṃ dukkhaṃ, anapekkhassa gāmaṇi;  
Atikkantā bhayā sabbe, khīṇasaṃyojanassa ve.
708. “Khīṇāya bhavanettiyā, diṭṭhe dhamme yathātathe;  
Na bhayaṃ maraṇe hoti, bhāranikkhepane yathā.
709. “Suciṇṇaṃ brahmacariyaṃ me, maggo cāpi subhāvito;  
Maraṇe me bhayaṃ natthi, rogānamiva saṅkhaye.
710. “Suciṇṇaṃ brahmacariyaṃ me, maggo cāpi subhāvito;  
Nirassādā bhavā diṭṭhā, visaṃ pitvāva [pītvāva (sī.)] chaḍḍitaṃ.
711. “Pāragū anupādāno, katakicco anāsavo;  
Tuṭṭho āyukkhayā hoti, mutto āghātanā yathā.
712. “Uttamaṃ dhammataṃ patto, sabbaloke anattiko;  
Ādittāva gharā mutto, maraṇasmiṃ na socati.
713. “Yadatthi saṅgataṃ kiñci, bhavo vā yattha labbhati;  
Sabbāṃ anissaraṃ etaṃ, iti vuttaṃ mahesinā.
714. “Yo taṃ tathā pajānāti, yathā buddhena desitaṃ;  
Na gaṇhāti bhavaṃ kiñci, sutattaṃva ayogaḷaṃ.
715. “Na me hoti ‘ahosi’nti, ‘bhavissa’nti na hoti me;  
Saṅkhārā vigamissanti, tattha kā paridevanā.

716. “Suddhaṃ dhammasamuppādaṃ, suddhaṃ saṅkhārasantaṭṭhiṃ;  
Passantassa yathābhūtaṃ, na bhayaṃ hoti gāmaṇi.
717. “Tiṇakaṭṭhasamaṃ lokaṃ, yadā paññāya passati;  
Mamaṭṭhaṃ so asaṃvindaṃ, ‘natthi me’ ti na socati.
718. “Ukkaṇṭhāmi sarīrena, bhavenamhi anattiko;  
Soyaṃ bhijjissati kāyo, añño ca na bhavissati.
719. “Yaṃ vo kiccaṃ sarīrena, taṃ karotha yadicchatha;  
Na me tappaccayā tatta, doso pemañca hehiti’.
720. Tassa taṃ vacanaṃ sutvā, abbhutaṃ lomahaṃsanaṃ;  
Sattāni nikkhipitvāna, māṇavā etadabravaṃ.
721. “Kiṃ bhadante karitvāna, ko vā ācariyo tava;  
Kassa sāsanaṃāgama, labbhate taṃ asokata’.
722. “Sabbaññū sabbadassāvī, jino ācariyo mama;  
Mahākāruṇiko sathā, sabbalokatikicchako.
723. “Tenāyaṃ desito dhammo, khayagāmī anuttaro;  
Tassa sāsanaṃāgama, labbhate taṃ asokata’.
724. Sutvāna corā isino subhāsitaṃ, nikkhippa sathāni ca āvudhāni ca;  
Tamaṃ ca kammā viramiṃsu eke, eke ca pabbajjamarocayimṃsu.
725. Te pabbajitvā sugatassa sāsane, bhāvetva bojjaṅgalāni paṇḍitā;  
Udagacittā sumanā katindriyā, phusiṃsu nibbānapadaṃ asaṅkhatanti.

...Adhimutto thero....

## 2. Pārāpariyattheragāthā

726. “Samaṇassa ahu cintā, pārāpariyassa bhikkhuno;  
Ekakassa nisinnassa, pavivittassa jhāyino.
727. “Kimānupubbaṃ puriso, kiṃ vataṃ kiṃ samācāraṃ;  
Attano kiccakārīssa, na ca kañci viheṭṭhaye.
728. “Indriyāni manussānaṃ, hitāya ahitāya ca;  
Arakkhitāni ahitāya, rakkhitāni hitāya ca.
729. “Indriyāneva sārakkhaṃ, indriyāni ca gopayaṃ;  
Attano kiccakārīssa, na ca kañci viheṭṭhaye.
730. “Cakkhundriyaṃ ce rūpesu, gacchantaṃ anivārayaṃ;  
Anādīnavadassāvī, so dukkhā na hi muccati.
731. “Sotindriyaṃ ce saddesu, gacchantaṃ anivārayaṃ;  
Anādīnavadassāvī, so dukkhā na hi muccati.

732. “Anissaraṇadassāvī, gandhe ce paṭisevati;  
Na so muccati dukkhamhā, gandhesu adhimucchito.
733. “Ambilaṃ madhuraggañca, tittakaggamanussaraṃ;  
Rasataṇhāya gadhito, hadayaṃ nāvabujjhati.
734. “Subhānyappaṭikūlāni, phoṭṭhabbāni anussaraṃ;  
Ratto rāgādhikaraṇaṃ, vividhaṃ vindate dukhaṃ.
735. “Maṇaṃ cetehi dhammehi, yo na sakkoti rakkhituṃ;  
Tato naṃ dukkhamanveti, sabbehetehi pañcahi.
736. “Pubbalohitasampunṇaṃ, bahussa kuṇapassa ca;  
Naravīrakataṃ vagguṃ, samuggamiva cittitaṃ.
737. “Kaṭukaṃ madhurassādaṃ, piyanibandhanaṃ dukhaṃ;  
Khuraṃva madhunā littāṃ, ullihaṃ nāvabujjhati.
738. “Itthirūpe itthisare, phoṭṭhabbepi ca itthiyā;  
Itthigandhesu sāratto, vividhaṃ vindate dukhaṃ.
739. “Itthisotāni sabbāni, sandanti pañca pañcasu;  
Tesamāvaraṇaṃ kātuṃ, yo sakkoti vīriyavā.
740. “So atthavā so dhammaṭṭho, so dakkho so vicakkhaṇo;  
Kareyya ramamānopi, kiccaṃ dhammatthasaṃhitāṃ.
741. “Atha sīdati saññuttaṃ, vāje kiccaṃ niratthakaṃ;  
‘Na taṃ kicca’nti maññitvā, appamatto vicakkhaṇo.
742. “Yañca atthena saññuttaṃ, yā ca dhammagatā rati;  
Taṃ samādāya vattetha, sā hi ve uttamā rati.
743. “Uccāvacehupāyehi, paresamabhijigīsati;  
Hantvā vadhitvā atha socayitvā, ālopati sāhasā yo paresaṃ.
744. “Tacchanta āṇiyā āṇiṃ, nihanti balavā yathā;  
Indriyānindriyeheva, nihanti kusalo tathā.
745. “Saddhaṃ vīriyaṃ samādhiñca, satipaññañca bhāvayaṃ;  
Pañca pañcahi hantvāna, anīgho yāti brāhmaṇo.
746. “So atthavā so dhammaṭṭho, katvā vākyānusāsaniṃ;  
Sabbena sabbāṃ buddhassa, so naro sukhamedhatī’ ti.

...Pārāpariyo thero....

### 3. Telakānittheragāthā

747. “Cīrattaṃ vatātāpī, dhammaṃ anuvicintayaṃ;  
Samaṃ cittassa nālatthaṃ, pucchaṃ samaṇabrāhmaṇe.

748. “Ko so pāraṅgato loke, ko patto amatogadham;  
Kassa dhammaṃ paṭicchāmi, paramatthavijānaṃ’.
749. “Antovaṅkagato āsi, macchova ghasamāmiṣaṃ;  
Baddho mahindapāseṇa, vepaciyasuro yathā.
750. “Añchāmi naṃ na muñcāmi, asmā sokapariddavā;  
Ko me bandhaṃ muñcaṃ loke, sambodhiṃ vedayissati.
751. “Samaṇaṃ brāhmaṇaṃ vā kaṃ, ādisantaṃ pabhaṅgunaṃ.  
Kassa dhammaṃ paṭicchāmi, jarāmaccupavāhanaṃ.
752. “Vicikicchākāṅkhāganthitaṃ, sārāmbhabalasaññutaṃ;  
Kodhappattamanatthaddhaṃ, abhijappappadāraṇaṃ.
753. “Taṅhādhanusamuṭṭhānaṃ, dve ca pannarasāyutaṃ [[dvedhāpannarasāyutaṃ \(?\)](#)];  
Passa orasikaṃ bālhaṃ, bhettvāna yadi [[yada \(sī. aṭṭha.\) hadi \(?\)](#)] “hadaye”ti taṃsaṃvaṇṇanā] tiṭṭhati.
754. “Anudīṭṭhīnaṃ appahānaṃ, saṅkappaparatejitaṃ;  
Tena viddho pavedhāmi, pattaṃva māluteritaṃ.
755. “Ajjhattaṃ me samuṭṭhāya, khippaṃ paccati māmakaṃ;  
Chaphassāyatanī kāyo, yattha sarati sabbadā.
756. “Taṃ na passāmi tekicchaṃ, yo metaṃ sallamuddhare;  
Nānārajena satthena [[nāraggena na satthena \(?\)](#)], nāñña vicikicchitaṃ.
757. “Ko me asattho avaṇo, sallamabbhantarapassayaṃ;  
Ahiṃsaṃ sabbagattāni, sallaṃ me uddharissati.
758. “Dhammappati hi so seṭṭho, visadosappavāhako;  
Gambhīre patitassa me, thalaṃ pāṇiṅca dassaye.
759. “Rahadehamasmi ogāḷho, ahāriyaramattike;  
Māyāusūyasārāmbha, thinamiddhamapatthate.
760. “Uddhaccameghathanitaṃ, saṃyojanavalāhakaṃ;  
Vāhā vahanti kuddiṭṭhiṃ [[duddiṭṭhiṃ \(sī. dha. pa. 339\)](#)], saṅkappā rāganissitā.
761. “Savanti sabbadhi sotā, latā ubbhijja tiṭṭhati;  
Te sote ko nivāreyya, taṃ lataṃ ko hi checchati.
762. “Velaṃ karoṭha bhaddante, sotānaṃ sannivāraṇaṃ;  
Mā te manomayo soto, rukkhaṃva sahasā luvē.
763. “Evaṃ me bhayajātassa, apārā pāramesato;  
Tāṇo paññāvudho satthā, isisaṅghanisevito.
764. “Sopāṇaṃ sugataṃ suddhaṃ, dhammasāramayaṃ daḷhaṃ;  
Pādāsī vuyhamānassa, ‘mā bhāyī’ti ca mabravi.



765. “Satipaṭṭhānapāsādaṃ, āruya paccavekkhisam;  
Yaṃ taṃ pubbe amaññissam, sakkāyābhirataṃ pajam.
766. “Yadā ca maggamaddakkhim, nāvāya abhirūhanam;  
Anadhiṭṭhāya attānam, titthamaddakkhimuttamam.
767. “Sallam attasamuṭṭhānam, bhavanettippabhāvitam;  
Etesam appavattāya [appavattiyā (?)], desesi maggamuttamam.
768. “Dīgharattānusayitam, cirarattamadhiṭṭhitam;  
Buddho mepānudī gantham, visadosappavāhano’’ti.

...Telakāni thero....

#### 4. Raṭṭhapālattheragāthā

769. [ma. ni. 2.302] “Passa cittakataṃ bimbam, arukāyaṃ samussitam;  
Āturaṃ bahusaṅkappaṃ, yassa natthi dhuvam ṭhiti.
770. “Passa cittakataṃ rūpaṃ, maṇinā kuṇḍalena ca;  
Aṭṭhim tacena onaddham, saha vatthehi sobhati.
771. “Alattakakatā pādā, mukham cuṇṇakamakkhitaṃ;  
Alaṃ bālassa mohāya, no ca pāragavesino.
772. “Aṭṭhapadakatā kesā, nettā añjanamakkhitaṃ;  
Alaṃ bālassa mohāya, no ca pāragavesino.
773. “Añjanīva navā citta, pūtikāyo alaṅkato;  
Alaṃ bālassa mohāya, no ca pāragavesino.
774. “Odahi migavo pāsam, nāsadā vāguraṃ migo;  
Bhutvā nivāpaṃ gacchāma, kandante migabandhake.
775. “Chinno pāso migavassa, nāsadā vāguraṃ migo;  
Bhutvā nivāpaṃ gacchāma, socante migaluddake.
776. “Passāmi loke sadhane manusse, laddhāna vittam na dadanti mohā;  
Luddhā dhanam sannicayaṃ karonti, bhiyyova kāme abhipatthayanti.
777. “Rājā pasayhappathaviṃ vijetvā, sasāgarantaṃ mahimāvasanto;  
Oraṃ samuddassa atittarūpo, pāraṃ samuddassapi patthayetha.
778. “Rājā ca aññe ca bahū manussā, avītataṇhā maraṇam upenti;  
Ūnāva hutvāna jahanti deham, kāmehi lokamhi na hatthi titti.
779. “Kandanti nam nātī pakiriya kese, aho vatā no amarāti cāhu;  
Vatthena nam pārutam nīharitvā, citam samodhāya tato ḍahanti.
780. “So ḍayhati sūlehi tujjamāno, ekena vatthena [etena gatthena (ka.)] pahāya bhoge;  
Na mīyamānassa bhavanti tāṇā, nātī ca mittā atha vā sahāyā.

781. “Dāyādakā tassa dhanam haranti, satto pana gacchati yena kammaṃ;  
Na mīyamānaṃ dhanamanveti [[manviti \(ka.\)](#)] kiñci, puttā ca dārā ca dhanañca raṭṭhaṃ.
782. “Na dīghamāyumuṃ labhate dhanena, na cāpi vittena jaraṃ vihanti;  
Appappaṃ hidaṃ jīvitamāhu dhīrā, asassataṃ vipariṇāmadhammaṃ.
783. “Aḍḍhā daliddā ca phusanti phassaṃ, bālo ca dhīro ca tatheva phuṭṭho;  
Bālo hi bālyā vadhitova seti, dhīro ca no vedhati phassaphuṭṭho.
784. “Tasmā hi paññāva dhanena seyyā, yāya vosānamidhādhigacchati;  
Abyositattā hi bhavābhavesu, pāpāni kammāni karoti mohā.
785. “Upeti gabbhañca parañca lokaṃ, saṃsāramāpajja paramparāya;  
Tassappapañño abhisaddahanto, upeti gabbhañca parañca lokaṃ.
786. “Coro yathā sandhimukhe gahīto, sakammunā haññati pāpadhammo;  
Evaṃ pajā pecca paramhi loke, sakammunā haññati pāpadhammo.
787. “Kāmā hi citrā madhurā manoramā, virūparūpena mathenti cittaṃ;  
Ādīnaṃ kāmagaṇesu disvā, tasmā ahaṃ pabbajitomi rāja.
788. “Dumapphalānīva patanti māṇavā, daharā ca vuḍḍhā ca sarīrabhedā;  
Etampi disvā pabbajitomi rāja, apaṇṇakaṃ sāmāññameva seyyo.
789. “Saddhāyāhaṃ pabbajito, upeto jinasāsane;  
Avajjhā mayhaṃ pabbajjā, anaṇo bhuñjāmi bhojanaṃ.
790. “Kāme ādittato disvā, jātarūpāni satthato;  
Gabbhavokkanto dukkhaṃ, nirayesu mahabbhayaṃ.
791. “Etamādīnaṃ ñatvā, saṃvegaṃ alabhiṃ tadā;  
Sohaṃ viddho tadā santo, sampatto āsavakkhayaṃ.
792. “Pariciṇṇo mayā satthā, kataṃ buddhassa sāsanaṃ;  
Ohito garuko bhāro, bhavanetti samūhatā.
793. “Yassatthāya pabbajito, agārasmānagāriyaṃ;  
So me attho anupatto, sabbasaṃyojanakkhayaṃ”ti.

... Raṭṭhapālo thero....

### 5. Mālukyaputtattheragāthā

794. [[saṃ. ni. 4.95](#)] “Rūpaṃ disvā sati muṭṭhā, piyaṃ nimittaṃ manasi karoto;  
Sārattacitto vedeti, tañca ajjhossa tiṭṭhati.
795. “Tassa vaḍḍhanti vedanā, anekā rūpasambhavā;  
Abhijjhā ca vihesā ca, cittaṃ assūpahaññati;  
Evamācinato dukkhaṃ, ārā nibbāna [[nibbānaṃ \(sī.\)](#)] vuccati.
796. “Saddaṃ sutvā sati muṭṭhā, piyaṃ nimittaṃ manasi karoto;  
Sārattacitto vedeti, tañca ajjhossa tiṭṭhati.

797. “Tassa vaḍḍhanti vedanā, anekā saddasambhavā;  
Abhijjhā ca vihesā ca, cittamassūpahaññati;  
Evamācinato dukkhaṃ, ārā nibbāna vuccati.
798. “Gandhaṃ ghatvā sati muṭṭhā, piyaṃ nimittaṃ manasi karoto;  
Sārattacitto vedeti, tañca ajjhossa tiṭṭhati.
799. “Tassa vaḍḍhanti vedanā, anekā gandhasambhavā;  
Abhijjhā ca vihesā ca, cittamassūpahaññati;  
Evamācinato dukkhaṃ, ārā nibbāna vuccati.
800. “Rasaṃ bhotvā sati muṭṭhā, piyaṃ nimittaṃ manasi karoto;  
Sārattacitto vedeti, tañca ajjhossa tiṭṭhati.
801. “Tassa vaḍḍhanti vedanā, anekā rasasambhavā;  
Abhijjhā ca vihesā ca, cittamassūpahaññati;  
Evamācinato dukkhaṃ, ārā nibbāna vuccati.
802. “Phassaṃ phussa sati muṭṭhā, piyaṃ nimittaṃ manasi karoto;  
Sārattacitto vedeti, tañca ajjhossa tiṭṭhati.
803. “Tassa vaḍḍhanti vedanā, anekā phassasambhavā;  
Abhijjhā ca vihesā ca, cittamassūpahaññati;  
Evamācinato dukkhaṃ, ārā nibbāna vuccati.
804. “Dhammaṃ ñatvā sati muṭṭhā, piyaṃ nimittaṃ manasi karoto;  
Sārattacitto vedeti, tañca ajjhossa tiṭṭhati.
805. “Tassa vaḍḍhanti vedanā, anekā dhammasambhavā;  
Abhijjhā ca vihesā ca, cittamassūpahaññati;  
Evamācinato dukkhaṃ, ārā nibbāna vuccati.
806. “Na so rajjati rūpesu, rūpaṃ disvā patissato;  
Virattacitto vedeti, tañca nājjhossa tiṭṭhati.
807. “Yathāssa passato rūpaṃ, sevato cāpi vedanaṃ;  
Khīyati nopacīyati, evaṃ so caratī sato;  
Evaṃ apacinato dukkhaṃ, santike nibbāna vuccati.
808. “Na so rajjati saddesu, saddaṃ sutvā patissato;  
Virattacitto vedeti, tañca nājjhossa tiṭṭhati.
809. “Yathāssa suṇato saddaṃ, sevato cāpi vedanaṃ;  
Khīyati nopacīyati, evaṃ so caratī sato;  
Evaṃ apacinato dukkhaṃ, santike nibbāna vuccati.
810. “Na so rajjati gandhesu, gandhaṃ ghatvā patissato;  
Virattacitto vedeti, tañca nājjhossa tiṭṭhati.
811. “Yathāssa ghāyato gandhaṃ, sevato cāpi vedanaṃ;  
Khīyati nopacīyati, evaṃ so caratī sato;  
Evaṃ apacinato dukkhaṃ, santike nibbāna vuccati.

812. “Na so rajjati rasesu, rasaṃ bhotvā patissato;  
Virattacitto vedeti, tañca nājjhossa tiṭṭhati.
813. “Yathāssa sāyarato rasaṃ, sevato cāpi vedanaṃ;  
Khīyati nopacīyati, evaṃ so caratī sato;  
Evaṃ apacinato dukkhaṃ, santike nibbāna vuccati.
814. “Na so rajjati phassesu, phassaṃ phussa patissato;  
Virattacitto vedeti, tañca nājjhossa tiṭṭhati.
815. “Yathāssa phusato phassaṃ, sevato cāpi vedanaṃ;  
Khīyati nopacīyati, evaṃ so caratī sato;  
Evaṃ apacinato dukkhaṃ, santike nibbāna vuccati.
816. “Na so rajjati dhammesu, dhammaṃ ñatvā patissato;  
Virattacitto vedeti, tañca nājjhossa tiṭṭhati.
817. “Yathāssa vijānato dhammaṃ, sevato cāpi vedanaṃ;  
Khīyati nopacīyati, evaṃ so caratī sato;  
Evaṃ apacinato dukkhaṃ, santike nibbāna vuccati”.

... Mālukyaputto thero....

## 6. Selattheragāthā

818. “Paripuṇṇakāyo suruci, sujāto cārudassano;  
Suvaṇṇavaṇṇosi bhagavā, susukkadāṭhosi vīriyavā [[susukkadāṭho virīyavā \(sī.\)](#)].
819. “Narassa hi sujātassa, ye bhavanti viyañjanā;  
Sabbe te tava kāyasmim, mahāpurisalakkhaṇā.
820. “Pasannanetto sumukho, brahā uju patāpavā;  
Majjhe samaṇasaṅghassa, ādiccova virocasi.
821. “Kalyāṇadassano bhikkhu, kañcanasannibhattaco;  
Kiṃ te samaṇabhāvena, evaṃ uttamavaṇṇino.
822. “Rājā arahasi bhavituṃ, cakkavattī rathesabho;  
Cāturanto vijitāvī, jambusaṇḍassa [[jambumaṇḍassa \(ka.\)](#)] issaro.
823. “Khattiyā bhogī rājāno [[bhogā rājāno \(sī. ka.\)](#)], bhojarājāno ([syā.](#)), anuyantā bhavanti te;  
Rājābhirājā [[rājādhirājā \(sī. ka.\)](#)] manujindo, rajjaṃ kārehi gotama”.
824. “Rājāhamasmi sela, (selāti bhagavā) dhammarājā anuttaro;  
Dhammena cakkaṃ vattemi, cakkaṃ appaṭivattiyam”.
825. “Sambuddho paṭijānāsi, (iti selo brāhmaṇo) dhammarājā anuttaro;  
‘Dhammena cakkaṃ vattemi’, iti bhāsatha gotama.
826. “Ko nu senāpati bhoto, sāvako sathuranvayo [[anvayo \(sī.\)](#)];  
Ko tetamanuvatteti, dhammacakkaṃ pavattitaṃ”.

827. “Mayā pavattitaṃ cakkamaṃ, (selāti bhagavā) dhammacakkamaṃ anuttaram; Sāriputto anuvatteti, anujāto tathāgataṃ.
828. “Abhiññeyyaṃ abhiññātaṃ, bhāvetabbañca bhāvitaṃ; Pahātabbaṃ pahīnaṃ me, tasmā buddhosmi brāhmaṇa.
829. “Vinayassu mayi kaṅkhaṃ, adhimuñcassu brāhmaṇa; Dullabhaṃ dassanaṃ hoti, sambuddhānaṃ abhiṇhaso.
830. “Yesaṃ ve dullabho loke, pātubhāvo abhiṇhaso; Sohaṃ brāhmaṇa buddhosmi, sallakatto [sallakanto (sī.)] anuttaro.
831. “Brahmabhūto atitulo, mārasenappamaddano; Sabbāmitte vase [vasī (syā. ka., ma. ni. 2.399; su. ni. 966)] katvā, modāmi akutobhayo’.
832. “Idaṃ bhonto nisāmetha, yathā bhāsati cakkhumā; Sallakatto mahāvīro, sīhova nadatī vane.
833. “Brahmabhūtaṃ atitulaṃ, mārasenappamaddanaṃ; Ko disvā nappasīdeyya, api kaṅhābhijātiko.
834. “Yo maṃ icchati anvetu, yo vā nicchati gacchatu; Idhāhaṃ pabbajissāmi, varapaññassa santike’.
835. “Etaṃ ce rucati bhoto, sammāsambuddhasāsaṇaṃ; Mayampi pabbajissāma, varapaññassa santike.
836. “Brāhmaṇā tisaṭā ime, yācanti pañjalikatā; ‘Brahmacariyaṃ carissāma, bhagavā tava santike’.
837. “Svākhātaṃ brahmacariyaṃ, (selāti bhagavā) sandiṭṭhikamakālikamaṃ; Yattha amoghā pabbajjā, appamattassa sikkhato’.
838. “Yaṃ taṃ saraṇamāgamha [saraṇamāgama (sabbattha)], ito aṭṭhame [aṭṭhami (syā. ka.)] cakkhuma; Sattarattena bhagavā, dantāma tava sāsane.
839. “Tuvaṃ buddho tuvaṃ satthā, tuvaṃ mārābhībhū muni; Tuvaṃ anusaye chetvā, tiṇṇo tāresimaṃ pajaṃ.
840. “Upadhī te samatikkantā, āsavā te padālītā; Sīhova anupādāno, pahīnabhayaabheravo.
841. “Bhikkhavo tisaṭā ime, tiṭṭhanti pañjalikatā; Pāde vīra pasārehi, nāgā vandantu satthuno’ti.

... Selo thero....

### 7. Kāligodhāputtabhaddiyattheragāthā

842. “Yātaṃ me hatthigīvāya, sukhumā vatthā padhāritā; Sālīnaṃ odano bhutto, sucimaṃsūpasecano.

843. “Sojja bhaddo sātatico, uñchāpattāgate rato;  
Jhāyati anupādāno, putto godhāya bhaddiyo.
844. “Pamsukūlī sātatico, uñchāpattāgate rato;  
Jhāyati anupādāno, putto godhāya bhaddiyo.
845. “Piṇḍapātī sātatico...pe....  
846. “Tecīvarī sātatico...pe....  
847. “Sapadānacārī sātatico...pe....  
848. “Ekāsanī sātatico...pe....  
849. “Pattapiṇḍī sātatico...pe....  
850. “Khalupacchābhattī sātatico...pe....  
851. “Ārañṇiko sātatico...pe....  
852. “Rukkhamūliko sātatico...pe....  
853. “Abbhokāsī sātatico...pe....  
854. “Sosāniko sātatico...pe....  
855. “Yathāsanthatiko sātatico...pe....  
856. “Nesajjiko sātatico...pe....  
857. “Appiccho sātatico...pe....  
858. “Santuṭṭho sātatico...pe....  
859. “Pavivitto sātatico...pe....  
860. “Asamsaṭṭho sātatico...pe....  
861. “Āraddhavīriyo sātatico...pe....  
862. “Hitvā satapalaṃ kaṃsaṃ, sovaṇṇaṃ satarājikaṃ;  
Aggaḥiṃ mattikāpattaṃ, idaṃ dutiyābhisecanaṃ.
863. “Ucce maṇḍalipākāre, daḥhamatṭālakoṭṭhake;  
Rakkhito khaggahatthehi, uttasāṃ viharim pure.
864. “Sojja bhaddo anutrāsī, pahīnabhayabheravo;  
Jhāyati vanamogayha, putto godhāya bhaddiyo.
865. “Sīlakkhandhe patiṭṭhāya, satim paññaṅca bhāvayaṃ;  
Pāpuṇim anupubbena, sabbasaṃyojanakkhaya’nti.

... Bhaddiyo kāḷigodhāya putto thero....

### 8. Aṅgulimālattheragāthā

866. “Gacchaṃ vadesi samaṇa ‘ṭṭhitomhi’, mamaṅca brūsi ṭṭhitamatṭhitoti;  
Pucchāmi taṃ samaṇa etamatthaṃ, ‘kathaṃ ṭṭhito tvaṃ ahamatṭhitomhi’”.
867. “Ṭṭhito ahaṃ aṅgulimāla sabbadā, sabbesu bhūtesu nidhāya daṇḍaṃ;  
Tuvaṅca pāṇesu asaṅṅatosi, tasmā ṭṭhitoḥaṃ tuvamatṭhitosi”.
868. “Cirassaṃ vata me mahito mahesī, mahāvanaṃ samaṇo paccapādi [paccupādi (sabbattha)];  
Sohaṃ cajissāmi saḥassapāpaṃ, sutvāna gāthaṃ tava dhammayuttaṃ”.
869. Icceva coro asimāvudhaṅca, sobbhe papāte narake anvakāsi [akiri (ma. ni. 2.349)];  
Avandi coro sugatassa pāde, tattheva pabbajjamayāci buddhaṃ.
870. Buddho ca kho kāruṇiko mahesi, yo satthā lokassa sadevakassa;  
‘Tamehi bhikkhū’ ti tadā avoca, eseva tassa ahu bhikkhubhāvo.

871. “Yo ca pubbe pamajjitvā, pacchā so nappamajjati;  
Somaṃ lokam pabhāseti, abbhā muttova candimā.
872. “Yassa pāpaṃ kataṃ kammaṃ, kusalena pidhīyati [pithīyati (sī. syā.)];  
Somaṃ lokam pabhāseti, abbhā muttova candimā.
873. “Yo have daharo bhikkhu, yuñjati buddhasāsane;  
Somaṃ lokam pabhāseti, abbhā muttova candimā.
874. [disā hi (syā. ka., ma. ni. 2.352)] “Disāpi me dhammakathaṃ suṇantu, disāpi me yuñjantu  
buddhasāsane;  
Disāpi me te manuje bhajantu, ye dhammamevādapayanti santo.
875. “Disā hi me khantivādānaṃ, avirodhappasamsinaṃ;  
Suṇantu dhammaṃ kālena, tañca anuvidhīyantu.
876. “Na hi jātu so mamaṃ hiṃse, aññaṃ vā pana kiñcanaṃ [kañcinaṃ (sī. syā.), kañcanaṃ (?)];  
Pappuyya paramaṃ santiṃ, rakkheyya tasathāvare.
877. [theragā. 19] “Udakañhi nayanti nettikā, usukārā namayanti [damayanti (ka.)] tejanaṃ;  
Dāruṃ namayanti [damayanti (ka.)] tacchakā, attānaṃ damayanti paṇḍitā.
878. “Daṇḍeneke damayanti, aṅkusebhi kasāhi ca;  
Adaṇḍena asatthena, ahaṃ dantomhi tādina.
879. ““Ahiṃsako’ti me nāmaṃ, hiṃsakassa pure sato;  
Ajjāhaṃ saccaṇāmomhi, na naṃ hiṃsāmi kiñcanaṃ [kañcinaṃ (sī. syā.), kañcanaṃ (?)].
880. “Coro ahaṃ pure āsiṃ, aṅgulimālotaṃ vissuto;  
Vuyhamāno mahoghena, buddhaṃ saraṇamāgamaṃ.
881. “Lohitapāṇi pure āsiṃ, aṅgulimālotaṃ vissuto;  
Saraṇagamaṇaṃ passa, bhavanetti samūhatā.
882. “Tādisaṃ kammaṃ katvāna, bahuṃ duggatigāminaṃ;  
Phuṭṭho kammavipākena, anaṇo bhuñjāmi bhojanaṃ.
883. “Pamādamanuyuñjanti, bālā dummedhino janā;  
Appamādañca medhāvī, dhaṇaṃ seṭṭhaṃva rakkhati.
884. “Mā pamādamanuyuñjetha, mā kāmaratisanthavaṃ [sandhavaṃ (ka.)];  
Appamatto hi jhāyanto, pappoti paramaṃ sukhaṃ.
885. “Svāgataṃ nāpagataṃ, netam dummantitaṃ mama;  
Savibhattesu dhammesu, yaṃ seṭṭhaṃ tadupāgamaṃ.
886. “Svāgataṃ nāpagataṃ, netam dummantitaṃ mama;  
Tisso vijjā anuppattā, kataṃ buddhassa sāsanaṃ.
887. “Araññe rukkhāmūle vā, pabbatesu guhāsu vā;  
Tattha tattheva aṭṭhāsiṃ, ubbiggamanaso tadā.

888. “Sukhaṃ sayāmi ṭhāyāmi, sukhaṃ kappemi jīvitam;  
Ahatthapāso mārassa, aho satthānukampito.
889. “Brahmajacco pure āsiṃ, udicco ubhato ahu;  
Sojja putto sugatassa, dhammarājassa satthuno.
890. “Vītataṇho anādāno, guttadvāro susaṃvuto;  
Aghamūlaṃ vadhitvāna, patto me āsavakkhayo.
891. “Pariciṇṇo mayā satthā, kataṃ buddhassa sāsanaṃ;  
Ohito garuko bhāro, bhavanetti samūhatā”’ti.

... Aṅgulimālo thero....

### 9. Anuruddhattheragāthā

892. “Pahāya mātāpitaro, bhaginī ñātibhātaro;  
Pañca kāmagaṇe hitvā, anuruddhova jhāyatu.
893. “Sameto naccagītehi, sammatāḷappabodhano;  
Na tena suddhimajjhagaṃ [suddhamajjhagā (sī. ka.), suddhimajjhagamā (syā.)], mārassa  
visaye rato.
894. “Etañca samatikkamma, rato buddhassa sāsane;  
Sabbogaṃ samatikkamma, anuruddhova jhāyati.
895. “Rūpā saddā rasā gandhā, phoṭṭhabbā ca manoramā;  
Ete ca samatikkamma, anuruddhova jhāyati.
896. “Piṇḍapātaṭṭikkanto, eko adutiyo muni;  
Esati paṃsukūlāni, anuruddho anāsavo.
897. “Vicinī aggahī dhovi, rajayī dhārayī muni;  
Paṃsukūlāni matimā, anuruddho anāsavo.
898. “Mahiccho ca asantuṭṭho, saṃsaṭṭho yo ca uddhato;  
Tassa dhammā ime honti, pāpakā saṃkilesikā.
899. “Sato ca hoti appiccho, santuṭṭho avighātavā;  
Pavivekarato vitto, niccamāraddhavīriyo.
900. “Tassa dhammā ime honti, kusalā bodhipakkhikā;  
Anāsavo ca so hoti, iti vuttaṃ mahesinā.
901. “Mama saṅkappamaññāya, satthā loke anuttaro;  
Manomayena kāyena, iddhiyā upasaṅkami.
902. “Yadā me ahu saṅkappo, tato uttari desayī;  
Nippapañcarato buddho, nippapañcamadesayī.
903. “Tassāhaṃ dhammamaññāya, vihāsiṃ sāsane rato;  
Tisso vijjā anuppattā, kataṃ buddhassa sāsanaṃ.



904. “Pañcapaññāsavassāni, yato nesajjiko ahaṃ;  
Pañcavīsativassāni, yato middhaṃ samūhatam.
905. [dī. ni. 2.222] “Nāhu assāsapassāsā, ʘhitacittassa tādino;  
Anejo santimārabbha, cakkhumā parinibbuto.
906. [dī. ni. 2.222] “Asallīnena cittena, vedanaṃ ajjhavāsaya;  
Pajjotasseva nibbānaṃ, vimokkho cetaso ahu.
907. “Ete pacchimakā dāni, munino phassapañcamā;  
Nāññe dhammā bhavissanti, sambuddhe parinibbuto.
908. “Natthi dāni punāvāso, devakāyasmi jālini;  
Vikkhīṇo jātisamsāro, natthi dāni punabbhavo.
909. “Yassa muhuttana sahasadhā, loko saṃvidito sabrahmakappo;  
Vasī iddhiguṇe cutūpapāte, kāle passati devatā sa bhikkhu [sabhikkhuno (sī. ka.)].
910. “Annabhāro [annahāro (sī.)] pure āsiṃ, daliddo ghāsahārako;  
Samaṇaṃ paṭipādesiṃ, upariṭṭhaṃ yasassinam.
911. “Somhi sakyakule jāto, anuruddhoti maṃ vidū;  
Upeto naccagītehi, sammatāḷappabodhano.
912. “Athaddasāsiṃ sambuddham, sathhāraṃ akutobhayaṃ;  
Tasmīṃ cittaṃ pasādetvā, pabbajiṃ anagāriyaṃ.
913. “Pubbenivāsaṃ jānāmi, yattha me vusitaṃ pure;  
Tāvatiṃsesu devesu, aṭṭhāsiṃ sakkajātiyā [satajātiyā (sī.)].
914. “Sattakkhattuṃ manussindo, ahaṃ rajjamakārayiṃ;  
Cāturanto vijitāvī, jambusaṇḍassa issaro;  
Adaṇḍena asatthena, dhammena anusāsayaṃ.
915. “Ito satta tato satta, saṃsārāni catuddasa;  
Nivāsamabhijānissaṃ, devaloke ʘhitā tadā.
916. “Pañcaṅgike samādhimhi, sante ekodibhāvite;  
Paṭippassaddhiladdhamhi, dibbacakkhu visujjhi me.
917. “Cutūpapātaṃ jānāmi, sattānaṃ āgatiṃ gatiṃ;  
Itthabhāvaññathābhāvaṃ, jhāne pañcaṅgike ʘhito.
918. “Pariciṇṇo mayā sathhā...pe... bhavanetti samūhatā.
919. “Vajjīnaṃ veḷuvagāme, ahaṃ jīvitasaṅkhayā;  
Heṭṭhato veḷugumbasmiṃ, nibbāyissaṃ anāsavo’’ti.

... Anuruddho thero....

### 10. Pārāpariyattheragāthā

920. Samaṇassa ahu cintā, pupphitamhi mahāvane;

Ekagassa nisinnassa, pavivittassa jhāyino.

921. “Aññathā lokanāthamhi, tiṭṭhante purisuttame;  
Iriyaṃ āsi bhikkhūnaṃ, aññathā dāni dissati.
922. “Sītavātaparittānaṃ, hirikoṇachādanāṃ;  
Mattaṭṭhiyaṃ abhuñjimsu, santuṭṭhā itarītare.
923. “Pañītaṃ yadi vā lūkhaṃ, appaṃ vā yadi vā bahuṃ;  
Yāpanatthaṃ abhuñjimsu, agiddhā nādhimucchitā.
924. “Jīvitānaṃ parikkhāre, bhesajje atha paccaye;  
Na bālhaṃ ussukā āsuṃ, yathā te āsavakkhaye.
925. “Araññe rukkhamūlesu, kandarāsu guhāsu ca;  
Vivekamanubrūhantā, vihaṃsu tapparāyanā.
926. “Nīcā nivīṭṭhā subharā, mudū atthaddhamānasā;  
Abyāsekā amukharā, atthacintā vasānugā.
927. “Tato pāsādikaṃ āsi, gataṃ bhuttaṃ nisevitaṃ;  
Siniddhā teladhārāva, ahosi iriyāpatho.
928. “Sabbāsavaparikkhīṇā, mahājhāyī mahāhitā;  
Nibbutā dāni te therā, parittā dāni tādīsā.
929. “Kusalānañca dhammānaṃ, paññāya ca parikkhayā;  
Sabbākāravarūpetāṃ, lujjate jinasāsanāṃ.
930. “Pāpakānañca dhammānaṃ, kilesānañca yo utu;  
Upaṭṭhitā vivekāya, ye ca saddhammasesakā.
931. “Te kilesā pavaḍḍhantā, āvisanti bahuṃ janāṃ;  
Kīḷanti maññe bālehi, ummattehiva rakkhasā.
932. “Kilesehābhibhūtā te, tena tena vidhāvītā;  
Narā kilesavatthūsu, sasaṅgāmeva ghosite.
933. “Pariccajivā saddhammaṃ, aññamaññehi bhaṇḍare;  
Ditṭhigatāni anventā, idaṃ seyyoti maññare.
934. “Dhanañca puttaṃ bhariyañca, chaḍḍayitvāna niggatā;  
Kaṭacchubhikkhahetūpi, akicchāni nisevare.
935. “Udarāvadehakaṃ bhutvā, sayantuttānaseyyakā;  
Kathaṃ vattenti [kathā vaḍḍhenti (sī. ka.)] paṭibuddhā, yā kathā satthugarahitā.
936. “Sabbakārukasippāni, cittaṃ katvāna [cittīkatvāna (sī.), cittaṃ katvāna (syā.)] sikkhare;  
Avūpasantā ajjhataṃ, sāmāññatthoti acchati [tiriñcati (?)].
937. “Mattikaṃ telacuṇṇaṃ, udakāsanabhojanaṃ;  
Gihīnaṃ upanāmenti, ākaṅkhaṇṭā bahuttaraṃ.
938. “Dantaponāṃ kapitthañca, pupphaṃ khādaniyāni ca;  
Piṇḍapāte ca sampanne, ambe āmalakāni ca.

939. “Bhesajjesu yathā vejjā, kiccākicce yathā gihī;  
Gaṇikāva vibhūsāyaṃ, issare khattiyā yathā.
940. “Nekatikā vañcanikā, kūṭasakkhī apāṭukā;  
Bahūhi parikappehi, āmisāṃ paribhuñjare.
941. “Lesakappe pariyāye, parikappenu dhāvitā;  
Jīvikatthā upāyena, saṅkaḍḍhanti bahuṃ dhanāṃ.
942. “Upaṭṭhāpenti parisāṃ, kammato no ca dhammato;  
Dhammaṃ paresāṃ desenti, lābhato no ca atthato.
943. “Saṅghalābhassa bhaṇḍanti, saṅghato paribāhirā;  
Paralābhopajīvantā, ahirīkā na lajjare.
944. “Nānuyuttā tathā eke, muṇḍā saṅghāṭipārutā;  
Sambhāvanāmyevicchanti, lābhasakkāramucchitā.
945. “Evaṃ nānappayātamhi, na dāni sukaraṃ tathā;  
Aphusitaṃ vā phusitaṃ, phusitaṃ vānurakkhitaṃ.
946. “Yathā kaṇṭakaṭṭhānamhi, careyya anupāhano;  
Satiṃ upaṭṭhapetvāna, evaṃ gāme munī care.
947. “Saritvā pubbake yogī, tesāṃ vattamanussaraṃ;  
Kiñcāpi pacchimo kālo, phuseyya amataṃ padaṃ.
948. “Idaṃ vatvā sālavane, samaṇo bhāvitindriyo;  
Brāhmaṇo parinibbāyī, isi khīṇapunabbhavo”’ti.

... Pārāpariyo [pārāsariyo (syā.)] thero....

Vīsatinipāto niṭṭhito.

Tatruddānaṃ –

Adhimutto pārāpariyo, telakāni raṭṭhapālo;  
Mālukyase lo bhaddiyo, aṅguli dibbacakkhuko.

Pārāpariyo dasete, vīsamhi parikittitā;  
Gāthāyo dve satā honti, pañcatālīsa [244 gāthāyoyeva dissanti] uttarinti.

## 17. Timsanipāto

### 1. Phussattheragāthā

949. Pāsādike bahū disvā, bhāvitatte susaṃvute;  
Isi paṇḍarasagotto [paṇḍarassa gotto (sī.)], apucchi phussasavhayaṃ.
950. “Kimchandā kimadhippāyā, kimākappā bhavissare;  
Anāgatamhi kālamhi, taṃ me akkhāhi pucchito”’.

951. “Suṇohi vacanaṃ mayhaṃ, isipaṇḍarasavhaya;  
Sakkaccaṃ upadhārehi, ācikkhissāmyanāgataṃ.
952. “Kodhanā upanāhī ca, makkhī thambhī saṭṭhā bahū;  
Ussukī nānāvādā ca, bhavissanti anāgate.
953. “Aññātamānino dhamme, gambhīre tīragocārā;  
Lahukā agaru dhamme, aññamaññamagāravā.
954. “Bahū ādīnavā loke, uppajjissantyanāgate;  
Sudesitaṃ imaṃ dhammaṃ, kilesessanti [kilesissanti (sī.), kilisissanti (syā. ka.)] dummatī.
955. “Guṇahīnāpi saṅghamhi, voharantā visāradā;  
Balavanto bhavissanti, mukharā assutāvino.
956. “Guṇavantopi saṅghamhi, voharantā yathātthato;  
Dubbalā te bhavissanti, hirīmanā anattikā.
957. “Rajataṃ jātarūpañca, khettaṃ vatthumajelakaṃ;  
Dāsīdāsañca dummedhā, sādiyissantyanāgate.
958. “Ujjhānasaññino bālā, sīlesu asamāhitā;  
Unnaḷā vicarissanti, kalahābhiratā magā.
959. “Uddhatā ca bhavissanti, nīlacīvarapārutā;  
Kuhā thaddhā lapā siṅgī, carissantyariyā viya.
960. “Telasaṅṭhehi kesehi, capalā añjanakkhikā;  
Rathiyāya gamissanti, dantavaṇṇikapārutā.
961. “Ajegucchaṃ vimuttehi, surattaṃ arahaddhajaṃ;  
Jigucchissanti kāsāvaṃ, odātesu samucchitā [odāte susamucchitā (sī.)].
962. “Lābhakāmā bhavissanti, kusītā hīnavīriyā;  
Kicchantaṃ vanapatthāni, gāmantesu vasissare.
963. “Ye ye lābhaṃ labhissanti, micchājīvaratā sadā;  
Te teva anusikkhantaṃ, bhajissanti asaṃyatā.
964. “Ye ye alābhino lābhaṃ, na te pujjā bhavissare;  
Supesalepi te dhīre, sevissanti na te tadā.
965. “Milakkhurajanaṃ rattaṃ [pilakkharajanaṃ rattaṃ (?)], garahantā sakaṃ dhajaṃ;  
Titthiyānaṃ dhajaṃ keci, dhārissantyanāgataṃ.
966. “Agāravo ca kāsāve, tadā tesam bhavissati;  
Paṭisaṅkhā ca kāsāve, bhikkhūnaṃ na bhavissati.
967. “Abhibhūtassa dukkhena, sallavidhassa ruppato;  
Paṭisaṅkhā mahāghorā, nāgassāsi acintiyā.
968. “Chaddanto hi tadā disvā, surattaṃ arahaddhajaṃ;

Tāvadeva bhaṇī gāthā, gajo atthopasaṃhitā’.

969. [dha. pa. 9; jā. 1.2.141; 1.16.122] “Anikkasāvo kāsāvaṃ, yo vatthaṃ paridhassati  
[paridahissati (sī. syā.)];  
Apeto damasaccena, na so kāsāvamarahati.
970. “Yo ca vantakāsāvassa, sīlesu susamāhito;  
Upeto damasaccena, sa ve kāsāvamarahati.
971. “Vipannasīlo dummedho, pākaṭo kāmakāriyo;  
Vibhantacitto nissukko, na so kāsāvamarahati.
972. “Yo ca sīlena sampanno, vītarāgo samāhito;  
Odātamanasankappo, sa ve kāsāvamarahati.
973. “Uddhato unnaḷo bālo, sīlaṃ yassa na vijjati;  
Odātakaṃ arahati, kāsāvaṃ kiṃ karissati.
974. “Bhikkhū ca bhikkhuniyo ca, duṭṭhacittā anādarā;  
Tādīnaṃ mettacittānaṃ, niggaṇhissantyanāgate.
975. “Sikkhāpentāpi therehi, bālā cīvaradhāraṇaṃ;  
Na suṇissanti dummedhā, pākaṭā kāmakāriyā.
976. “Te tathā sikkhitā bālā, aññaṃaññaṃ agāravā;  
Nādiyissantupajjhāye, khaḷunko viya sārathim.
977. “Evaṃ anāgataddhānaṃ, paṭipatti bhavissati;  
Bhikkhūnaṃ bhikkhunīnaṃca, patte kālamhi pacchime.
978. “Purā āgacchate etaṃ, anāgataṃ mahabbhayaṃ;  
Subbacā hotha sakhilā, aññaṃaññaṃ sagāravā.
979. “Mettacittā kārūṇikā, hotha sīlesu saṃvutā;  
Āraddhavīriyā pahitattā, niccaṃ daḷhaparakkamā.
980. “Pamādaṃ bhayato disvā, appamādaṃca khemato;  
Bhāvetthaṭṭhaṅgikaṃ maggaṃ, phusantā amataṃ pada’nti.

... Phusso thero....

## 2. Sāriputtattheragāthā

981. “Yathācārī yathāsato satīmā, yatasankappajjhāyi appamatto;  
Ajjhattarato samāhitatto, eko santusito tamāhu bhikkhuṃ.
982. “Allaṃ sukkaṃ vā bhujjanto, na bālhaṃ suhito siyā;  
Ūnūdaro mitāhāro, sato bhikkhu paribbaje.
983. “Cattāro pañca ālope, abhutvā udakaṃ pive;  
Alaṃ phāsuvihārāya, pahitattassa bhikkhuno.

984. “Kappiyaṃ taṃ ce chādeti, cīvaraṃ idamatthikaṃ [[idamatthitaṃ \(sī.\)](#)];  
Alaṃ phāsuvihārāya, pahitattassa bhikkhuno.
985. “Pallaṅkena nisinnassa, jaṇṇuke nābhivassati;  
Alaṃ phāsuvihārāya, pahitattassa bhikkhuno.
986. [[sam. ni. 4.253](#); [itivu. 53](#)] “Yo sukhaṃ dukkhato adda, dukkhamaddakkhi sallato;  
Ubhayantarena [[ubhayamantare \(sī.\)](#)] nāhosi, kena lokasmi kiṃ siyā.
987. “Mā me kadāci pāpiccho, kusīto hīnavīriyo;  
Appassuto anādarō, kena lokasmi kiṃ siyā.
988. “Bahussuto ca medhāvī, sīlesu susamāhito;  
Cetosamathamuyutto, api muddhani tiṭṭhatu.
989. “Yo papañcamanuyutto, papañcābhirato mago;  
Virādhayī so nibbānaṃ, yogakkhemaṃ anuttaraṃ.
990. “Yo ca papañcaṃ hitvāna, nippapañcapathe rato;  
Ārādhayī so nibbānaṃ, yogakkhemaṃ anuttaraṃ.
991. [[dha. pa. 98](#)] “Gāme vā yadi vāraññe, ninne vā yadi vā thale;  
Yattha arahanto viharanti, taṃ bhūmirāmaṇeyyakaṃ.
992. “Ramaṇīyāni araññāni, yattha na ramatī jano;  
Vītarāgā ramissantī, na te kāmagavesino.
993. [[dha. pa. 76](#)] “Nidhīnaṃva pavattāraṃ, yaṃ passe vajjadassināṃ;  
Niggayhavādiṃ medhāviṃ, tādisaṃ paṇḍitaṃ bhaje;  
Tādisaṃ bhajamānassa, seyyo hoti na pāpiyo.
994. [[dha. pa. 77](#)] “Ovadeyyānusāseyya, asabbhā ca nivāraye;  
Satañhi so piyo hoti, asataṃ hoti appiyo.
995. “Aññassa bhagavā buddho, dhammaṃ desesi cakkhumā;  
Dhamme desiyamānamhi, sotamodhesimatthiko;  
Taṃ me amoghaṃ savanaṃ, vimuttomhi anāsavo.
996. “Neva pubbenivāsāya, napi dibbassa cakkhuno;  
Cetopariyāya iddhiyā, cutiyā upapattiyā;  
Sotadhātuvisuddhiyā, paṇidhī me na vijjati [[kathā. 378](#)].
997. “Rukkhamūlaṃva nissāya, muṇḍo saṅghāṭipāruto;  
Paññāya uttamo thero, upatissova [[upatisso ca \(sī. ka.\)](#)] jhāyati.
998. “Avitakkaṃ samāpanno, sammāsambuddhasāvako;  
Ariyena tuṅhībhāvena, upeto hoti tāvade.
999. [[udā. 24](#)] “Yathāpi pabbato selo, acalo suppatiṭṭhito;  
Evaṃ mohakkhayā bhikkhu, pabbatova na vedhati.
1000. “Anaṅgaṇassa posassa, niccaṃ sucigavesino;

Vālaggamattaṃ pāpassa, abbhamattaṃva khāyati.

**1001:** ‘Nābhinandāmi maraṇaṃ, nābhinandāmi jīvitaṃ;  
Nikkhipissaṃ imaṃ kāyaṃ, sampajāno patissato.

**1002:** ‘Nābhinandāmi maraṇaṃ, nābhinandāmi jīvitaṃ;  
Kālañca paṭikaṅkhāmi, nibbisaṃ bhatako yathā.

**1003:** ‘Ubhayena midaṃ maraṇameva, nāmaraṇaṃ pacchā vā pure vā;  
Paṭipajjatha mā vinassatha, khaṇo vo mā upaccagā.

**1004:** ‘Nagaraṃ yathā paccantaṃ, guttaṃ santarabāhiraṃ;  
Evaṃ gopetha attānaṃ, khaṇo vo mā upaccagā;  
Khaṇātītā hi socanti, nirayamhi samappitā.

**1005:** ‘Upasanto uparato, mantabhāṇī [mattabhāṇī (sī.)] anuddhato;  
Dhunāti pāpake dhamme, dumapattaṃva māluto.

**1006:** ‘Upasanto uparato, mantabhāṇī anuddhato;  
Appāsi [abbahi (syā.), abhāsi (?)] pāpake dhamme, dumapattaṃva māluto.

**1007:** ‘Upasanto anāyāso, vippassanno anāvilo;  
Kalyāṇasīlo medhāvī, dukkhassantakaro siyā.

**1008:** ‘Na vissase ekatiyesu evaṃ, agārisu pabbajitesu cāpi;  
Sādhūpi hutvā na asādhu honti, asādhu hutvā puna sādhu honti.

**1009:** ‘Kāmacchando ca byāpādo, thinamiddhañca bhikkhuno;  
Uddhaccaṃ vicikicchā ca, pañcete cittakelisā.

**1010:** ‘Yassa sakkariyamānassa, asakkārena cūbhayaṃ;  
Samādhi na vikampati, appamādavihārino.

**1011:** ‘Taṃ jhāyinaṃ sātatikaṃ, sukhumadiṭṭhivipassakaṃ;  
Upādānakkhayārāmaṃ, āhu sappuriso iti.

**1012:** ‘Mahāsamuddo pathavī, pabbato anilopi ca;  
Upamāya na yujjanti, satthu varavimuttiyā.

**1013:** ‘Cakkānuvattako thero, mahāñāṇī samāhito;  
Pathavāpaggisamāno, na rajjati na dussati.

**1014:** ‘Paññāpāramitaṃ patto, mahābuddhi mahāmati;  
Ajaḷo jaḷasamāno, sadā carati nibbuto.

**1015:** ‘Pariciṅṇo mayā satthā...pe... bhavanetti samūhatā.

**1016:** ‘Sampādehappamādena, esā me anusāsani;  
Handāhaṃ parinibbissaṃ, vipparamuttomhi sabbadhī’ ti.

... Sāriputto thero....

### 3. Ānandattheragāthā

- 1017: ‘Pisūṇena ca kodhanena ca, maccharinā ca vibhūtanandinā;  
Sakhitaṃ na kareyya paṇḍito, pāpo kāpurisena saṅgamo.
- 1018: ‘Saddhena ca pesalena ca, paññavatā bahussutena ca;  
Sakhitaṃ kareyya paṇḍito, bhaddo sappurisenā saṅgamo.
- 1019: ‘Passa cittaṅkataṃ bimbāṃ...pe... yassa natthi dhuvāṃ ṭhiti.  
1020: ‘Passa cittaṅkataṃ bimbāṃ...pe... vatthehi sobhati.  
1021: ‘Alattakakatā ...pe... no ca pāragavesino.  
1022: ‘Aṭṭhapadakatā...pe... no ca pāragavesino.  
1023: ‘Añjanīva navā...pe... no ca pāragavesino.  
1024: ‘Bahussuto cittaṅkathī, buddhassa paricārako;  
Pannabhāro visaññutto, seyyāṃ kappeti gotamo.
- 1025: ‘Khīṇāsavo visaññutto, saṅgātīto sunibbuto;  
Dhāreti antimaṃ dehaṃ, jātimaraṇapāragū.
- 1026: ‘Yasmiṃ patiṭṭhitā dhammā, buddhassādiccabandhuno;  
Nibbānagamane magge, soyaṃ tiṭṭhati gotamo.
- 1027: ‘Dvāsīti buddhato gaṇhiṃ, dve saḥassāni bhikkhuto;  
Caturāsītisahassāni, ye me dhammā pavattino.
- 1028: ‘Appassutāyaṃ puriso, balibaddova jīrati;  
Mamsāni tassa vaḍḍhanti, paññā tassa na vaḍḍhati.
- 1029: ‘Bahussuto appassutaṃ, yo sutenātimaññati;  
Andho padīpadhārova, tatheva paṭibhāti maṃ.
- 1030: ‘Bahussutaṃ upāseyya, sutañca na vināsaye;  
Taṃ mūlaṃ brahmacariyassa, tasmā dhammadharo siyā.
- 1031: ‘Pubbāparaññū atthaññū, niruttipadakovidō;  
Suggahītañca gaṇhāti, atthañcopaparikkhati.
- 1032: ‘Khantiyā chandikato [khantiyā chandito (?)] hoti, ussahitvā tuletī taṃ;  
Samaye so padahati, ajjhataṃ susamāhito.
- 1033: ‘Bahussutaṃ dhammadharaṃ, sappaññaṃ buddhasāvakaṃ;  
Dhammaviññāṇamākaṅkhaṃ, taṃ bhajetha tathāvidhaṃ.
- 1034: ‘Bahussuto dhammadharo, kosārakkho mahesino;  
Cakkhu sabbassa lokassa, pūjanīyo bahussuto.
- 1035: ‘Dhammārāmo dhammarato, dhammaṃ anuvicintayaṃ;  
Dhammaṃ anussaraṃ bhikkhu, saddhammā na parihāyati.
- 1036: ‘Kāyamaccheragaruno [garuko (sī.)], hiyyamāne [hiyyamāno (sī.)] anuṭṭhahe;  
Sarīrasukhagiddhassa, kuto samaṇaphāsutā.
- 1037: ‘Na pakkhanti disā sabbā, dhammā na paṭibhanti maṃ;  
Gate kalyāṇamittamhi, andhakāraṃva khāyati.



- 1038:** ‘Abbhatītasahāyassa, atītagatasatthuno;  
Natthi etādisaṃ mittamaṃ, yathā kāyagatā sati.
- 1039:** ‘Ye purāṇā atītā te, navehi na sameti me;  
Svajja ekova jhāyāmi, vassupetova pakkhimā.
- 1040:** ‘Dassanāya abhikkante, nānāverajjake bahū;  
Mā vārayittha sotāro, passantu samayo mamaṃ.
- 1041:** ‘Dassanāya abhikkante, nānāverajjake puthu;  
Karoti sathā okāsaṃ, na nivāreti cakkhumā.
- 1042:** ‘Paṇṇavīsativassāni, sekhabhūtassa me sato;  
Na kāmasaññā uppajji, passa dhammasudhammataṃ.
- 1043:** ‘Paṇṇavīsativassāni, sekhabhūtassa me sato;  
Na dosasaññā uppajji, passa dhammasudhammataṃ.
- 1044:** ‘Paṇṇavīsativassāni, bhagavantaṃ upaṭṭhahiṃ;  
Mettena kāyakamma, chāyāva anapāyini [\[anupāyini \(syā. ka.\)\]](#).
- 1045:** ‘Paṇṇavīsativassāni, bhagavantaṃ upaṭṭhahiṃ;  
Mettena vacīkamma, chāyāva anapāyini.
- 1046:** ‘Paṇṇavīsativassāni, bhagavantaṃ upaṭṭhahiṃ;  
Mettena manokamma, chāyāva anapāyini.
- 1047:** ‘Buddhassa caṅkamantassa, piṭṭhito anucaṅkamiṃ;  
Dhamme desiyamānamhi, ñāṇaṃ me udapajjatha.
- 1048:** ‘Ahaṃ sakaraṇīyomhi, sekho appattamānaso;  
Satthu ca parinibbānaṃ, yo amhaṃ anukampako.
- 1049:** ‘Tadāsi yaṃ bhiṃsanakaṃ, tadāsi lomahaṃsanaṃ;  
Sabbākāravārūpete, sambuddhe parinibbute.
- 1050:** ‘Bahussuto dhammadharo, kosārakkho mahesino;  
Cakkhu sabbassa lokassa, ānando parinibbuto.
- 1051:** ‘Bahussuto dhammadharo, kosārakkho mahesino;  
Cakkhu sabbassa lokassa, andhakāre tamonudo.
- 1052:** ‘Gatimanto satimanto, dhitimanto ca yo isi;  
Saddhammadhārako thero, ānando ratanākaro.
- 1053:** ‘Pariciṅṅo mayā sathā, kataṃ buddhassa sāsanaṃ;  
Ohito garuko bhāro, natthi dāni punabbhavo’’ti.

... Ānando thero....

Tiṃsanipāto niṭṭhito.

Tatruddānaṃ –

Phussopatisso ānando, tayotime pakittitā;  
Gāthāyo tattha saṅkhātā, satam pañca ca uttarīti;

## 18. Cattālīsanipāto

### 1. Mahākassapattheragāthā

- 1054:** ‘Na gaṇena purakkhato care, vimano hoti samādhi dullabho;  
Nānājanasaṅgaho dukho, iti disvāna gaṇaṃ na rocaye.
- 1055:** ‘Na kulāni upabbaje muni, vimano hoti samādhi dullabho;  
So ussukko rasānugiddho, atthaṃ riñcati yo sukhāvaho.
- 1056:** ‘Paṅkoti hi naṃ avedayaṃ, yāyaṃ vandanapūjanā kulesu;  
Sukhumaṃ salla durubbahaṃ, sakkāro kāpurisena dujjaho.
- 1057:** ‘Senāsanamhā oruyha, nagaraṃ piṇḍāya pāvisiṃ;  
Bhuñjantaṃ purisaṃ kuṭṭhiṃ, sakkaccaṃ taṃ upaṭṭhahiṃ.
- 1058:** ‘So me [tam (sī. ka.)] pakkena hatthena, ālopaṃ upanāmayi;  
Ālopaṃ pakkhipantassa, aṅguli cettha [pettha (sī. ka.)] chijjatha.
- 1059:** ‘Kuṭṭamūlañca [kuḍḍamūlañca (sī. syā.)] nissāya, ālopaṃ taṃ abhuñjisam;  
Bhuñjamāne vā bhutte vā, jegucchaṃ me na vijjati.
- 1060:** ‘Uttiṭṭhapiṇḍo āhāro, pūtimuttañca osadham;  
Senāsanam rukkhamūlaṃ, paṃsukūlañca cīvaram;  
Yassete abhisambhutvā [abhibhuñjati (?)], sa ve cātuddiso naro.
- 1061:** ‘Yattha eke vihaññanti, āruhantā siluccayaṃ;  
Tassa buddhassa dāyādo, sampajāno patissato;  
Iddhibalenupatthaddho, kassapo abhirūhati.
- 1062:** ‘Piṇḍapātaṭṭhikkanto, selamāruyha kassapo;  
Jhāyati anupādāno, pahīnabhayabheravo.
- 1063:** ‘Piṇḍapātaṭṭhikkanto, selamāruyha kassapo;  
Jhāyati anupādāno, ḍayhamānesu nibbuto.
- 1064:** ‘Piṇḍapātaṭṭhikkanto, selamāruyha kassapo;  
Jhāyati anupādāno, katakicco anāsavo.
- 1065:** ‘Karerimālāvitātā, bhūmibhāgā manoramā;  
Kuñjarābhirudā rammā, te selā ramayanti maṃ.
- 1066:** ‘Nīlabbhavaṇṇā rucirā, vārisītā sucindharā;  
Indagopakasañchannā, te selā ramayanti maṃ.
- 1067:** ‘Nīlabbhakūṭasadisā, kūṭāgāraravarūpamā;

Vāraṇābhirudā rammā, te selā ramayanti maṃ.

**1068:**‘Abhivuṭṭhā rammatalā, nagā isibhi sevītā;  
Abbhunnaditā sikhīhi, te selā ramayanti maṃ.

**1069:**‘Alaṃ jhāyitukāmassa, pahitattassa me sato;  
Alaṃ me atthakāmassa [attakāmassa (?)], pahitattassa bhikkhuno.

**1070:**‘Alaṃ me phāsukāmassa, pahitattassa bhikkhuno;  
Alaṃ me yogakāmassa, pahitattassa tādino.

**1071:**‘Umāpupphena samānā, gaganāvabbhachādītā;  
Nānādiḷḷajagaṇākiṇṇā, te selā ramayanti maṃ.

**1072:**‘Anākiṇṇā gahaṭṭhehi, migasaṅghanisevitā;  
Nānādiḷḷajagaṇākiṇṇā, te selā ramayanti maṃ.

**1073:**‘Acchodikā puthusilā, gonaṅgulamigāyutā;  
Ambusevālasañchannā, te selā ramayanti maṃ.

**1074:**‘Na pañcaṅgikena turiyena, rati me hoti tādīsī;  
Yathā ekaggacittassa, sammā dhammaṃ vipassato.

**1075:**‘Kammaṃ bahukaṃ na kāraye, parivajjeyya janaṃ na uyyame;  
Ussukko so rasānugiddho, atthaṃ riñcati yo sukhāvaho.

**1076:**‘Kammaṃ bahukaṃ na kāraye, parivajjeyya anattaneyyameṭaṃ;  
Kicchati kāyo kilamati, dukkhito so samathaṃ na vindati.

**1077:**‘Oṭṭhappahatamattena, attānampi na passati;  
Patthaddhagīvo carati, ahaṃ seyyoti maññati.

**1078:**‘Aseyyo seyyasamānaṃ, bālo maññati attānaṃ;  
Na taṃ viññū pasamsanti, patthaddhamānasam naraṃ.

**1079:**‘Yo ca seyyohamasmīti, nāhaṃ seyyoti vā pana;  
Hīno taṃsadiso [tīnohaṃ sadiso (syā.)] vāti, vidhāsu na vikampati.

**1080:**‘Paññavantam tathā tādiṃ, sīlesu susamāhitam;  
Cetosamathamannuttam, tañce viññū pasamsare.

**1081:**‘Yassa sabrahmacārīsu, gāravo nūpalabbhati;  
Ārakā hoti saddhammā, nabhato puthavī yathā.

**1082:**‘Yesañca hiri ottappaṃ, sadā sammā upaṭṭhitam;  
Virūḷhabrahmacariyā te, tesam khīṇā punabbhavā.

**1083:**‘Uddhato capalo bhikkhu, paṃsukūlena pāruto;  
Kapīva sīhacamma, na so tenupasobhati.

**1084:**‘Anuddhato acapalo, nipako saṃvutindriyo;  
Sobhati paṃsukūlena, sīhova girigabbhare.

- 1085:**“Ete sambahulā devā, iddhimanto yasassino;  
Dasadevasahassāni, sabbe te brahmakāyikā.
- 1086:**“Dhammasenāpatim vīraṃ, mahājhāyim samāhitam;  
Sāriputtam namassantā, tiṭṭhanti pañjalīkatā.
- 1087:**“Namo te purisājañña, namo te purisuttama;  
Yassa te nābhijānāma, yampi nissāya jhāyati [jhāyasi (ka. aṭṭha.)].
- 1088:**“Accheraṃ vata buddhānaṃ, gambhīro gocaro sako;  
Ye mayaṃ nābhijānāma, vāavedhisamāgatā’.
- 1089:**“Taṃ tathā devakāyehi, pūjitaṃ pūjanārahaṃ;  
Sāriputtam tadā disvā, kappinassa sitaṃ ahu.
- 1090:**“Yāvataṃ buddhakhettamhi, ṭhapayitvā mahāmuniṃ;  
Dhutaguṇe visiṭṭhohaṃ, sadiso me na vijjati.
- 1091:**“Pariciṅṇo mayā satthā, kataṃ buddhassa sāsanaṃ;  
Ohito garuko bhāro, natthi dāni punabbhavo.
- 1092:**“Na cīvare na sayane, bhojane nupalimpati;  
Gotamo anappameyyo, muḷālapupphaṃ vimalaṃva;  
Ambunā nekkhammaninno, tibhavābhinissaṭo.
- 1093:**“Satiṭṭhānagīvo so, saddhāhattho mahāmuni;  
Paññāsīso mahāñāṇī, sadā carati nibbuto”’ti.

... Mahākassapo thero....

Cattālīsanipāto niṭṭhito.

Tatruddānaṃ –

Cattālīsanipātamhi, mahākassapasavhayo;  
Ekova thero gāthāyo, cattāsīla duvepi cāti.

## 19. Paññāsanipāto

### 1. Tālapuṭattheragāthā

- 1094:**“Kadā nuhaṃ pabbatakandarāsu, ekākiyo addutiyo vihassaṃ;  
Aniccato sabbabhavaṃ vipassaṃ, taṃ me idaṃ taṃ nu kadā bhavissati.
- 1095:**“Kadā nuhaṃ bhinnapaṭandharo muni, kāsāvavattho amamo nirāso;  
Rāgañca dosañca tatheva mohaṃ, hantvā sukhī pavanagato vihassaṃ.
- 1096:**“Kadā aniccaṃ vadharogañīlaṃ, kāyaṃ imaṃ maccujarāyupaddutaṃ;  
Vipassamāno vītabhayo vihassaṃ, eko vane taṃ nu kadā bhavissati.
- 1097:**“Kadā nuhaṃ bhayajananiṃ dukhāvahaṃ, taṇhālatam bahuvidhānuvattaniṃ;

Paññāmayam tikhīnamasiṃ gahetvā, chetvā vase tampi kadā bhavissati.

- 1098:** ‘Kadā nu paññāmayamuggatejaṃ, satthaṃ isīnaṃ sahasādiyitvā;  
Māraṃ sasenaṃ sahasā bhañjissaṃ, sīhāsane taṃ nu kadā bhavissati.
- 1099:** ‘Kadā nuhaṃ sabbhi samāgamesu, diṭṭho bhava dhammagarūhi tāḍibhi;  
Yāthāvadassīhi jitindriyehi, padhāniyo taṃ nu kadā bhavissati.
- 1100:** ‘Kadā nu maṃ tandi khudā pipāsā, vātātapā kīṭasarīsapā vā;  
Na bādhayissanti na taṃ giribbaje, atthathiyaṃ taṃ nu kadā bhavissati.
- 1101:** ‘Kadā nu kho yaṃ viditaṃ mahesinā, cattāri saccāni sududdasāni;  
Samāhitatto satimā agacchaṃ, paññāya taṃ taṃ nu kadā bhavissati.
- 1102:** ‘Kadā nu rūpe amite ca sadde, gandhe rase phusitabbe ca dhamme;  
Ādittatohaṃ samathehi yutto, paññāya dacchaṃ tadidaṃ kadā me.
- 1103:** ‘Kadā nuhaṃ dubbacanena vutto, tatonimittaṃ vimano na hessaṃ;  
Atha pasatthopi tatonimittaṃ, tuṭṭho na hessaṃ tadidaṃ kadā me.
- 1104:** ‘Kadā nu kaṭṭhe ca tiṇe latā ca, khandhe imehaṃ amite ca dhamme;  
Ajjhattikāneva ca bāhirāni ca, samaṃ tuleyyaṃ tadidaṃ kadā me.
- 1105:** ‘Kadā nu maṃ pāvusakālamegho, navena toyena sacīvaraṃ vane;  
Isippayātamhi pathe vajantaṃ, ovassate taṃ nu kadā bhavissati.
- 1106:** ‘Kadā mayūrassa sikhaṇḍino vane, dijassa sutvā girigabbhare rutaṃ;  
Paccuṭṭhahitvā amatassa pattiyā, saṃcintaye taṃ nu kadā bhavissati.
- 1107:** ‘Kadā nu gaṅgaṃ yamaṃ sarassatiṃ, pātālakhittaṃ vaḷavāmukhañca [\[balavāmukhañca \(ka.\)\]](#);  
Asajjamāno patareyyamiddhiyā, vibhiṃsanaṃ taṃ nu kadā bhavissati.
- 1108:** ‘Kadā nu nāgo va asaṅgacārī, padālaye kāmagaṇesu chandaṃ;  
Nibbajjayaṃ sabbasubhaṃ nimittaṃ, jhāne yuto taṃ nu kadā bhavissati.
- 1109:** ‘Kadā iṇaṭṭova daliddako [\[daliddako \(sī.\)\]](#) nidhiṃ, ārādhayitvā dhanikehi pīḷito;  
Tuṭṭho bhavissaṃ adhigamma sāsanaṃ, mahesino taṃ nu kadā bhavissati.
- 1110:** ‘Bahūni vassāni tayāmi yācīto, ‘agāravāsena alaṃ nu te idaṃ’;  
Taṃ dāni maṃ pabbajitaṃ samānaṃ, kiṃkāraṇā citta tuvaṃ na yuñjasi.
- 1111:** ‘Nanu ahaṃ citta tayāmi yācīto, ‘giribbaje citrachadā vihaṅgamā’;  
Mahindaghosatthanitābhigajjino, te taṃ ramessanti vanami jhāyinaṃ.
- 1112:** ‘Kulamhi mitte ca piye ca ñātake, khiḍḍāratim kāmagaṇaṃ loka;  
Sabbhaṃ pahāya imamajjhupāgato, athopi tvaṃ citta na mayha tussasi.
- 1113:** ‘Mameva etaṃ na hi tvaṃ paresaṃ, sannāhakāle paridevitena kiṃ;  
Sabbhaṃ idaṃ calamiti pekkhamāno, abhinikkhamim amatapadaṃ jigīsam.
- 1114:** ‘Suyuttavādī dvipadānamuttamo, mahābhisakko naradammasārathi [\[sārathī \(sī.\)\]](#);

‘Cittam calaṃ makkaṭṭasannibhaṃ iti, avītarāgena sudunnivārayaṃ’.

- 1115:** ‘Kāmā hi citrā madhurā manoramā, aviddasū yattha sitā puthujjanā;  
Te dukkhamicchanti punabbhavesino, cittena nītā niraye nirākatā.
- 1116:** ‘‘Mayūraakoṅcābhirutamhi kānane, dīpīhi byagghehi purakkhato vasaṃ;  
Kāye apekkhaṃ jaha mā virādhaya’, itissu maṃ citta pure niyuñjasi.
- 1117:** ‘‘Bhāvehi jhānāni ca indriyāni ca, balāni bojjhaṅgasamādhībhāvanā;  
Tisso ca vijjā phusa buddhasāsane’, itissu maṃ citta pure niyuñjasi.
- 1118:** ‘‘Bhāvehi maggaṃ amatassa pattiya, niyyānikaṃ sabbadukkhakkhayogadhaṃ;  
Aṭṭhaṅgikaṃ sabbakilesasodhanaṃ’, itissu maṃ citta pure niyuñjasi.
- 1119:** ‘‘Dukkanti khandhe paṭipassa yoniso, yato ca dukkhaṃ samudeti taṃ jaha;  
Idheva dukkhassa karohi antaṃ’, itissu maṃ citta pure niyuñjasi.
- 1120:** ‘‘Aniccaṃ dukkhanti vipassa yoniso, suññaṃ anattāti aghaṃ vadhanti ca;  
Manovicāre uparundha cetaso’, itissu maṃ citta pure niyuñjasi.
- 1121:** ‘‘Muṇḍo virūpo abhisāpamāgato, kapālahatthova kulesu bhikkhasu;  
Yuñjassu satthuvacane mahesino’, itissu maṃ citta pure niyuñjasi.
- 1122:** ‘‘Susaṃvutatto visikhantare caraṃ, kulesu kāmesu asaṅgamānaso;  
Cando yathā dosinapuñṇamāsiyā’, itissu maṃ citta pure niyuñjasi.
- 1123:** ‘‘Āraññiko hohi ca piṇḍapātiko, sosāniko hohi ca paṃsukūliko;  
Nesajjiko hohi sadā dhute rato’, itissu maṃ citta pure niyuñjasi.
- 1124:** ‘‘Ropetva rukkhāni yathā phalesī, mūle taruṃ chettu tameva icchasi;  
Tathūpamaṃ cittamidaṃ karosi, yaṃ maṃ aniccamaṃ cale niyuñjasi.
- 1125:** ‘‘Arūpa dūraṅgama ekacāri, na te karissaṃ vacanaṃ idānihaṃ;  
Dukkha hi kāmā kaṭukā mahabbhaya, nibbānamevābhimano carissaṃ.
- 1126:** ‘‘Nāhaṃ alakkhyā ahirikkatāya vā, na cittahetū na ca dūrakantaṇā;  
Ājīvahetū ca ahaṃ na nikkhamiṃ, kato ca te citta paṭissavo mayā.
- 1127:** ‘‘Appicchata sappurisehi vaṇṇitā, makkhappahānaṃ vūpasamo dukhassa’;  
Itissu maṃ citta tadā niyuñjasi, idāni tvaṃ gacchasi pubbacinaṃ.
- 1128:** ‘‘Tanhā avijjā ca piyāpiyaṅca, subhāni rūpāni sukhā ca vedanā;  
Manāpiyā kāmaguṇā ca vantā, vante ahaṃ āvamiṃ na ussahe.
- 1129:** ‘‘Sabbattha te citta vaco kataṃ mayā, bahūsu jātīsu na mesi kopito;  
Ajjhattasambhavo kataññutāya te, dukkhe ciraṃ saṃsaritaṃ tayā kate.
- 1130:** ‘‘Tvaññeva no citta karosi brāhmaṇo [brāhmaṇe (sī.), brāhmaṇaṃ (?) bhāvalopa-tappadhānatā  
gahetabbā], tvaṃ khattiyo rājadasī [rājadisī (syā. ka.)] karosi;  
Vessā ca suddā ca bhavāma ekadā, devattanaṃ vāpi taveva vāhasā.
- 1131:** ‘‘Taveva hetū asurā bhavāmase, tvaṃmūlakaṃ nerayikā bhavāmase;

Atho tiracchānagatāpi ekadā, petattanaṃ vāpi taveva vāhasā.

- 1132:** ‘Nanu dubbhissasi maṃ punappunaṃ, muhuṃ muhuṃ cāraṇikaṃva dassayaṃ;  
Ummattakeneva mayā palobhasi, kiñcāpi te citta virādhitaṃ mayā.
- 1133:** ‘Idaṃ pure cittamacāri cārikaṃ, yenicchakaṃ yatthakāmaṃ yathāsukhaṃ;  
Tadajjahaṃ niggahessāmi yoniso, hatthippabhinnaṃ viya aṅkusaggaho.
- 1134:** ‘Sathā ca me lokamimaṃ adhiṭṭhahi, aniccato addhuvato asārato;  
Pakkhanda maṃ citta jinassa sāsane, tārehi oghā mahatā suduttarā.
- 1135:** ‘Na te idaṃ citta yathā purāṇakaṃ, nāhaṃ alaṃ tuyha vase nivattituṃ [[vasena vattituṃ \(?\)](#)];  
Mahesino pabbajitomi sāsane, na mādisā honti vināsadhārino.
- 1136:** ‘Nagā samuddā saritā vasundharā, disā catasso vidisā adho divā;  
Sabbe aniccā tibhavā upaddutā, kuhiṃ gato citta sukhaṃ ramissasi.
- 1137:** ‘Dhitipparaṃ kiṃ mama citta kāhisi, na te alaṃ citta vasānuvattako;  
Na jātu bhastaṃ ubhatomukhaṃ chupe, dhiratthu pūraṃ nava sotasandaṇiṃ.
- 1138:** ‘Varāhaṇeyyavigāḷhasevite, pabbhāraḷḷe pakateva sundare;  
Navambunā pāvusasitthakānane, tahiṃ guhāgehagato ramissasi.
- 1139:** ‘Sunīlagīvā susikhā supekhuṇā, sucittapattacchadanā vihaṅgamā;  
Sumaṅjughosatthanitābhigajjino, te taṃ ramessanti vanamhi jhāyinaṃ.
- 1140:** ‘Vuṭṭhamhi deve caturaṅgule tiṇe, saṃpupphite meghanibhamhi kānane;  
Nagantare viṭapisamo sayissaṃ, taṃ me mudū hehiti tūlasannibhaṃ.
- 1141:** ‘Tathā tu kassāmi yathāpi issaro, yaṃ labbhati tenapi hotu me alaṃ;  
Na tāhaṃ kassāmi yathā atandito, biḷārabhastava yathā sumadditaṃ.
- 1142:** ‘Tathā tu kassāmi yathāpi issaro, yaṃ labbhati tenapi hotu me alaṃ;  
Vīriyena taṃ mayha vasānayissaṃ, gajaṃva mattaṃ kusalaṅkusaggaho.
- 1143:** ‘Tayā sudantena avaṭṭhitena hi, hayena yoggācariyova ujjunā;  
Pahomi maggaṃ paṭipajjituṃ sivaṃ, cittānurakkhīhi sadā nisevitaṃ.
- 1144:** ‘Āramaṇe taṃ balasā nibandhisam, nāgaṃva thambhamhi dalhāya rajjuyā;  
Taṃ me suguttaṃ satiyā subhāvitaṃ, anissitaṃ sabbabhavesu hehisi.
- 1145:** ‘Paññāya chetvā vipathānusāriṇaṃ, yogena niggayha pathe nivesiya;  
Disvā samudayaṃ vibhavañca sambhavaṃ, dāyādako hehisi aggavādino.
- 1146:** ‘Catubbipallāsavaṃ adhiṭṭhitaṃ, gāmaṇḍalaṃva parinesi citta maṃ;  
Nanu [[nūna \(sī.\)](#)] saṃyojanabandhanacchidaṃ, saṃsevase kāruṇikaṃ mahāmunim.
- 1147:** ‘Migo yathā seri sucittakānane, rammaṃ giriṃ pāvusaabbhamāliniṃ [[māliṃ \(?\)](#)];  
Anākule tattha nage ramissaṃ [[ramissasi \(syā. ka.\)](#)], asaṃsayam citta parā bhavissasi.
- 1148:** ‘Ye tuyha chandena vasena vattino, narā ca nārī ca anubhonti yaṃ sukhaṃ;  
Aviddasū māravasānuvattino, bhavābhinandī tava citta sāvakā’’ti.

... Tālapuṭo thero....

Paññāsanipāto niṭṭhito.

Tatruddānaṃ –

Paññāsamhi nipātami, eko tālapuṭo suci;  
Gāthāyo tattha paññāsa, puna pañca ca uttarīti.

## 20. Saṭṭhinipāto

### 1. Mahāmogallānattheragāthā

- 1149: ‘Āraññikā piṇḍapātikā, uñchāpattāgate ratā;  
Dālemu maccuno senaṃ, ajjhataṃ susamāhitā.
- 1150: ‘Āraññikā piṇḍapātikā, uñchāpattāgate ratā;  
Dhunāma maccuno senaṃ, naḷāgāraṃva kuñjaro.
- 1151: ‘Rukkhamūlikā sātatikā, uñchāpattāgate ratā;  
Dālemu maccuno senaṃ, ajjhataṃ susamāhitā.
- 1152: ‘Rukkhamūlikā sātatikā, uñchāpattāgate ratā;  
Dhunāma maccuno senaṃ, naḷāgāraṃva kuñjaro.
- 1153: ‘Aṭṭhikaṅkalakuṭike, maṃsanhārupasibbite;  
Dhiratthu pure duggandhe, paragatte mamāyase.
- 1154: ‘Gūthabhaste taconaddhe, uragaṇḍipisācini;  
Nava sotāni te kāye, yāni sandanti sabbadā.
- 1155: ‘Tava sarīraṃ navasotaṃ, duggandhakaraṃ paribandhaṃ;  
Bhikkhu parivajjayate taṃ, mīḷhaṃ ca yathā sucikāmo.
- 1156: ‘Evañce taṃ jano jaññā, yathā jānāmi taṃ ahaṃ;  
Ārakā parivajjeyya, gūthaṭṭhānaṃva pāvuse’.
- 1157: ‘Evametaṃ mahāvīra, yathā samaṇa bhāsasi;  
Ettha ceke visīdanti, paṅkamhiva jaraggavo.
- 1158: ‘Ākāsamhi haliddiyā, yo maññetha rajetave;  
Aññena vāpi raṅgena, vighātudayameva taṃ.
- 1159: ‘Tadākāsasamaṃ cittaṃ, ajjhataṃ susamāhitaṃ;  
Mā pāpacitte āsādi, aggikhandhaṃva pakkhimā.
- 1160: ‘Passa cittakataṃ bimbaṃ, arukāyaṃ samussitaṃ;  
Āturaṃ bahusaṅkappaṃ, yassa natthi dhuvaṃ ṭhiti.
- 1161: ‘Passa cittakataṃ rūpaṃ, mañinā kuṇḍalena ca;  
Aṭṭhiṃ tacena onaddhaṃ, saha vatthehi sobhati.



- 1162: ‘Alattakakatā pādā, mukhaṃ cuṇṇakamakkhitaṃ;  
Alaṃ bālassa mohāya, no ca pāragavesino.
- 1163: ‘Aṭṭhapadakatā kesā, nettā añjanamakkhitaṃ;  
Alaṃ bālassa mohāya, no ca pāragavesino.
- 1164: ‘Añjanīva navā citta, pūtikāyo alaṅkato;  
Alaṃ bālassa mohāya, no ca pāragavesino.
- 1165: ‘Odahi migavo pāsaṃ, nāsadā vāguraṃ migo;  
Bhuvā nivāpaṃ gacchāma, kaddante migabandhake.
- 1166: ‘Chinno pāso migavassa, nāsadā vāguraṃ migo;  
Bhuvā nivāpaṃ gacchāma, socante migaluddake.
- 1167: ‘Tadāsi yaṃ bhīṃsanakaṃ, tadāsi lomahaṃsanaṃ;  
Anekākārasampanne, sārīputtamhi nibbute.
- 1168[[dī. ni. 2.221, 272](#); [saṃ. ni. 1.186; 2.143](#); [apa. thera 1.2.115](#); [jā. 1.1.95](#)] ‘‘Aniccā vata saṅkhārā  
uppādavaya dhammino.  
Upajjitvā nirujjhanti, tesāṃ vūpasamo sukho.
- 1169: ‘Sukhumaṃ te paṭivijjhanti, vālaggaṃ usunā yathā;  
Ye pañcakkhandhe passanti, parato no ca attato.
- 1170: ‘Ye ca passanti saṅkhāre, parato no ca attato;  
Paccabyādhiṃsu nipuṇaṃ, vālaggaṃ usunā yathā.
- 1171[[saṃ. ni. 1.21, 97](#)] ‘‘Sattiyā viya omaṭṭho, ḍayhamānova matthake;  
Kāmarāgappahānāya, sato bhikkhu paribbaje.
- 1172[[saṃ. ni. 1.21, 97](#)] ‘‘Sattiyā viya omaṭṭho, ḍayhamānova matthake;  
Bhavarāgappahānāya, sato bhikkhu paribbaje’’.
- 1173: ‘Codito bhāvitattena, sarīrantimadhārīnā;  
Migāramātupāsādaṃ, pādaṅguṭṭhena kampayim.
- 1174: ‘Nayidaṃ sithilamārabba, nayidaṃ appena thāmasā;  
Nibbānamadhigantabbāṃ, sabbagantha-pamocanaṃ.
- 1175: ‘Ayañca daharo bhikkhu, ayamuttamaporiso;  
Dhāreti antimaṃ dehaṃ, jetvā māraṃ savāhinaṃ [[savāhanaṃ \(ka.\)](#)].
- 1176: ‘Vivaramanupabhanti vijjutā, vebhārassa ca paṇḍavassa ca;  
Nagavivaragato jhāyati, putto appaṭimassa tādino.
- 1177: ‘Upasanto uparato, pantasenāsano muni;  
Dāyādo buddhaseṭṭhassa, brahmunā abhivandito.
- 1178: ‘Upasantaṃ uparataṃ, pantasenāsanaṃ muniṃ;  
Dāyādaṃ buddhaseṭṭhassa, vanda brāhmaṇa kassapaṃ.

- 1179: ‘Yo ca jātisatam gacche, sabbā brāhmaṇajātiyo;  
Sottiyo vedasampanno, manussesu punappunam.
- 1180: ‘Ajjhāyakopi ce assa, tiṇṇam vedāna pārāgū;  
Etassa vandanāyetaṃ, kalam nāgghati soḷasiṃ.
- 1181: ‘Yo so aṭṭha vimokkhāni, purebhattam aphassayi [apassayi (sī. ka.), aphussayi (syā.)];  
Anulomam paṭilomam, tato piṇḍāya gacchati.
- 1182: ‘Tādisam bhikkhum māsādi [mā hani (sī.)], mātṭānam khaṇi brāhmaṇa;  
Abhippasādehi manam, arahantamhi tādine;  
Khippam pañjaliko vanda, mā te vijaṭi matthakam.
- 1183: ‘Neso passati saddhammam, saṃsārena purakkhato;  
Adhogamam jimhapaṭham, kummagamanudhāvati.
- 1184: ‘Kimīva mīlhasallitto, saṅkhāre adhimucchito;  
Pagāḷho lābhasakkāre, tuccho gacchati poṭṭhilo.
- 1185: ‘Imañca passa āyantam, sārīputtam sudassanam;  
Vimuttam ubhatobhāge, ajjhataṃ susamāhitam.
- 1186: ‘Visallam khīṇasaṃyogam, tevijjam maccuhāyinaṃ;  
Dakkhiṇeyyam manussānam, puññakkhetam anuttaram.
- 1187: ‘Ete sambahulā devā, iddhimanto yasassino;  
Dasa devasahassāni, sabbe brahmapurohitā;  
Moggallānam namassantā, tiṭṭhanti pañjalīkatā.
- 1188: ‘‘Namo te purisājañña, namo te purisuttama;  
Yassa te āsavā khīṇā, dakkhiṇeyyosi mārisa’.
- 1189: ‘Pūjito naradevena, uppanno marañābhibhū;  
Puṇḍarīkamva toyena, saṅkhārenupalippati.
- 1190: ‘Yassa muhuttana saḥassadhā loko, saṃvidito sabrahmakappo vasi;  
Iddhiguṇe cutupapāte kāle, passati devatā sa bhikkhu.
- 1191: ‘Sārīputtova paññāya, sīlena upasamena ca;  
Yopi pārāngato bhikkhu, etāvaparamo siyā.
- 1192: ‘Koṭisatasahassassa, attabhāvam khaṇena nimmīne;  
Aham vikubbanāsu kusalo, vasībhūtomhi iddhiyā.
- 1193: ‘Samādhivijjāvasipāramīgato, moggallānagotto asitassa sāsane;  
Dhīro samucchindi samāhitindriyo, nāgo yathā pūtilatamva bandhanam.
- 1194: ‘Paricīṇṇo mayā satthā, kataṃ buddhassa sāsanaṃ;  
Ohito garuko bhāro, bhavanetti samūhatā.
- 1195: ‘Yassa catthāya pabbajito, agārasmānagāriyam;  
So me attho anupatto, sabbasaṃyojanakkhayo.

- 1196[[ma. ni. 1.513](#)] “Kīdiso nirayo āsi, yattha dussī apaccatha;  
Vidhuraṃ sāvakaṃāsajja, kakusandhañca brāhmaṇaṃ.
- 1197:“Sataṃ āsi ayosaṅkū, sabbe paccattavedanā;  
Idiso nirayo āsi, yattha dussī apaccatha;  
Vidhuraṃ sāvakaṃāsajja, kakusandhañca brāhmaṇaṃ.
- 1198:“Yo etamabhijānāti, bhikkhu buddhassa sāvako;  
Tādisaṃ bhikkhumāsajja, kaṇha dukkhaṃ nigacchasi.
- 1199:“Majjhesarasmim [[sarassa \(sī.\)](#), [sāgarasmim \(ka.\)](#)] tiṭṭhanti, vimānā kappathāyino;  
Veḷuriyavaṇṇā rucirā, accimanto pabhassarā;  
Accharā tattha naccanti, puthu nānattavaṇṇiyo.
- 1200:“Yo etamabhijānāti...pe... kaṇha dukkhaṃ nigacchasi.  
1201:“Yo ve buddhena codito, bhikkhusaṅghassa pekkhato;  
Migāramātupāsādaṃ, pādaṅguṭṭhena kampayi.
- 1202:“Yo etamabhijānāti...pe... kaṇha dukkhaṃ nigacchasi.  
1203:“Yo vejayantapāsādaṃ, pādaṅguṭṭhena kampayi;  
Iddhibalenupatthaddho, saṃvejesi ca devatā.
- 1204:“Yo etamabhijānāti...pe... kaṇha dukkhaṃ nigacchasi.  
1204:“Yo etamabhijānāti...pe... kaṇha dukkhaṃ nigacchasi.  
1205:“Yo vejayantapāsāde, sakkhaṃ so paripucchati;  
Api āvuso jānāsi, taṇhakkhayavimuttiyo;  
Tassa sakko viyākāsi, pañhaṃ puṭṭho yathātathaṃ.
- 1206:“Yo etamabhijānāti...pe... kaṇha dukkhaṃ nigacchasi.  
1207:“Yo brahmānaṃ paripucchati, sudhammāyaṃ ṭhito [[sudhammāyā’bhito \(syā.\)](#)] sabhaṃ;  
Ajjāpi tyāvuso sā diṭṭhi, yā te diṭṭhi pure ahu;  
Passasi vītivattantaṃ, brahmaloke pabhassaraṃ.
- 1208:“Tassa brahmā viyākāsi, pañhaṃ puṭṭho yathātathaṃ;  
Na me mārisa sā diṭṭhi, yā me diṭṭhi pure ahu.
- 1209:“Passāmi vītivattantaṃ, brahmaloke pabhassaraṃ;  
Sohaṃ aḷḷa kathaṃ vajjaṃ, ahaṃ niccomhi sassato.
- 1210:“Yo etamabhijānāti...pe... kaṇha dukkhaṃ nigacchasi.  
1211:“Yo mahāneruno kūṭaṃ, vimokkhena aphassayi [[apassayi \(sī. ka.\)](#)];  
Vanāṃ pubbavidehānaṃ, ye ca bhūmisayā narā.  
1212:“Yo etamabhijānāti, bhikkhu buddhassa sāvako;  
Tādisaṃ bhikkhumāsajja, kaṇha dukkhaṃ nigacchasi.  
1213:“Na ve aggi cetayati, ahaṃ bālaṃ ḍahāmīti;  
Bālova jalītaṃ aggim, āsajja naṃ paḍayhati.
- 1214:“Evameva tuvaṃ māra, āsajja naṃ tathāgataṃ;  
Sayāṃ ḍahissasi attānaṃ, bālo aggimva samphusaṃ.
- 1215:“Apuññaṃ pasavī māro, āsajja naṃ tathāgataṃ;  
Kiṃ nu maññasi pāpima, na me pāpaṃ vipaccati.

1216: ‘Karato te cīyate [miyyate (sabbattha) ma. ni. 1.513 passitabbam] pāpaṃ, cirarattāya antaka;  
Māra nibbinda buddhamhā, āsaṃ mākāsi bhikkhusu.

1217: ‘Iti māraṃ atajjesi, bhikkhu bhesakaḷāvane;  
Tato so dummano yakkho, tatthevantaradhāyathā’ ti.

Itthaṃ sudaṃ āyasmā mahāmoggallāno [mahāmoggallāno (ka.)] thero gāthāyo abhāsittāti.

Saṭṭhinipāto niṭṭhito.

Tatruddānaṃ –

Saṭṭhikamhi nipātamhi, moggallāno mahiddhiko;  
Ekova theragāthāyo, aṭṭhasaṭṭhi bhavanti tāti.

## 21. Mahānipāto

### 1. Vaṅṅisaṭṭheragāthā

1218: ‘Nikkhantaṃ vata maṃ santaṃ, agārasmānagāriyaṃ;  
Vitakkā upadhāvanti, pagabbhā kaṇhato ime.

1219: ‘Uggaputtā mahissāsā, sikkhitā dalhadhammino [dalhadhanvino (sī. aṭṭha.)];  
Samantā parikireyyuṃ, sahasaṃ apalāyinaṃ.

1220: ‘Sacepi ettakā [etato (saṃ. ni. 1.209)] bhiyyo, āgamissanti itthiyo;  
Neva maṃ byādhayissanti [byāthayissanti (?)], dhamme samhi [dhammesvamhi (syā. ka.)]  
patiṭṭhito.

1221: ‘Sakkhī hi me sutam etam, buddhassādiccabandhuno;  
Nibbānagamaṇam maggaṃ, tattha me nirato mano.

1222: ‘Evaṃ ce maṃ viharantaṃ, pāpima upagacchasi;  
Tathā maccu karissāmi, na me maggampi dakkhasi.

1223: ‘Aratiṅca [aratim (bahūsu)] ratiṅca pahāya, sabbaso gehasitaṅca vitakkaṃ;  
Vanathaṃ na kareyya kuhiṅci, nibbanatho avanatho sa [nibbanatho arato sa hi (saṃ. ni.  
1.210)] bhikkhu.

1224: ‘Yamidha pathaviṅca vehāsaṃ, rūpagataṃ jagatogadhaṃ kiṅci;  
Parijīyati sabbamaniccaṃ, evaṃ samecca caranti mutattā.

1225: ‘Upadhīsu janā gadhitāse, diṭṭhasute [diṭṭhe sute (sī.)] paṭighe ca mute ca;  
Ettha vinodaya chandamanejo, yo hettha na limpanti muni tamāhu [tam munimāhu (saṃ. ni.  
1.210)].

1226: ‘Atha saṭṭhisitā savitakkā, puthujjanatāya [puthū janatāya (saṃ. ni. 1.210)] adhammā nivīṭṭhā;  
Na ca vaggagatassa kuhiṅci, no pana duṭṭhullagāhī [duṭṭhullabhāṇī (saṃ. ni. 1.210)] sa  
bhikkhu.

1227: ‘Dabbo cirarattasamāhito, akuhako nipako apihālu;

Santaṃ padaṃ ajjhagamā muni, paṭicca parinibbuto kaṅkhati kālaṃ.

1228: ‘Mānaṃ pajahassu gotama, mānapathaṅca jahassu asesam;  
Mānapathamhi sa mucchito, vippaṭisārīhuvā cirarattaṃ.

1229: ‘Makkhena makkhitā pajā, mānahatā nirayaṃ papatanti;  
Socanti janā cirarattaṃ, mānahatā nirayaṃ upapannā.

1230: ‘Na hi socati bhikkhu kadāci, maggajino sammā paṭipanno;  
Kittiṅca sukhaṅcānubhoti, dhammasasoti tamāhu tathattaṃ.

1231: ‘Tasmā akhilo idha [akhilo (sī.), akhilodha (saṃ. ni. 1.211)] padhānavā, nīvaraṇāni pahāya  
visuddho;  
Mānaṅca pahāya asesam, vijjāyantakaro samitāvī.

1232: ‘Kāmarāgena ḍayhāmi, cittaṃ me pariḍayhati;  
Sādhu nibbāpanaṃ brūhi, anukampāya gotama.

1233: ‘Saññāya vipariyesā, cittaṃ te pariḍayhati;  
Nimittaṃ parivajjehi, subhaṃ rāgūpasamhitam ( ) [(saṅkhāre parato passa, dukkhato mā ca  
attato; nibbāpehi mahārāgaṃ, mā dayhittho punappunaṃ;) (sī. saṃ. ni. 1.212)  
uddānagāthāyaṃ ekasattatīsaṅkhyā ca, theragāthāṭṭhakathā ca passitabbā].

1234: ‘Asubhāya cittaṃ bhāvehi, ekaggaṃ susamāhitam;  
Sati kāyagatā tyatthu, nibbidābahulo bhava.

1235: ‘Animittaṅca bhāvehi, mānānusayamujjaha;  
Tato mānābhisamayā, upasanto carissasi.

1236: ‘Tameva vācaṃ bhāseyya, yāyattānaṃ na tāpaye;  
Pare ca na vihiṃseyya, sā ve vācā subhāsītā.

1237: ‘Piyavācameva bhāseyya, yā vācā paṭinanditā;  
Yaṃ anādāya pāpāni, paresam bhāsate piyaṃ.

1238: ‘Saccam ve amatā vācā, esa dhammo sanantano;  
Sacce atthe ca dhamme ca, āhu santo paṭiṭṭhitā.

1239: ‘Yaṃ buddho bhāsati vācaṃ, khemaṃ nibbānapattiyā;  
Dukkassantakiriyāya, sā ve vācānamuttamā.

1240: ‘Gambhīrapañño medhāvī, maggāmaggassa kovido;  
Sāriputto mahāpañño, dhammaṃ deseti bhikkhunaṃ.

1241: ‘Saṅkhittenapi deseti, vitthārenapi bhāsati;  
Sālikāyiva nigghoso, paṭibhānaṃ udiyyati [udīrayi (sī.), udīyyati (syā.), udayyati (?) uṭṭhahatīti  
taṃsaṃvaṇṇanā].

1242: ‘Tassa taṃ desayantassa, suṇanti madhuraṃ giraṃ;  
Sarena rajanīyena, savanīyena vaggunā;  
Udagacittā muditā, sotaṃ odhenti bhikkhavo.

- 1243: ‘Ajjā pannarase visuddhiyā, bhikkhū pañcasatā samāgatā;  
Samyojanabandhanacchidā, anīghā khīṇapunnabbhavā isī.
- 1244: ‘Cakkavattī yathā rājā, amaccaparivārīto;  
Samantā anupariyeti, sāgarantaṃ mahiṃ imaṃ.
- 1245: ‘Evaṃ vijītasāṅgāmaṃ, satthavāhaṃ anuttaraṃ;  
Sāvakā payirupāsanti, tevijjā maccuhāyino.
- 1246: ‘Sabbe bhagavato puttā, palāpettha na vijjati;  
Taṇhāsallassa hantāraṃ, vande ādiccabandhunaṃ.
- 1247: ‘Parosahassaṃ bhikkhūnaṃ, sugataṃ payirupāsati;  
Desentaṃ virajaṃ dhammaṃ, nibbānaṃ akutobhayaṃ.
- 1248: ‘Suṇanti dhammaṃ vimalaṃ, sammāsambuddhadesitaṃ;  
Sobhati vata sambuddho, bhikkhusaṅghapurakkhato.
- 1249: ‘‘Nāganāmo’ si bhagavā, isīnaṃ isisattamo;  
Mahāmeghova hutvāna, sāvake abhivassasi.
- 1250: ‘Divā vihārā nikkhamma, satthudassanakamyatā;  
Sāvako te mahāvīra, pāde vandati vaṅgiso.
- 1251: ‘Ummaggapathaṃ māraṣṣa, abhibhuyya carati pabhijja khīlāni;  
Taṃ passatha bandhapamuñcakaraṃ, asitaṃva bhāgaso pavibhajja.
- 1252: ‘Oghassa hi nitaraṇatthaṃ, anekavihitaṃ maggaṃ akkhāsi;  
Tasmiṇca amate akkhāte, dhammadaṣā ṭhitā asaṃhīrā.
- 1253: ‘Pajjotakaro ativijja [\[ativijja dhammaṃ \(sī.\)\]](#), sabbatthitīnaṃ atikkamamaddasa  
[\[atikkamamadda \(sī. ka.\)\]](#);  
Ñatvā ca sacchikatvā ca, aggaṃ so desayi dasaddhānaṃ.
- 1254: ‘Evaṃ sudesite dhamme, ko pamādo vijānataṃ dhammaṃ;  
Tasmā hi tassa bhagavato sāsaṇe, appamatto sadā namassamanusikkhe.
- 1255: ‘Buddhānubuddho yo thero, koṇḍañño tibbanikkamo;  
Lābhī sukhavihārānaṃ, vivekānaṃ abhiṇhaso.
- 1256: ‘Yaṃ sāvakena pattaḃbaṃ, satthu sāsanakārīnā;  
Sabbassa taṃ anuppattaṃ, appamattassa sikkhato.
- 1257: ‘Mahānubhāvo tevijjo, cetopariyakovido;  
Koṇḍañño buddhadāyādo, pāde vandati satthuno.
- 1258: ‘Nagassa passe āsīnaṃ, muniṃ dukkhassa pāragaṃ;  
Sāvakā payirupāsanti, tevijjā maccuhāyino.
- 1259: ‘Cetasā [\[te cetasā \(saṃ. ni. 1.218\)\]](#) anupariyeti, moggallāno mahiddhiko;  
Cittaṃ nesaṃ samanvesaṃ [\[samannesam \(saṃ. ni. 1.218\)\]](#), vippamuttaṃ nirūpadhiṃ.

- 1260: ‘Evaṃ sabbaṅgasampannaṃ, muniṃ dukkhassa pāraguṃ;  
Anekākārasampannaṃ, payirupāsanti gotamaṃ.
- 1261: ‘Cando yathā vigatavalāhake nabhe, virocati vītamalova bhāṇumā;  
Evampi aṅgīrasa tvaṃ mahāmuni, atirocasi yasasā sabbalokaṃ.
- 1262: ‘Kāveyyamattā vicarimha pubbe, gāmā gāmaṃ purā puram;  
Athaddasāma sambuddhaṃ, sabbadhammāna pāraguṃ.
- 1263: ‘So me dhammadesesi, muni dukkhassa pāragū;  
Dhammaṃ sutvā pasīdimha, saddhā [addhā (sī. aṭṭha.)] no udapajjatha.
- 1264: ‘Tassāhaṃ vacanaṃ sutvā, khandhe āyatanāni ca;  
Dhātuyo ca viditvāna, pabbajim anagāriyaṃ.
- 1265: ‘Bahūnaṃ vata atthāya, uppajjanti tathāgatā;  
Itthīnaṃ purisānañca, ye te sāsanaṅkarakā.
- 1266: ‘Tesaṃ kho vata atthāya, bodhimajjhagamā muni;  
Bhikkhūnaṃ bhikkhunīnañca, ye nirāmagataddasā.
- 1267: ‘Sudesitā cakkhumatā, buddhenādiccabandhunā;  
Cattāri ariyasaccāni, anukampāya paṇinaṃ.
- 1268: ‘Dukkhā dukkhasamuppādaṃ, dukkhassa ca atikkamaṃ;  
Ariyaṃ caṭṭhaṅgikaṃ maggaṃ, dukkhūpasamagāminaṃ.
- 1269: ‘Evamate tathā vuttā, diṭṭhā me te yathā tathā;  
Sadattho me anuppatto, kataṃ buddhassa sāsanaṃ.
- 1270: ‘Svāgataṃ vata me āsi, mama buddhassa santike;  
Suvibhatesu [savibhatesu (sī. ka.)] dhammesu, yaṃ seṭṭhaṃ tadupāgamiṃ.
- 1271: ‘Abhiññāpāramippatto, sotadhātu visodhitā;  
Tevijjo iddhipattomhi, cetopariyakovido.
- 1272: ‘Pucchāmi sathāraṇamanapaññaṃ, diṭṭheva dhamme yo vicikicchānaṃ chettā;  
Aggāḷave kālamakāsi bhikkhu, ñāto yasassī abhinibbutatto.
- 1273: ‘Nigrodhakappo iti tassa nāmaṃ, tayā kataṃ bhagavā brāhmaṇassa;  
So taṃ namassaṃ acari mutyapekho, āradhavīriyo dalhadhammadassī.
- 1274: ‘Taṃ sāvakaṃ sakka mayampi sabbe, aññātumicchāma samantacakkhu;  
Samavaṭṭhitā no savanāya sotā [hetuṃ (sī. syā.) suttanipātaṭṭhakathā passitabbā], tvaṃ no  
sattā tvamanuttarosi’.
- 1275: Chinda no vicikicchā brūhi metaṃ, parinibbutaṃ vedaya bhūripañña;  
Majjheva no bhāsa samantacakkhu, sakkova devāna sahasanetto.
- 1276: ‘Ye keci ganthā idha mohamaggā, aññānapakkhā vicikicchathānā;  
Tathāgataṃ patvā na te bhavanti, cakkhuñhi etaṃ paramaṃ narānaṃ.

- 1277: ‘No ce hi jātu puriso kilese, vāto yathā abbhaghaṇaṃ vihāne;  
Tamovassa nivuto sabbaloko, jotimantopi na pabhāseyyuṃ [na jotimantopi narā tapeyyuṃ (su. ni. 350)].
- 1278: ‘Dhīrā ca pajjotakarā bhavanti, taṃ taṃ ahaṃ vīra tatheva maññe;  
Vipassinaṃ jānamupāgamimha, parisāsu no āvikarohi kammaṃ.
- 1279: ‘Khippaṃ giraṃ eraya vaggu vagguṃ, haṃsova paggayha saṅkamaṃ nikūja;  
Bindussarena suvikappitena, sabbeva te ujjugatā suṇoma.
- 1280: ‘Pahīnajātimaṇaṃ asesam, niggayha dhonaṃ vadessāmi [paṭivediyāmi (sī. ka.)] dhammaṃ;  
Na kāmakāro hi [hoti (sī. ka.)] puthujjanānaṃ, saṅkheyyakāro ca [va (bahūsu)] tathāgatānaṃ.
- 1281: ‘Sampannaveyyākaraṇaṃ tavedaṃ, samujjupaññaṃ samuggahītaṃ;  
Ayamañjali pacchimo suppaṇāmito, mā mohayī jānāmanomapañña.
- 1282: ‘Paroparaṃ ariyadhammaṃ viditvā, mā mohayī jānāmanomavīriya;  
Vāriṃ yathā ghammani ghammatatto, vācābhikaṅkhāmi suttaṃ pavassa.
- 1283: ‘Yadatthikaṃ brahmacariyaṃ acarī, kappāyano kaccissataṃ amoghaṃ;  
Nibbāyi so ādu saupādiseso [anupādisesā (sī.), anupādiseso (ka.)], yathā vimutto ahu taṃ suṇoma.
- 1284: ‘‘Acchecchi taṇhaṃ idha nāmarūpe,  
(Iti bhagavā) kaṇhassa sotaṃ dīgharattānusayitaṃ;  
Atāri jātiṃ maraṇaṃ asesam’, iccabravi bhagavā pañcasetṭho.
- 1285: ‘Esa sutvā pasīdāmi, vaco te isisattama;  
Amoghaṃ kira me puṭṭhaṃ, na maṃ vañcesi brāhmaṇo.
- 1286: ‘Yathā vādī tathā kāri, ahu buddhassa sāvako;  
Acchecchi maccuno jālaṃ, tataṃ māyāvino daḷhaṃ.
- 1287: ‘Addasa bhagavā ādiṃ, upādānassa kappiyo;  
Accagā vata kappāno, maccudheyyaṃ suduttaraṃ.
- 1288: ‘Taṃ devadevaṃ vandāmi, puttaṃ te dvipaduttama;  
Anujātaṃ mahāvīraṃ, nāgaṃ nāgassa orasa’nti.

Itthaṃ sudaṃ āyasmā vaṅgīso thero gāthāyo

Abhāsithāti.

Mahānipāto niṭṭhito.

Tatruddānaṃ –

Sattatimhi nipātamhi, vaṅgīso paṭibhāṇavā;  
Ekova thero natthañño, gāthāyo ekasattatīti.

Niṭṭhitā theragāthāyo.



Tatruddānaṃ –

Sahassaṃ honti tā gāthā, tīṇi saṅghisatāni ca;  
Therā ca dve satā saṅghi, cattāro ca pakāsītā.

Sīhanādaṃ naditvāna, buddhaputtā anāsavā;  
Khemantaṃ pāpuṇitvāna, aggikhandhāva nibbutāti.

Theragāthāpāli niṭṭhitā.